



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj: 01-GV-02-338/23
Sarajevo, 22.02.2023. godine

Na osnovu člana 31. stav (1) tačka b) i člana 77. stav (1) Statuta Grada Sarajeva („Službene novine Kantona Sarajevo“, broj 07/23), Gradsko vijeće Grada Sarajeva, na 24. sjednici održanoj dana 22.02.2023. godine, usvojilo je

Izveštaj o aktivnostima Grada Sarajeva u oblasti međunarodne saradnje u 2022. godini.

PREDSJEDAVALJUĆI GRADSKOG VIJEĆA

Jasmin Ademović, s.r.

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

IZVJEŠTAJ
O AKTIVNOSTIMA GRADA SARAJEVA
U OBLASTI MEĐUNARODNE SARADNJE U 2022. GODINI

Sarajevo, februar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



SADRŽAJ

UVOD
MEĐUNARODNA SARADNJA NA NIVOU GRADOVA
MEĐUNARODNI SKUPOVI
SARADNJA S DIPLOMATSKO-KONZULARNIM PREDSTAVNIŠTVIMA
OSTALE AKTIVNOSTI NA PLANU MEĐUNARODNE SARADNJE
AKTIVNOSTI GRADA SARAJEVA U OKVIRU MEĐUNARODNIH ASOCIJACIJA
OCJENA STANJA
ZAKLJUČNA RAZMATRANJA

UVOD

Programom rada Gradskog vijeća Grada Sarajeva za 2023. godinu, broj: 01-GV-02-2024/22 od 28.12.2022. godine, donesenim na 22. sjednici od 28.12.2022. godine, Programom gradonačelnice Grada Sarajeva za 2023. godinu i Programom međunarodne saradnje Grada Sarajeva za 2023. godinu, predviđen je Izvještaj o aktivnostima Grada Sarajeva u oblasti međunarodne saradnje u 2022. godini.

U izvještajnom periodu aktivnosti Grada Sarajeva u oblasti međunarodne saradnje odvijale su se na bilateralnom nivou u formi saradnje sa pobratimskim, prijateljskim i drugim gradovima i međunarodnim institucijama; na multilateralnom nivou kroz zajedničke aktivnosti sa drugim gradovima okupljenim oko određenog projekta i kroz organiziranje ili učestvovanje u međunarodnim skupovima od značaja za Grad Sarajevo; učestvovanjem u radu međunarodnih asocijacija čiji je Grad Sarajevo član; te saradnjom sa diplomatsko-konzularnim predstavništvima sa sjedištem u Bosni i Hercegovini i izvan nje i međunarodnim organizacijama i specijalnim misijama u Bosni i Hercegovini, kao i sa visokim zvaničnicima, premijerima i državniciima iz Evrope i svijeta.

Tokom 2022. godine, Grad Sarajevo je uložio veliki napor na jačanju međunarodne saradnje kao jednog od ključnih faktora razvoja, te na uspostavljanju, održavanju i razvijanju veza sa gradovima regiona, Evrope i svijeta.

Cijeneći svoje ekonomske, kulturne, obrazovne, turističke i druge potencijale, učinio je veliki iskorak pozicionirajući se na regionalnom i međunarodnom nivou kao mjesto inovativnih ideja i rješenja, kao moderan, otvoren, evropski grad i ravnopravan partner za međunarodne projekte i procese. Te vrijednosti su prepoznate naročito u mandatu nove gradske administracije, koja je svojim proaktivnim pristupom osnažila međunarodnu saradnju i privukla interes brojnih gradova za bratimljenjem ili partnerstvom, te što je najvažnije za saradnjom na konkretnim projektima finansiranim od strane Evropske unije.

U skladu sa odlukama koje je Gradsko vijeće Grada Sarajeva usvojilo na sjednici, održanoj dana 01.12.2021. godine, potpisani su sljedeći sporazumi:

- Sporazum o zajedničkoj saradnji između Grada Sarajeva i Grada Şanlıurfa, Şanlıurfa, 14.02.2022.
- Sporazum o bratimljenju između Grada Sarajeva i Grada Izmira, Sarajevo, 12.07.2022.

U skladu sa odlukama koje je Gradsko vijeće Grada Sarajeva usvojilo tokom 2022. godine, potpisani su sljedeći memorandumi/sporazumi/deklaracije:

- Memorandum o saradnji između Grada Sarajeva i Grada Sofije, Sofija, 04.02.2022.
- Memorandum o saradnji između Grada Sarajeva i Svjetskog saveza dijaspore BiH, Sarajevo, 11.05.2022.
- Sporazum o bratimljenju između Grada Sarajeva i Glavnog grada Podgorice, Podgorica, 12.07.2022.
- Sporazum o bratimljenju između Grada Sarajeva i Grada Ljubljane, Sarajevo, 12.08.2022.
- Memorandum o saradnji između Grada Sarajeva, NVO „Naša perspektiva“ i Sarajevske regionalne razvojne agencije SERDA, Sarajevo, 07.10.2022.
- Deklaracija o pristupanju CIVITAS mreži evropskih gradova, Sarajevo, 26.07.2022.

Sporazumi koji nisu potpisani su sljedeći:

- Sporazum o bratimljenju između Grada Sarajeva i Grada Şanlıurfa, za čije potpisivanje je Gradsko vijeće Grada Sarajeva dalo saglasnost na 14. sjednici održanoj dana 04.04.2022. godine.
- U skladu sa Odlukom za potpisivanje Memoranduma o razumijevanju između Grada Sarajeva i Grada Rima, usvojenom na 19. sjednici održanoj dana 05.10.2022. godine, potpisivanje Memoranduma planirano je da se održi u Rimu 26.01.2023. godine.

Ostali dokumenti koji su potpisani u predmetnom periodu su:

- Deklaracija kojom se podstiče saradnja i mir među gradovima mediteranskih zemalja, Firenca, 25.02.2022.
- Deklaracija o međusobnom razumijevanju o podršci oporavku i održivom razvoju grada Kijeva i okolnih teritorija, Brisel, 28.11.2022.
- Sporazum o uspostavljanju prijateljskih odnosa između Kijeva i Sarajeva, Brisel, 28.11.2022.
- Pismo namjere o zajedničkoj saradnji Grada Sarajeva i Grada Skoplja na konkretnim projektima, Sarajevo, 10.12.2022.

Susreti sa čelnicima gradova regiona, Evrope i svijeta, ambasadorima, premijerima, državniciima:

Bosanskohercegovačka prijestolnica je kroz diplomatiju gradova postala poželjan i pouzdan partner i sagovornik, što potvrđuju i brojni kontakti s gradonačelnicima gradova Evrope i svijeta, ambasadorima, premijerima, državniciima.

Susreti sa čelnicima gradova regiona, Evrope i svijeta: U izvještajnom periodu ostvareni su kontakti i susreti sa preko 30 čelnika gradova regiona, Evrope i svijeta, među kojima su gradonačelnici: Amsterdama, Atine, Barcelone, Bavarskog općinskog vijeća Okruga Amberg-Sulzbach, Beča, Berna, Brisela, Cetinja, Dubrovnika, Firence, Istanbula, Izmir, Jeruzalema, Kijeva, Koprivnice, Ljubljane, New Yorka, Novog Pazara, Pariza, Podgorice, Prata, Pule, Rima, Sabadella, Şanlıurfe, Skoplja, Sofije, Splita, Trenta, Vukovara, Zagreba; zamjenici gradonačelnika Arezza i Podgorice, te predsjednici općina Bar i Kotor.

Saradnja s diplomatsko - konzularnim predstavništvima i misijama: Grad Sarajevo su posjetili ili je ostvaren kontakt sa diplomatsko-konzularnim predstavništvima sa sjedištem u i izvan BiH, među kojima su predstavnici ambasada: Sjedinjenih Američkih Država, Republike Slovenije, Narodne Republike Kine, Ukrajine, Češke Republike, Republike Bugarske, Kraljevine Španije, Republike Sjeverne Makedonije, Republike Francuske, Kanade, Irske, Kraljevine Danske, Republike Indonezije, Republike Armenije, Japana, Republike Austrije, Arapske Republike Egipat, Savezne Republike Njemačke; te međunarodne organizacije i specijalne misije u BiH: OHR, EUFOR, NATO, OSCE, UN u BiH.

Grad Sarajevo su posjetili brojni visoki zvaničnici i državnici iz Evrope i svijeta, među kojima su: Annalena Baerbock, ministrica vanjskih poslova SR Njemačke; Lars Rasmussen, zastupnik u Parlamentu Kraljevine Danske i predsjedavajući Parlamentarne skupštine Vijeća Evrope; Nadbiskup Paul Richard Gallagher, sekretar za odnose s državama pri Državnom tajništvu Svete Stolice; Robert Spano, predsjednik Evropskog suda za ljudska prava; Ann Linde, ministrica vanjskih poslova Kraljevine Švedske; Jeppe Kofod, ministar vanjskih poslova Kraljevine Danske; Charles Michel, predsjednik Evropskog vijeća; Liz Truss, ministrica vanjskih poslova Velike

Britanije; Nikos Dendias, ministar vanjskih poslova Grčke; Victoria Alsina, ministrica vanjskih poslova i otvorene uprave Vlade Katalonije; Alma Zadić, ministrica pravde Republike Austrije; Adis Ahmetović, zastupnik u Bundestagu; Klara Andrić, poslanica Parlamenta Zapadne Australije; Pedro Sánchez, predsjednik Vlade Kraljevine Španije; Joachim Herrmann, ministar unutrašnjih poslova njemačke savezne države Bavarske; Ursula von der Leyen, predsjednica Evropske komisije; Karolina Edtstadler, savezna ministrica Republike Austrije za EU i ustavna pitanja; Stuart Peach, posebni izaslanik britanskog premijera za Zapadni Balkan; Anžej Frangeš specijalni izaslanik Vlade Slovenije za Zapadni Balkan.

Grad Sarajevo je učestvovao u međunarodnim skupovima od kojih izdvajamo sljedeće:

- Konferencija o važnosti EU u izgradnji prosperitetne budućnosti, Sarajevo
- Konferencija gradonačelnika mediteranskih gradova, Firenca
- Forum „Žene u vladi“, Dubai, UAE
- Online konferencija „Padova zove Sarajevo“
- Konferencija „Gradovi budućnosti: inovativni, sigurni i održivi“, Solun
- Online sastanak sa Nacionalnom asocijacijom talijanskih općina (ANCI)
- Online Konferencija „Mediteran: more mira“
- Nedjelja transporta i klimatskih promjena 2022, Berlin
- Seminar evropskih mladih lidera, Zagreb
- Evropska manifestacija „Socijalna medijacija kao faktor zajedničkog života u miru“, Saint-Denis
- Forum United Global SDG Index Institute UNGSII SDG Lab, Davos
- Konferencija „Urban Green“, Sofija
- 25. Evroazijski ekonomski samit, Istanbul
- Svjetski biciklistički samit Velo-city 2022, Ljubljana
- UN Habitat – Svjetski urbani forum, Katowice
- 6. Bloomberg Harvard City Leadership Program, New York
- Konferencija „Rješenja pametnih gradova: rizici i prilike za Zapadni Balkan“, Tirana
- 12. Ljubljana forum, Ljubljana
- Prvi sastanak Mreže gradova „Evropska prijestolnica demokratije“, Beč
- 7. Kijevski investicijski forum 2022, Brisel
- Međunarodni susret Francuska – Balkan, Dižon
- Konferencija MuniWorld 2022, Jerusalem i Tel Aviv

Učešće u okviru međunarodnih asocijacija čiji je Grad Sarajevo član:

- Sastanak B40 Mreže balkanskih gradova, Sarajevo
- Drugi online sastanak Upravnog odbora Evropskog ogranka „Gradonačelnici za mir“
- Online 10. Generalna konferencija „Gradonačelnici za mir“
- Samit pametnih gradova i sporta, organizaciji Svjetske unije olimpijskih gradova (UMVO), Lozana
- 18. Generalna skupština i godišnji seminar Mreže mediteranskih gradova (MedCities), Larnaka

Od najznačajnijih aktivnosti iz oblasti međunarodne saradnje izdvajamo sljedeće:

- Porodici pobratimskih gradova Grada Sarajeva pridružili su se Izmir, Podgorica i Ljubljana, a prijateljskih Sofija i Kijev.

- Grad Sarajevo je izabran kao jedan od gradova koji će učestvovati u Misiji koju finansira EU za kreiranje 100 klimatski neutralnih i pametnih gradova do 2030. godine.
- Grad Sarajevo se zajedno sa gradovima iz 20 zemalja Evrope uključio u program „Evropska prijestolnica demokratije – European Capital of Democracy“.
- Grad Šanliurfa je poklonio Gradu Sarajevu dva jarbola visine 25 metara koji su sa zastavom Grada Sarajeva i zastavom zvanične maskote XIV Zimskih olimpijskih igara „Vučkom“ postavljeni na lokaciji kod stadiona Koševo u Sarajevu.
- Gradovi Sarajevo i Sofija su se složili da kroz zajedničke inicijative i projekte uspostave bliske kontakte u oblasti kulture, turizma, zaštite okoliša i inovacija, te u oblasti sporta uz mogućnost da djeca iz Sarajeva koja se bave plivanjem treniraju u Sofiji koja ima termalni bazen.
- Gradovi Sarajevo i Sofija su se složili da kao članovi Mreže kreativnih gradova UNESCO-a, iskoriste mogućnost umrežavanja institucija kulture, organiziraju gostovanja umjetnika i učestvuju u kulturnim manifestacijama, kao što su Sarajevo Film Festival i Sofijski Film Festival.
- U okviru Konferencije o važnosti EU u izgradnji prosperitetne budućnosti, održane u Sarajevu 26. januara, učestvovali su učenici Druge gimnazije Sarajevo i učenici Maris College u Hagu. Debata pod sloganom „Naša zajednička budućnost“ imala je za rezultat uspostavljanje trajne saradnje između pomenute dvije srednjoškolske ustanove.
- Posredstvom Grada Sarajeva i Grada Magdeburga, uspostavljen je kontakt između Evangelističke škole iz Magdeburga i sarajevske Srednje škole poljoprivrede, prehrane, veterine i uslužnih djelatnosti i Srednje medicinske škole Jezero, te je 27. juna održan prvi zoom sastanak na kojem je razgovarano o uspostavljanju saradnje.
- U skladu sa dogovorom gradonačelnika Sarajeva i Kotora, maturantkinje i maturanti sarajevske Srednje škole za stručno obrazovanje i radno osposobljavanje boravili su u Kotoru od 30. juna do 4. jula, te prisustvovali 30. Kotorskom festivalu pozorišta za djecu. Direktori Resursnog centra za sluh i govor „Dr. Peruta Ivanović“ i sarajevske Škole za srednje stručno obrazovanje i radno osposobljavanje potpisali su Memorandum o saradnji između ove dvije institucije.
- Grad Sarajevo i Općina Kotor dogovorili su da nekoliko učenika Škole za osnovno i srednje muzičko obrazovanje „Vida Matjan“ iz Kotora provede nekoliko dana u Sarajevu tokom 2023. godine, kako bi prisustvovali pripremi i izvedbi neke od operskih predstava u Narodnom pozorištu Sarajevo i uspostavili saradnju sa Srednjom muzičkom školom u Sarajevu.
- U sklopu projekta „Jednako obrazovanje za sve“, Grad Sarajevo je uz podršku Ambasade Slovačke i SlovakAid, nabavio novu opremu za kineziološki i logopedski kabinet u Zavodu Mjedenica.
- Sa Gradom Bečom nastavljaju se aktivnosti na jačanju saradnje između naša dva grada sa ciljem poboljšanja kvaliteta života građana. Saradnja se odvija kroz projekte digitalne i energetske tranzicije, kao i u oblastima urbane mobilnosti, ekologije, vatrogastva i kulture.

- Gradovi Sarajevo i Podgorica dogovorili su održavanje manifestacija „Dani Sarajeva u Podgorici“ i „Dani Podgorice u Sarajevu“.
 - Uspostavljena je intenzivnija saradnja između Gradskog vijeća Grada Sarajeva i Skupštine Grada Zagreba.
 - Grad Sarajevo je 25. aprila bio domaćin prvog sastanka Mreže balkanskih gradova B40, kojim je predsjedavao gradonačelnik Istanbula Ekrem İmamoğlu, kojem je ova posjeta Sarajevu bila prva posjeta izvan Istanbula koju je učinio u svojstvu mandatnog predsjednika te Mreže.
 - Gradonačelnica Grada Sarajeva i predsjednik Svjetskog saveza dijaspore BiH, potpisali Memorandum o saradnji u Vijećnici 11. maja.
 - Katalonski Grad Sabadell upriličio je 16. juna obilježavanje 25. godišnjice saradnje Sarajeva i Sabadella.
 - U okviru kulturalne razmjene između BiH i Španije, umjetnici iz katalonskog grada Sabadella, u saradnji sa sarajevskim umjetnicima iz Udruženja „Obojena klapa“, oslikali su u naselju Koševsko brdo mural pod nazivom „Ruža Sarajeva“ 26. oktobra.
 - Bloomberg Harvard City Leadership Initiative izabrao je gradonačelnicu Grada Sarajeva Benjaminu Karić, da bude dio grupe od 40 gradonačelnika iz cijelog svijeta koji će učestvovati u prestižnom programu za lidere gradova na Harvardu.
 - Gradovi Sarajevo i Prato su dogovorili da se 2023. godine, u okviru programa obilježavanja 79. godišnjice oslobođenja Prata, grad Sarajevo predstavi izložbom slika na otvorenom, kojima bi privukli pažnju građana Prata i potakli ih da posjete i bolje upoznaju Sarajevo, njegove znamenitosti, kulturu i tradiciju.
- Grad Sarajevo je pozvan da se pridruži Gradu Pratu, njegovom pobratimskom Gradu Wangenu i još jednom poljskom gradu u evropskom projektu koji ima za cilj promociju njemačkog jezika kroz razmjenu i druženje 15-ak srednjoškolaca koji uče njemački jezik.
- U sklopu projekta „Škole izvan regija i granica“, čiji je inicijator talijanski Grad Trento i Univerzitet u Trentu, dogovoreno je uspostavljanje kontakata institucija kulture dva grada, u čijem posredovanju je učestvovao Grad Sarajevo, i to između:
 - a) Historijskog muzeja Trentina i Olimpijskog muzej Sarajevo;
 - b) Muzeja znanosti MUSE i Umjetničke galerije BiH u cilju razmjene dobrih praksi u području muzejske komunikacije;
 - c) Ureda za historijsku i umjetničku baštinu Autonomne pokrajine Trento i Historijskog muzeja BiH, sa ciljem restauracije velikog vitraža pod nazivom „Smrt fašizmu, sloboda narodu“, koji je 1966. godine izradio sarajevski umjetnik Vojo Dimitrijević. Sredstva za restauraciju će odobriti autonomna pokrajina Trento;
 - d) Religion Today Film Festivala i Sarajevo Film Festivala.
 - U okviru B40 Mreže balkanskih gradova, Grad Sarajevo je aktivno učestvovao u radu sve četiri radne grupe: Lokalna klimatska akcija, Lokalna demokratija i migracije, Pametni gradovi i digitalna transformacija i Lokalna ekonomska saradnja. Neke od aktivnosti čija će se realizacija nastaviti u 2023. godini su sljedeće:

- Grad Sarajevo se nalazi u tehničkoj fazi implementacije Platforme za plaćanje računa (Pay it forward) sa fokusom na penzionere, kao najranjiviju kategoriju stanovništva, sa tendencijom da se u kasnijim fazama proširi na druge ranjive kategorije stanovništva.
- Grad Sarajevo i Grad Pula organiziraju takmičenje za mlade u klimatskim promjenama sa namjerom da u ovu aktivnost uključe i Sekretarijat B40 Mreže balkanskih gradova.
- Promocija Dubrovačkog zimskog festivala, koji se u organizaciji Grada Dubrovnika, Dubrovačkih ljetnih igara i Turističke zajednice grada Dubrovnika održava devetu godinu zaredom, upriličena je 15. novembra u Hotelu Evropa u Sarajevu.
- Gradonačelnica Sarajeva je sa gradonačelnikom Rima dogovorila potpisivanje Sporazuma o saradnji u januaru 2023. godine, a sa gradonačelnicom Pariza njenu prvu zvaničnu posjetu Sarajevu u februaru 2023. godine.
- Inicirano je uspostavljanje saradnje sa gradovima: Arrezo, Bari, Bern, Cetinje, Dablin, Padova, Pariz.

Aktivnosti koje su Programom međunarodne saradnje bile planirane, a nisu realizirane, su sljedeće:

- Ceremonija sadnje drвета u Aleji sjećanja u Oswiecimu (Republika Poljska) otkazana zbog zabrane uvoza sadnice iz zemalja koje nisu u EU (Uredba EU 2016/2031).
- Obilježavanje 50. godišnjice pobratimskih odnosa između Grada Sarajeva i Grada Friedrichshafena odgođeno za 2023. godinu.
- Obilježavanje 45. godišnjice pobratimskih odnosa između Grada Sarajeva i Grada Magdeburga odgođeno za 2023. godinu.

➤ MEĐUNARODNA SARADNJA NA NIVOU GRADOVA

Obilježavanje Dana Grada Dubrovnika, 01. - 03.02.2022.

Na poziv gradonačelnika Grada Dubrovnika Mate Frankovića, gradonačelnica Grada Sarajeva Benjamina Karić, pomoćnica gradonačelnice za obrazovanje, kulturu, sport i mlade Amina Deljković i rukovodilac Stručne službe gradonačelnice Erna Čolić prisustvovala su obilježavanju Dana grada Dubrovnika koje je održano 02.02.2022. godine.

Ovim povodom, gradonačelnik Dubrovnika Mato Franković je sa saradnicima upriličio prijem delegacije Grada Sarajeva, kojoj je zahvalio što su svojim dolaskom uveličali jubilarnu 1050. Festu i Dan Grada, ističući značaj poštovanja zaštitnika Grada svetoga Vlaha za društveni i kulturni identitet Dubrovnika i njegovih građana.

Gradonačelnica Karić je čestitala praznik te istakla da je Povelja bosanskog bana Kulina iz 1189. i Povelja o prijateljskoj saradnji Sarajeva i Dubrovnika potpisana 2007. godine, potvrda povezanosti dva grada. Upoznala je svoje domaćine sa tokom pripreme za obilježavanje 6. aprila – Dana grada Sarajeva i 30 godina od početka opsade Sarajeva, te je gradonačelniku i delegaciji Dubrovnika uputila poziv u posjetu. Tokom prijema razgovaralo se i o planovima za razvoj međusobne saradnje u predstojećem periodu, posebno na polju turizma i kulture te su razmijenjena iskustva u upravljanju gradovima u vrijeme pandemije.

Službena posjeta Gradu Sofiji, 03. - 06.02.2022.

Na poziv gradonačelnice Grada Sofije Yordanke Fandakove, gradonačelnica Grada Sarajeva Benjamina Karić je sa pomoćnicom za obrazovanje, kulturu, sport i mlade Aminom Deljković, boravila u službenoj posjeti tom gradu u periodu od 03. do 06.02.2022. godine.

Tokom susreta gradonačelnice su potpisale „Memorandum o saradnji“ kojim će se gradovi Sarajevo i Sofija zalagati za jačanje prijateljstva i partnerstva na svim područjima od interesa za njihove građane.

Gradonačelnica Karić je izrazila uvjerenje da je potpisivanjem ovog Memoranduma postavljen snažan temelj za izgradnju kvalitetnih odnosa između dvije prijestolnice, te da će partnerstvo sa glavnim gradom Bugarske biti uspješno, jer je Sofija dobar primjer pozitivnih promjena posljednjih godina.

S obzirom da su gradovi Sarajevo i Sofija članovi Mreže kreativnih gradova UNESCO-a, razgovarano je o mogućnostima umrežavanja institucija kulture, gostovanja umjetnika i razmjene kulturnih manifestacija, pogotovo kad je riječ o renomiranim međunarodnim filmskim događajima Sarajevo Film Festivalu i Sofijskom filmskom festivalu, te o važnosti razmjene iskustava u vezi sa izazovima sa kojima se gradovi suočavaju, posebno u oblasti ekologije, upravljanja otpadom i transporta.

Sastanak s pročelnicom Odjela za kulturu i razvoj civilnog društva Grada Pule, 09.02.2022.

Povod održavanja online sastanka s pročelnicom Upravnog odjela za kulturu i razvoj civilnog društva Grada Pule Lenom Radunić i Ivom Ivančić iz Upravnog odjela za lokalnu samoupravu Grada Pule bilo je obilježavanje 10. godišnjice pobratimskih odnosa između Sarajeva i Pule. Ispred Grada Sarajeva u online sastanku održanom 09.02.2022. godine učestvovala je viša stručna saradnica za međunarodnu saradnju Nina Fućec.

Dogovoreno je da se u okviru obilježavanja 10. godišnjice pobratimskih odnosa Grada Sarajeva i Grada Pule organizira saradnja između udruženja likovnih umjetnika iz Pule i Sarajeva.

Službena posjeta Gradu Şanlıurfi (Turska), 13. - 16.02.2022.

Gradonačelnica Grada Sarajeva Benjamina Karić sa zamjenikom Harisom Bašićem, te gradskim vijećnicima Lajlom Ćosović i Bajrom Biberom, na poziv svog kolege Zeynela Abidina Beyazgüla, boravila je u turskom gradu Şanlıurfi, u periodu od 13. do 16.02.2022. godine.

Gradonačelnici su potpisali „Sporazum o zajedničkoj saradnji između Grada Şanlıurfia i Grada Sarajeva“ kojim je Grad Şanlıurfia izrazio spremnost da pokloni Gradu Sarajevu dva jarbola visine 25 metara (koji su sa zastavom Grada Sarajeva i zastavom zvanične maskote XIV Zimskih olimpijskih igara „Vučkom“ postavljeni na lokaciji kod stadiona Koševo u Sarajevu).

Gradonačelnica Karić se zahvalila na poklonu te je zajedno sa gradonačelnikom Beyazgülom ukazala na važnost razvijanja kulturnih, ekonomskih i drugih veza dva grada, u skladu sa tradicionalnim prijateljstvom naroda Republike Turske i BiH.

Izložba „Light & Shade“ u Zagrebu, 24.02.2022.

Zamjenica gradonačelnice Grada Sarajeva Anja Margetić prisustvovala je otvorenju izložbe fotografija posvećenih gradu Sarajevu „Sarajevo Light & Shade“, fotografa Anta Magzana. Izložba, koja je otvorena u zagrebačkoj Galeriji Kranjčar 24.02.2022., realizirana je pod pokroviteljstvom Ministarstva kulture i medija Republike Hrvatske i Grada Zagreba, te predstavlja nastavak umjetnikovih uspješnih ciklusa gradskih portreta kojima je prethodno ovjekovječio Sydney (2012., Galerija ULUPUH) i Barcelonu (2019., Galerija ULUPUH).

Službena posjeta Gradu Beču, 20. - 22.03.2022.

Gradonačelnica Grada Sarajeva Benjamina Karić, predsjedavajući Gradskog vijeća Grada Sarajeva Jasmin Ademović, zamjenik gradonačelnice Haris Bašić, te gradski vijećnici Nihad Uk i Danijela Šahat boravili su u službenoj posjeti Gradu Beču od 20. do 22.03.2022. godine.

Bilateralni sastanak sa guvernerom i gradonačelnikom Beča Michaelom Ludwigom, kojem je prisustvovao i ambasador BiH u Austriji Kemal Kozarić, održan je 21. marta. Bio je to prvi susret dva gradonačelnika koji su istakli vrlo uspješnu dosadašnju saradnju te razmotrili mogućnosti još jačeg razvijanja odnosa i proširenje oblasti zajedničkog djelovanja prijateljskih gradova Sarajeva i Beča. Razgovarano je i o projektima iz oblasti urbanog razvoja, ekologije i primjene pametnih tehnologija.

Gradonačelnica Karić pozvala je gradonačelnika Ludwiga da posjeti Sarajevo i obnovljeni arhitektonski dragulj – Bistričku stanicu, čije otvorenje je planirano 6. aprila, na Dan grada Sarajeva 2022. godine.

Tokom dvodnevne posjete, delegacija Grada Sarajeva susrela se i sa predsjednikom pokrajinskog parlamenta Ernst Wollerom, te članom gradske vlade koji vodi resor za finansije, privredu, rad, internacionalne odnose i javna preduzeća Peterom Hankeom. Tokom razgovora sa Hankeom, odlučeno je da se odnosi dva grada intenziviraju kroz projekte urbanog razvoja, ekologije, turizma i pametnih tehnologija. Gradonačelnica je naglasila da u kriznim vremenima kojima svjedočimo, Sarajevo želi usvojiti dobre bečke prakse i intenzivno raditi na jačanju međunarodne saradnje kao jednog od ključnih faktora razvoja.

Također, gradonačelnica se zahvalila na donaciji medicinske opreme koju je austrijska prijestolnica prije nekoliko dana poslala zdravstvenim ustanovama širom Bosne i Hercegovine.

Ovom je prilikom dogovorena i uzvratna posjeta Sarajevu tokom koje će u fokusu biti teme privrede, logistike, energije i okoliša. Istakavši kako se razvoj dešava u gradovima, te da je zbog toga važna redovna saradnja, Hanke je predložio konkretniju saradnju u oblasti javnih usluga.

Obilježavanje 6. aprila – Dana grada Sarajeva, 06.04.2022.

Obilježavanju 6. aprila – Dana grada Sarajeva, svečanom činu otvorenja obnovljene Bistričke stanice i svečanoj sjednici Gradskog vijeća Grada Sarajeva, prisustvovala su delegacije prijateljskih i bratskih gradova, i to: gradonačelnici Podgorice Ivan Vuković, Pule Filip Zoričić, Dubrovnika Mato Fanković, Sofije Yordanka Fandakova, pomoćnik gradonačelnika Novog Pazara Mirsad Jusufović, predsjednik Općine Bar Dušan Raičević, predsjedavajući Skupštine Grada Zagreba Joško Klisović, gradski vijećnik Grada Beča Omar Al Rawi, predsjednica Skupštine Općine Kotor Maja Maršulja, generalni sekretar Konye Ercan Uslu.

Na svečanoj sjednici održanoj povodom Dana grada, Gradsko vijeće Grada Sarajeva je posthumno proglasilo počasnim građaninom Jordija Pujol Puentea, katalonskog fotoreportera ubijenog 1992. tokom opsade Sarajeva.

Prijem gradonačelnice Sofije Yordanke Fandakove, Sarajevo, 07.04.2022.

Gradonačelnica Grada Sarajeva Benjamina Karić primila je 07.04.2022. gradonačelnicu Sofije Yordanku Fandakovu, koja je u Sarajevu boravila povodom obilježavanja Dana grada Sarajeva. U pratnji Fandakove bio je i otpravnik poslova u ambasadi Republike Bugarske Nikola Nikolov.

Tokom susreta razgovarano je o planovima za daljnji razvoj saradnje dva grada, funkcioniranju i upravljanju gradskim upravama. Istaknuto je da su nedavnim potpisivanjem sporazuma, administracije dva grada napravile iskorak ka budućim konkretnim ekonomskim i kulturnim vezama. Zaključeno je da preko zajedničkih inicijativa i projekata Sarajevo i Sofija mogu uspostaviti vrlo bliske kontakte u oblasti kulture, turizma, sporta, zaštite okoliša, te u okviru projekta Horizon 2020 (inovacije, smart city) gdje bi partneri bili Sarajevo, Sofija i Prag. Također, Sofija je spremna da podijeli svoja iskustva u prevenciji poplava, s obzirom da ima napredan dojavni sistem.

Budući da Sofija ima termalni bazen, gradonačelnica Fandakova je predložila da pozove djecu iz Sarajeva na turnir u plivanju.

Prijem delegacije Općine Kotor, Sarajevo, 07.04.2022.

Zamjenik gradonačelnice Grada Sarajeva Haris Bašić i pomoćnica gradonačelnice Amina Deljković primili su predsjednicu Skupštine Općine Kotor Maju Maršulju i sekretarku Skupštine Općine Snežanu Barbu, u Vijećnici 07.04.2022. godine.

Tokom susreta iskazan je obostrani interes za razmjenom iskustava i intenzivnijom saradnjom u oblasti kulture, turizma i sporta u vidu konkretnih projekata. Razgovarano je o detaljima ranijeg dogovora gradonačelnice Karić sa predsjednikom Općine Kotor Vladimirom Jokićem, koji će osigurati da dvadesetero djece sa poteškoćama u razvoju sarajevske JU Škola za srednje stručno obrazovanje i radno osposobljavanje, sa pratiocima, budu gosti 30. Kotorskog festivala pozorišta za djecu koji počinje 1. jula. Pored navedenog, dogovoreno je i da nekoliko učenika Škole za osnovno i srednje muzičko obrazovanje „Vida Matjan“ iz Kotora provede nekoliko dana u Sarajevu, kako bi prisustvovali pripremi i izvedbi neke od operских predstava u Narodnom pozorištu Sarajevo.

Prijem gradonačelnika Glavnog grada Podgorice Ivana Vukovića, Sarajevo, 07.04.2022.

Gradonačelnica Grada Sarajeva Benjamina Karić primila je 07.04.2022. gradonačelnika Glavnog grada Podgorice Ivana Vukovića, zamjenicu gradonačelnika Slađanu Vujačić, i savjetnika u Službi za međunarodnu saradnju Davorina Đurovića, koji su u Sarajevu boravili povodom obilježavanja 6. aprila – Dana grada Sarajeva.

U razgovoru sa gradonačelnikom Vukovićem, pokrenuta je inicijativa za bratimljenje dva grada, nakon čega bi uslijedilo održavanje manifestacija „Dani Sarajeva u Podgorici“ i „Dani Podgorice u Sarajevu“. Ovim sporazumom žele se definirati pravci u kojima će dva grada razvijati odnose i konkretne projekte sa naglaskom na oblastima u kojima se prepoznaje značajan ekonomski potencijal, ali i šansa za još jače zbližavanje dva grada i njihovih građana.

Sastanak sa predsjednikom Skupštine Grada Zagreba, Sarajevo, 07.04.2022.

Predsjedavajući Gradskog vijeća Grada Sarajeva Jasmin Ademović održao je 07.04.2022. sastanak sa predsjednikom Skupštine Grada Zagreba Joškom Klisovićem koji je zajedno sa brojnim gostima iz prijateljskih i bratskih gradova prisustvovao obilježavanju 6. aprila – Dana grada Sarajeva.

Dvojica čelnika zastupničkih tijela građana glavnih gradova razmijenili su informacije o aktuelnim dešavanjima u Zagrebu i Sarajevu. Razgovarano je o održavanju općih izbora u BiH te o realizaciji projekata u gradu Sarajevu, među kojima je i obnova olimpijskih borilišta i bob staze koja bi se trebala realizovati u okviru kandidature Grada Barcelone za zimske olimpijske igre 2030. godine, kada bi se dio takmičenja održao i na borilištima Sarajeva.

Klisović je projekat ocijenio iznimno važnim ne samo za Sarajevo, već i za cijelu BiH te izrazio uvjerenje da će Grad Zagreb podržati Sarajevo u planovima. Potom je naglasio i značaj Sarajevo Film Festivala koji ima evropsku vrijednost te izrazio uvjerenje da će Sarajevo nastaviti sa kontinuiranom podrškom i raspoloživim resursima ovoj manifestaciji koja je od regionalnog i evropskog značaja.

Iskazan je zajednički interes da se intenzivira saradnja dva grada na temelju Sporazuma o saradnji iz 2001. godine, uz prijedlog da se ubuduće, svake godine, preciziraju programi koje će gradovi realizovati za naredni budžetski period. Sagovornici su posebno naglasili potrebu uspostavljanja saradnje turističkih zajednica dva grada.

Prijem gradonačelnika Grada Istanbula Ekrema İmamoğlu, Sarajevo, 25.04.2022.

Delegacija Grada Istanbula, predvođena gradonačelnikom Ekremom Imamogluom, posjetila je Grad Sarajevo 25.04.2022. godine. Gradonačelnica Benjamina Karić je sa zamjenicima Harisom Bašićem i Anjom Margetić, te predsjedavajućim Gradskog vijeća Jasminom Ademovićem, upriličila prijem istanbulske delegacije u Vijećnici.

Gradonačelnica je zahvalila istanbulskom kolegi Imamogluu na posjeti koju je ocijenila izuzetno značajnom u datom trenutku za BiH i njen glavni grad, budući da Grad Istanbul podržava najveće vrijednosti, a to su mir i stabilnost. Istakla je da gradove Sarajevo i Istanbul povezuje zajednička historija, tradicionalno prijateljstvo i saradnja koja je rezultirala dogovorom o realizaciji konkretnih projekata. Zahvalila je Gradu Istanbulu na namjeri da pomogne rekonstrukciju Bijele tabije i na pomoći KJKP „Gras“, te je predstavila i aktuelne projekte Grada Sarajeva.

İmamoğlu je iskazao spremnost Grada Istanbula da pomogne da se u BiH osnaži mir i demokratija. Istakao je uvjerenje da će Sarajevo i Istanbul dodatno osnažiti svoje veze, te je naglasio odlučnost da se zajednički okonča projekat rekonstrukcije Bijele tabije, kao jedan od mnogih narednih projekata.

Gradonačelnik İmamoğlu je kazao da je ova posjeta Gradu Sarajevu prva posjeta izvan Istanbula koju je učinio u svojstvu mandatnog predsjednika Mreže balkanskih gradova B40, s ciljem da u bh. prijestolnici organizira sastanak sa predstavnicima bh. gradova koji su njeni članovi ili će to tek postati.

Naredni Samit Mreže balkanskih gradova B40 održat će se u Atini od 22. do 24.01.2023., a gradonačelnica je predložila da Grad Sarajevo poslije Atine bude sljedeći organizator Samita.

Projekcija filma „Bosnia Ekspres“, Rim, 27.04.2022.

Zamjenica gradonačelnice Grada Sarajeva Anja Margetić prisustvovala je projekciji filma „Bosnia Ekspres“ na poziv producenata filma Istituta Luce Cinecittà i Loups Garoux Produzioni srl i Grada Rima koji je jedan od pokrovitelja filma. Projekcija je održana u Rimu 27.04.2022. godine. Prije projekcije filma prisutnima su se obratili Miguel Gotor, pomoćnik za kulturu gradonačelnika Grada Rima i dogradonačelnica Margetić. Nakon projekcije uslijedila je diskusija na kojoj su režiser Marco D'orzi i prisutni predstavnici dva grada odgovarali na pitanja publike.

Obilježavanje 3. maja – Dan grada Vukovara, 02. - 03.05.2022.

Na poziv gradonačelnika Grada Vukovara Ivana Penave, gradska vijećnica Enisa Spahić prisustvovala je proslavi 3. maja – Dana grada Vukovara. Obilježavanje je započelo 2. maja obilaskom Vukovarskog vodotornja-simbola hrvatskog zajedništva. Nakon odavanja počasti poginulim, nestalim, ubijenim i umrlim hrvatskim braniteljima Vukovara u Domovinskom ratu, na Memorijalnom groblju žrtava iz Domovinskog rata, 3. maja je održana Svečana sjednica Gradskog vijeća Grada Vukovara.

Obilježavanje 5. maja – Dan oslobođenja i Dan grada Pule, 05.05.2022.

Na poziv gradonačelnika Grada Pule Filipa Zoričića, obilježavanju 5. maja – Dana oslobođenja i Dana grada Pule, prisustvovali su zamjenica gradonačelnice Anja Margetić i gradski vijećnik Adi Škaljić. Tokom boravka u Hrvatskoj, delegacija se sastala sa upraviteljem Zvezdarnice Višnjan u istarskom Tičanu Koradom Korlevićem i voditeljem Astronomskog centra Rijeka Andreom Cvitan, koji su im prezentirali rad i funkcioniranje navedenih objekata.

Prijem gradonačelnika Prijestolnice Cetinje Nikole Đuraškovića, Sarajevo, 11.05.2022.

Gradonačelnica Grada Sarajeva Benjamina Karić upriličila je 11.05.2022. godine prijem delegacije Prijestolnice Cetinje, predvođenu gradonačelnikom Nikolom Đuraškovićem. Tokom razgovora gradonačelnici su predstavili projekte i prioritete gradskih uprava, te su ocijenili da ovaj susret predstavlja početak buduće saradnje između naša dva grada – nosioca poruke mira, posebno u oblasti turizma, kulture i zaštite kulturno-historijskog naslijeđa. Đurašković je pozdravio predstojeće bratimljene Sarajeva i Podgorice, koje će još više učvrstiti odnose između Crne Gore i BiH.

Susret gradonačelnika Sarajeva i Zagreba, Zagreb, 12.05.2022.

Gradonačelnica Grada Sarajeva Benjamina Karić sastala se sa gradonačelnikom Zagreba Tomislavom Tomaševićem u Zagrebu 12.05.2022. godine. Tokom susreta gradonačelnici su razgovarali o unaprjeđenju dosadašnje uspješne saradnje i jačanju prijateljskih veza između Sarajeva i Zagreba. Gradonačelnica Karić je čestitala gradu Zagrebu na izboru u porodicu 100 klimatski neutralnih gradova, čime je potvrđen njegov status moderne i budućnosti okrenute prijestolnice, dok je Sarajevo postalo pridruženi član te velike i napredne porodice.

Prijem zamjenice gradonačelnika Grada Arezza, Sarajevo, 22.05.2022.

Gradonačelnica Grada Sarajeva Benjamina Karić sa dogradonačelnicom Margetić primila je 22.05.2022. godine zamjenicu gradonačelnika toskanskog grada Arezza Luciu Tanti koja je došla u pratnji ambasadora Republike Italije u BiH Marca Di Ruzze. Povod posjete bilo je obilježavanje Dana Republike Italije, 2. juna.

Ocijenjeno je da ovaj susret predstavlja početak dobre saradnje između dva grada, naročito u oblasti kulture, sporta i mladih, te da će zasigurno doprinijeti jačanju tradicionalnog prijateljstva između naše dvije zemlje koje njeguju izrazito bliske kulturno-historijske veze.

Govoreći o susretu koji je imala sa predsjednikom Republike Francuske Emmanuelom Macronom u Parizu u novembru 2021. godine, koji je predložio uspostavljanje saradnje između gradova BiH, Francuske i Italije potpisivanjem sporazuma, gradonačelnica Karić je predložila da potpisnici tog sporazuma budu i Arezzo i Cannes.

U okviru obilježavanja Dana Republike Italije, održana je manifestacija „Barjaktari iz Arezza u Sarajevu” na trgu kod Vijećnice, kojoj su se pridružili gradonačelnica Sarajeva, zamjenica gradonačelnika Arezza i ambasador Italije, koji su se prisutnima obratili prikladnim govorom. Građani Sarajeva i brojni turisti imali su priliku pogledati nastup 28 barjaktara koji su, baštineći tradiciju renesansnih barjaktara, poznati u cijelom svijetu nudeći predstave koje integriraju atletske, koreografske, ritmičke i muzičke komponente.

Službena posjeta Gradu Barceloni, 23. - 25.05.2022.

Delegacija Grada Sarajeva koju su činili gradonačelnica Benjamina Karić, njena zamjenica Anja Margetić, predsjedavajući Gradskog vijeća Jasmin Ademović, te gradski vijećnici Biljana Lazarević i Vedran Dodik, boravili su u službenoj posjeti pobratimskom Gradu Barceloni od 23. do 25.05.2022. godine.

Nastavak kvalitetne bilateralne saradnje potvrđen je srdačnim susretom sa gradonačelnicom Adom Colau. U fokusu razgovora bila je zajednička kandidatura Sarajeva i Barcelone za Zimske olimpijske igre 2030, te veoma dobra saradnja sa Ambasadorom Španije i Olimpijskim komitetom BiH.

Na temu kulture, poduzetništva, ali i aktivnog učešća žena u sportu, upriličeni su sastanci sa direktoricom Instituta za sport Barcelone Susanom Closa, izvršnom direktoricom poduzetništva Barcelona Activa Montse Basorom, direktoricom Instituta za kulturu Barcelone (ICUB) Martom Clari, te direktoricom za inovacije, znanje i vizualne umjetnosti Instituta Evom Sòria.

Prijem predstavnika Privredne komore Istanbula u Vijećnici, 02.06.2022.

Gradonačelnica Grada Sarajeva Benjamina Karić ugostila je 02.06.2022. godine predstavnike Privredne komore Istanbula u Vijećnici. Tokom susreta razgovarano je o aktivnostima i podršci koju Komora pruža u povezivanju turskih i bh. privrednika. Gradonačelnica je izjavila da je tijesna povezanost BiH i Turske razlog još većeg ulaganja u snažne odnose koji proizlaze još iz prošlosti.

25. godišnjica saradnje Sarajeva i Sabadella, Sabadell, 16. - 17.06.2022.

Na poziv gradonačelnice katalonskog Grada Sabadella, zamjenica gradonačelnice Sarajeva Anja Margetić učestvovala je u obilježavanju 25. godišnjice saradnje Sarajeva i Sabadella koje je održano u tom gradu 16.06.2022. godine.

Program obilježavanja ove značajne godišnjice, imao je za cilj isticanje institucionalne saradnje dva grada i primjer suživota između dvije kulture. U okviru teme „Duh Sarajeva: putovanje u prošlost“, sudionici su se prisjetili akcije kada je 60 ljudi iz Sabadella otputovalo u Sarajevo 1997. kako bi pomogli obnovu grada nakon rata. Sabadell je preuzeo popravak vodovodnih cijevi, nabavu

hirurškog bloka, donaciju autobusa i rekonstrukciju Kamernog teatra. Sudionici tog putovanja i sadašnji politički predstavnici govorili su o prošlosti, sadašnjosti i budućnosti ovog prijateljstva koje je nastalo nakon rata u BiH i počelo se provoditi dvije godine kasnije.

Prikazan je komemorativni video o počecima saradnje između dva grada, dok su se u okviru teme „Pogled u sadašnjost“ prigodnim govorom obratile zamjenica gradonačelnice Sarajeva Margetić i gradonačelnica Sabadella Marta Farrés, koja je podsjetila i na ratna dešavanja u Ukrajini.

Događaj je završio „Odom radosti“, te prezentacijom crteža „Ruža Sarajeva“, kao simbola otpora, koju je naslikao umjetnik Ramon Werens Puig.

U saradnji sa sarajevskim umjetnicima iz Udruženja „Obojena klapa“, španski umjetnici Ramon Werens Puig i Johnathan Fullet Parralejo oslikali su u naselju Koševsko brdo 26.10.2022., mural pod nazivom „Ruža Sarajeva“. Ovaj mural je oslikan u okviru pratećeg programa drugog izdanja Fasada Festivala, a nastao je zahvaljujući inicijativi i podršci Grada Sabadella i Ambasade Kraljevine Španije, te predstavlja nastavak kulturalne razmjene između BiH i Španije.

Prijem vijećnika Grada Daytona Matt Josepha, Sarajevo, 21.06.2022.

Gradonačelnica Grada Sarajeva Benjamina Karić primila je 21.06.2022. Matt Josepha, vijećnika Grada Daytona zaduženog za saradnju sa Sarajevom. Tokom susreta razgovarano je o društveno-političkoj i ekonomskoj situaciji u BiH, projektima i prioritetima Grada Sarajeva, o nastavku programa razmjene srednjoškolaca i intenziviranju pobratimskih veza u oblasti privrednog i kulturnog života dva grada. Sagovornici su se složili da se to posebno odnosi na saradnju umjetnika iz Daytona sa Galerijom Collegium Artisticum.

Gradonačelnica je zatražila podršku Grada Daytona u očuvanju mira i stabilnosti u BiH, kao i u procesu integracije BiH u EU.

Vijećnik Joseph je gradonačelnici uputio poziv da posjeti Dayton i sastane se sa novoizabranim gradonačelnikom Jeffrey J. Mimsom, Jr. koji je na funkciju stupio u januaru 2022. godine.

Uspostavljanje saradnje između srednjih škola Sarajeva i Magdeburga, 27.06.2022.

Posredstvom Grada Sarajeva i Grada Magdeburga, uspostavljen je kontakt između Evangelističke škole iz Magdeburga i sarajevske Srednje škole poljoprivrede, prehrane, veterine i uslužnih djelatnosti i Srednje medicinske škole Jezero, te je 27.06.2022. godine održan prvi zoom sastanak na kojem su iskazane želje za uspostavljanje zajedničke saradnje.

Podrška gradonačelniku Konye za kandidaturu za predsjednika UCLG-a, 29.06.2022.

Gradonačelnik Metropolitanske općine Konya Uğur İbrahim Altay kandidovat će se za predsjednika Ujedinjenih gradova i lokalne samouprave (UCLG), krovne organizacije pod kojom gradovi i lokalne samouprave zajedno rade na jačanju odnosa sa zajedničkim ciljevima. S tim u vezi, gradonačelnica Sarajeva Benjamina Karić je potpisala pismo podrške 29.06.2022. godine.

30. Kotorski festival pozorišta za djecu, Kotor, 30.06. - 03.07.2022.

Gradonačelnici Sarajeva i Kotora, Benjamina Karić i Vladimir Jokić, prilikom susreta u Istanbulu u decembru 2021. godine, dogovorili su saradnju između dva grada koja bi započela razmjenom učenika. Slijedom toga, maturantkinje i maturanti sarajevske Srednje škole za stručno obrazovanje i radno osposobljavanje boravili su u Kotoru od 30.06. do 04.07.2022. kako bi prisustvovali 30.

Kotorskom festivalu pozorišta za djecu. U njihovoj pratnji bili su gradski vijećnik Vedad Deljković i direktorica škole Inga Bišćević.

Učenici sarajevske škole, kao gosti Festivala, imali su priliku da se upoznaju sa znamenitostima grada, pogledaju predstave, učestvuju u festivalskim radionicama, druže se, sklope nova poznanstva i ponesu lijepe uspomene. Učenici su 1. jula predstavili izložbu na otvorenom „Crtam ti priču“, dočaravajući svoje najiskrenije i najdublje emocije i svakodnevne doživljaje iz svog okruženja. Na otvorenju izložbe prisutnima su se obratili predsjednik Općine Kotor, a u ime gradonačelnice Sarajeva prisutnima se obratila direktorica Škole za srednje stručno obrazovanje i radno osposobljavanje Inga Bišćević.

Direktori Resursnog centra za sluh i govor „Dr. Peruta Ivanović“ i sarajevske Škole za srednje stručno obrazovanje i radno osposobljavanje potpisali su 2. jula Memorandum o saradnji između ove dvije institucije. Razmjena iskustava kako između stručnog kadra tako i između polaznika škola, doprinijet će podizanju nivoa rada obje institucije. Potpisivanje Memoranduma o saradnji dvije škole i dogovoreni konkretni vidovi saradnje, još su jedan garant uspjeha i nastavka ovog projekta.

Službena posjeta delegacije Grada Beča, Sarajevo, 07.07.2022.

Delegacija Grada Beča predvođena članom Vlade za resore finansija, privrede, rada, međunarodnih odnosa i komunalnih preduzeća Peter Hankeom, boravila je u Sarajevu od 07. do 08.07.2022. Njihov domaćin u Vijećnici je bila gradonačelnica Benjamina Karić sa zamjenikom Harisom Bašićem, predsjedavajućim Gradskog vijeća Jasminom Ademovićem i zamjenicom predsjedavajućeg Mirelom Džehverović.

Tokom susreta razgovarano je o saradnji između Beča i Sarajeva i dugoročnoj viziji Sarajeva kao moderne, evropske metropole, urbanoj mobilnosti, temama koje se tiču primjene „smart city“ strategije po uzoru na, između ostalih, austrijsku prijestolnicu koja je ponovo proglašena najboljim mjestom za život. Dogovoreno je da se saradnja nastavi na način da se formiraju radne grupe po oblastima, kako bi se što efikasnije definirala zajednička saradnja na projektima i dalje radilo na njihovoj realizaciji.

Gradonačelnica Karić je predstavila aktuelne projekte Grada, a obzirom da je jedini Sporazum između Sarajeva i Beča bio potpisan 1998. godine i vrijedio je samo za tu godinu, gradonačelnica je predložila da dva grada obnove sporazum o saradnji, sa fokusom na odgovorno upravljanje gradovima.

Predsjedavajući Ademović je govorio o postizanju ciljeva održivog razvoja (SDG), te ukratko predstavio aktuelne projekte grada za čiju realizaciju bi podrška Grada Beča bila od izuzetnog značaja.

Sagovornici su se podsjetili na susret u Beču u martu 2022. godine, kada su u fokusu njihovog razgovora bile upravo teme privrede, logistike, energije i okoliša.

Svečano otvorenje 73. Dubrovačkih ljetnih igara, 09. - 11.07.2022.

Na poziv gradonačelnika Grada Dubrovnika, zamjenica predsjedavajućeg Gradskog vijeća Grada Sarajeva Mirela Džehverović i gradski vijećnik Toni Vukadin boravili su u tom gradu u periodu od 09. do 11.07.2022. godine, povodom prisustva ceremoniji otvaranja 73. Dubrovačkih ljetnih igara.

Tokom boravka, delegacija Grada Sarajeva je 11. jula imala bilateralni susret sa gradonačelnikom Dubrovnika Matom Frankovićem i pročelnicom Upravnog odjela za poslove gradonačelnika Ivanom Brnin, nakon kojeg je prisustvovala tradicionalnom Mimohodu sjećanja koji je povodom obilježavanja 27. godišnjice genocida u Srebrenici organiziralo Vijeće bošnjačke nacionalne manjine Dubrovačko-neretvanske županije i Vijeće bošnjačke nacionalne manjine Grada Dubrovnika.

Potpisan Sporazum o bratimljenju između Sarajeva i Izmir, Sarajevo, 12.07.2022.

Gradonačelnica Grada Sarajeva Benjamina Karić i gradonačelnik Izmir Tunç Soyer potpisali su Sporazum o bratimljenju dva grada, u Vijećnici 12.07.2022. Činu potpisivanja prisustvovali su predsjedavajući Gradskog vijeća Grada Sarajeva Jasmin Ademović i gradski vijećnik Alem Logo.

Gradonačelnica je izrazila zadovoljstvo što se porodici pobratimskih gradova Sarajeva priključio turski grad Izmir. Istakla je da Sporazum predstavlja pečat dosadašnjim uspješnim i jakim vezama između naša dva grada, da se otvara novo poglavlje prijateljstva i međusobne saradnje.

Gradonačelnik Izmir Soyer, koji je predvodio višečlanu delegaciju, istakao je da je Izmir pobratim sa 24 grada, ali da veze sa Sarajevom predstavljaju veliku dragocjenost, te da će ovim sporazumom Izmir i Sarajevo osnažiti i unaprijediti saradnju kroz konkretne projekte, prije svega u oblasti turizma, obrazovanja i sporta. Poručio je da će u cilju uvezivanja poslovnih ljudi Izmir i Sarajeva, uskoro organizirati uzajamne posjete turističkih agencija i operatera.

Inicijativa za bratimljenje Sarajeva i Izmir nastala je prilikom posjete delegacije Grada Sarajeva Gradu Izmiru u septembru 2021. godine, nakon čega su je podržala gradska vijeća oba grada.

Potpisan Sporazum o bratimljenju između Sarajeva i Podgorice, Podgorica, 12.07.2022.

Na temelju prijateljskih odnosa Sarajeva i Podgorice, a u želji da se postojeći nivo saradnje unaprijedi, gradonačelnici Benjamina Karić i Ivan Vuković, potpisali su Sporazum o bratimljenju između glavnih gradova BiH i Crne Gore, u Podgorici 12.07.2022. godine. Ceremoniji potpisivanja prisustvovali su zamjenica predsjedavajućeg Gradskog vijeća Grada Sarajeva Mirela Džehverović i gradski vijećnik Alem Logo.

Prva zajednička aktivnost dva pobratimska grada bit će održavanje „Dana Sarajeva u Podgorici” i „Dana Podgorice u Sarajevu”, u sklopu kojih će biti predstavljeni kulturni, turistički i privredni potencijal bh. i crnogorske prijestolnice.

Svečano otvorenje 69. Pulskog filmskog festivala, Pula, 16.07.2022.

Na poziv Pula Film Festivala, zamjenica gradonačelnice Grada Sarajeva Anja Margetić prisustvovala je svečanom otvorenju 69. Pulskog filmskog festivala koji je održan 16.07.2022. godine. Pulski filmski festival, najdugovječnija hrvatska filmska manifestacija, donijela je bogat program domaćih i inozemnih produkcija, koji su svoju kvalitetu potvrdili brojnim nagradama na svjetskim filmskim festivalima, ekskluzivne premijere i poticajna druženja filmskih profesionalaca i zaljubljenika u filmsku umjetnost.

Otvorenje izložbe „Svjedok” umjetnika Adisa Lukača, Bursa, 19.07.2022.

U saradnji Međunarodne organizacije turkijske kulture (TURKSOY), Grada Burse i Grada Sarajeva, izložba „Svjedok“ umjetnika Adisa Lukača, otvorena je 19.07.2022. u umjetničkoj galeriji „Sefik Bursali“ u Bursi, kulturnoj prijestolnici turskog svijeta. Radi se o postavci slika, crteža i skulptura koja se temelji na temi genocida u Srebrenici te se fokusira na motiv zbjega kao fragment i simbol užasa i traume koju je proizveo i koju još proizvodi eho tog tragičnog događaja.

Svečanosti otvorenja izložbe prisustvovali su generalni sekretar TURKSOY-a Sultan Raev, ambasador BiH u Turskoj Adis Alagić, pomoćnica gradonačelnice Grada Sarajeva Amina Deljković, zastupnik u turskom parlamentu iz grada Bursa i predsjednik Međuparlamentarne grupe prijateljstva Turkiye i BiH Refik Ozen, zamjenik gradonačelnika Burse i brojni gosti.

Susret gradonačelnice Sarajeva sa gradonačelnikom New Yorka, SAD, 19.07.2022.

Prilikom boravka u New Yorku, povodom učestvovanja u 6. Bloomberg Harvard City Leadership programu kao jedan od 40 stipendista, gradonačelnica Grada Sarajeva Benjamina Karić se sastala sa gradonačelnikom New Yorka Ericom Adamsom 19.07.2022. godine.

Također, gradonačelnica Karić se sastala i sa predstavnicima Bošnjačko-američke nacionalne asocijacije i uspješnim ljudima bosanskohercegovačkog porijekla, sa kojima je razgovarala o viziji razvoja Sarajeva kao grada poslovanja, ugodnog boravka i življenja. Pri tome, izrazila je uvjerenje da BiH i njen glavni grad imaju perspektivnu budućnost, te da je potrebno uložiti zajednički napor do tog cilja.

Prijem gradonačelnika Berna Aleca von Graffenrieda, Sarajevo, 22.07.2022.

Gradonačelnica Grada Sarajeva Benjamina Karić sa zamjenicima Harisom Bašićem i Anjom Margetić primila je u Vijećnici 22.07.2022. gradonačelnika Berna Aleca von Graffenrieda, koji je glavni grad BiH posjetio u okviru posjete zemljama Zapadnog Balkana.

Karić je istakla da gradska administracija intenzivno radi na institucionalnom širenju međunarodnih veza, jačanju pozicije i prisutnosti u glavnim gradovima regiona, Evrope i svijeta. Razgovarano je o konkretiziranju saradnje i uspostavljanju bližih veza između naših gradova. Razmatrane su mogućnosti povezivanja u različitim oblastima, od ekonomije, infrastrukturnih projekata, do razvoja turizma i kulturne razmjene.

Gradonačelnik Berna je poručio da ima mnogo prostora za užu saradnju te naglasio da je Grad Bern spreman prenijeti svoja iskustva u oblasti komunalnih servisa, posebno kad je riječ o projektu „Čista rijeka Miljacka“.

Potpisan Sporazum o bratimljenju između Sarajeva i Ljubljane, Sarajevo, 12.08.2022.

Gradonačelnica Grada Sarajeva Benjamina Karić i gradonačelnik Grada Ljubljane Zoran Janković, ozvaničili su tradicionalno dobru saradnju bh. i slovenske prijestolnice potpisivanjem Sporazuma o bratimljenju, u Vijećnici 12.08.2022. godine.

Tom prilikom, gradonačelnica Karić je istakla da je ovim činom ozvaničena dosadašnja uspješna saradnja i najavljena inspirativnija i kvalitetnija saradnja naročito u oblasti ekonomije, kulture i sporta, te da su stvoreni preduslovi za realizaciju konkretnih zajedničkih projekata u budućnosti.

Potpisivanju i prijemu prisustvovali su zamjenica gradonačelnice Anja Margetić, predsjedavajući Gradskog vijeća Jasmin Ademović, te gradski vijećnik Nihad Uk.

Bilateralni susreti sa gradonačelnicima Splita, Podgorice i Novog Pazara, 13.08.2022.

Gradonačelnica Grada Sarajeva Benjamina Karić održala je u Vijećnici 13.08.2022. godine bilateralne susrete sa gradonačelnicima Splita, Podgorice i Novog Pazara – Ivicom Puljkom, Ivanom Vukovićem i Nihatom Biševcem, koji su u Sarajevu boravili povodom 28. Sarajevo Film Festivala.

Sastanak sa prof. Univerziteta u Trentu Giuseppe Zorziom 17.08. i službena posjeta Gradu Trentu, 20. - 23.10.2022.

Zamjenica gradonačelnice Grada Sarajeva Anja Margetić ugostila je profesora sa Univerziteta u Trentu Giuseppe Zorzia i Prvog sekretara Ambasade Italije Lorenzo Donatellia u svom kabinetu 17.08.2022. godine.

Tokom sastanka prof. Zorzi je govorio o uspješnoj saradnji sa učenicima i profesorima sarajevske Prve gimnazije, te je razgovarano o projektu „Škole izvan regija i granica”, koji organizira pomenuti Univerzitet i talijanska autonomna pokrajina Trento. Projekat, koji će trajati do 2023. godine, uvezuje učenike srednjih škola iz Evrope te njihove profesore s ciljem razmjene znanja i najboljih praksi u oblasti aktivnog građanstva. Na ovaj ih se način potiče da postanu aktivni nosioci promjena u svojim zajednicama i širem društvu, a dolaze iz sedam različitih zemalja: BiH, Austrije, Njemačke, Italije, Irske, Španije i Francuske.

U sklopu projekta „Škole izvan regija i granica“, koji promiče mobilnost i međusobno upoznavanje učenika i profesora sedam različitih evropskih zemalja, s ciljem razmjene znanja i najboljih praksi u oblasti aktivnog građanstva, a na poziv Grada Trenta i Univerziteta u Trentu, zamjenica gradonačelnice Grada Sarajeva Anja Margetić boravila je u tom talijanskom gradu u periodu od 20. do 23.10.2022.

U okviru programa, održan je skup na kojem su se sastali gradonačelnik Trenta Franco Ianeselli i dogradonačelnica Margetić, te tom prilikom razgovarali o unaprjeđenju veza dva grada i međusobnoj podršci koja je započela u vrijeme opsade Sarajeva prije 30 godina. Složili su se da je ovo izuzetna prilika za izgradnju novih mostova saradnje, realizacijom zajedničkih projekata i manifestacija. Na skupu su učestvovali i koordinator projekta prof. Giuseppe Zorzi i Luigi Calzà, Marš mira 1992. godine u Sarajevu.

Margetić se sa ministricom za nauku, visoko obrazovanje i mlade KS Aleksandrom Nikolić susrela i sa rektorom Univerziteta Flavijom Deflorijanom. U fokusu njihovog susreta bilo je unaprjeđenje saradnje sarajevskog i Univerziteta u Trentu, te projekat „Škole izvan regija i granica”. U projekat je uključena sarajevska Prva gimnazija, čija saradnja sa Visokom naučnom školom Leonardo da Vinci iz Trenta, predstavlja izvanrednu vrijednost za izgradnju zajedničke budućnosti.

Također, održani su sastanci na kojima je dogovoreno uspostavljanje konkretne saradnje, i to: Historijskog muzeja Trentina sa Olimpijskim muzejom Sarajevo; Muzeja znanosti MUSE sa Umjetničkom galerijom BiH u cilju razmjene dobrih praksi u području muzejske komunikacije; Ureda za historijsku i umjetničku baštinu Autonomne pokrajine Trento sa Historijskim muzejom BiH, sa ciljem restauracije velikog vitraža pod nazivom „Smrt fašizmu, sloboda narodu“, koji je 1966. izradio sarajevski umjetnik Vojo Dimitrijević (sredstva za restauraciju će odobriti autonomna

pokrajina Trento) i Religion Today Film Festivala sa Sarajevo Film Festivalom. Grad Sarajevo je posredovao u uspostavljanju kontakata između navedenih institucija kulture.

Obilježavanje 78. godišnjice oslobođenja Prata, Prato, 06. - 09.09.2022.

Delegacija Sarajeva koju su činili zamjenica gradonačelnice Anja Margetić i gradski vijećnici Srđan Srdić, Samir Bejić i Muamer Mekić, boravila je u talijanskom gradu Pratu od 06. do 09.09.2022., povodom obilježavanja 78. godišnjice oslobođenja Prata i godišnje historijske parade „Corteggio Storico 2022“.

Tokom susreta delegacije Grada Sarajeva sa gradonačelnikom Prata Matteom Biffonijem i zamjenikom gradonačelnika za pobratimske gradove i turizam Gabrieleom Bosijem, iskazana je obostrana želja za jačanjem saradnje između dvaju gradova koji su pobratimi već 25 godina. Sagovornici su izrazili spremnost za zajedničku saradnju naročito u oblastima kulture i sporta, a govoreći o novim zajedničkim projektima i idejama, složili su se da se 2023. godine, u okviru programa obilježavanja 79. godišnjice oslobođenja Prata, grad Sarajevo predstavi izložbom slika na otvorenom, kojima bi privukli pažnju građana Prata i potakli ih da posjete i bolje upoznaju Sarajevo, njegove znamenitosti, kuturu i tradiciju.

Također, predloženo je da se u okviru tog programa, Grad Sarajevo pridruži Gradu Pratu, njegovom pobratimskom Gradu Wangenu i još jednom poljskom gradu, u evropskom projektu koji ima za cilj promociju njemačkog jezika kroz razmjenu i druženje 15-ak srednjoškolaca koji uče njemački jezik.

Dogradonačelnica Margetić je zahvalila građanima i Gradu Pratu na humanitarnoj pomoći koju su pružili Sarajevu tokom opsade, kao i na podršci projektu Ars Aevi.

Prijem gradonačelnika Bavarskog općinskog vijeća Okruga Amberg-Sulzbach, 19.09.2022.

Gradonačelnica Grada Sarajeva Benjamina Karić primila je delegaciju Bavarskog općinskog vijeća Okruga Amberg-Sulzbach (krovna organizacija koja obuhvata 2031 bavarski grad i općine) u Vijećnici 19.09.2022. godine. Delegaciju, koja se sastojala od 24 gradonačelnika i drugih predstavnika gradskih uprava, predvodio je predsjednik Peter Braun. Posjeta Gradu Sarajevu bila je dio informativnog putovanja u BiH.

Gradonačelnica se zahvalila na interesu za Grad Sarajevo te upoznala delegaciju sa gradskim infrastrukturnim i razvojnim projektima. Istakla je važnost komunikacije među gradovima, te naglasila da je Njemačka svoje prijateljstvo prema našoj zemlji pokazala svojom svesrdnom pomoći tokom agresije, a pokazuje i danas podržavajući je na putu prema Evropskoj uniji.

Čestitka Gradu Izmiru, dobitniku „Evropske nagrade 2022“, 20.09.2022.

Parlamentarna skupština Vijeća Evrope odabrala je Grad Izmir za grad koji najbolje predstavlja evropske vrijednosti, te mu je dodijelila „Evropsku nagradu 2022“. Evropska nagrada, koja se dodjeljuje od 1955. godine, definirana je kao nagrada najvišeg nivoa koja ne samo da je najvažnije sredstvo za razvoj odnosa među evropskim građanima, već i promovira evropske ideale. Povećava se međunarodna vidljivost nagrađivanih gradova i njihova komunikacija sa drugim gradovima.

Gradonačelnica Benjamina Karić uputila je čestitku gradonačelniku Soyeru koja je bila pročitana na zvaničnoj ceremoniji dodjele nagrada koja je održana u Izmiru 24.09.2022. godine.

Podrška kandidaturi Grada Istanbula za Svjetski i Evropski kongres pametnih prijevoznih sistema, 19.10.2022.

Gradonačelnica Grada Sarajeva Benjamina Karić uputila je 19.10.2022. godine pismo podrške Gradu Istanbulu za kandidaturu za Svjetski i Evropski kongres pametnih prijevoznih sistema „ITS European Congress 2025 & ITS World Congress 2027“. Grad Istanbul i ISBAK kompanija, koja je u vlasništvu Grada Istanbula, uputili su molbu gradovima članovima Mreže balkanskih gradova B40 da ih podrže u procesu kandidature za domaćine ova dva prestižna događaja. ITS Svjetski i evropski kongresi održavaju se svake godine i predstavljaju platformu za promociju rješenja i inicijativa iz oblasti ITS sistema.

Svečana sjednica Gradskog vijeća Grada Koprivnice, 04.11.2022.

Na poziv gradonačelnika Koprivnice Mišela Jakšića i predsjednika Gradskog vijeća Ivana Pala, svečanoj sjednici Gradskog vijeća Grada Koprivnice, koja je održana 4. novembra povodom obilježavanja Dan Grada Koprivnice, prisustvovali su zamjenik predsjedavajućeg Gradskog vijeća Grada Sarajeva Dragan Stevanović i zamjenica gradonačelnice Anja Margetić.

Susret gradonačelnika Sarajeva i Şanlıurfe, Sarajevo, 13. - 14.11.2022.

Gradonačelnica Grada Sarajeva Benjamina Karić bila je domaćin gradonačelniku Şanlıurfe Zeynelu Abidinu Beyazgülu koji je u Sarajevu boravio povodom učešća na konferenciji „Izgradnja gradova prilagođenih mladima u svijetu od 8 milijardi ljudi“. Konferenciju je organizirao Populacijski fond Ujedinjenih nacija (UNFPA).

Promocija Dubrovačkog zimskog festivala, Sarajevo, 15.11.2022.

Promocija Dubrovačkog zimskog festivala, koji se u organizaciji Grada Dubrovnika, Dubrovačkih ljetnih igara i Turističke zajednice grada Dubrovnika održava devetu godinu zaredom, upriličena je 15. novembra u Hotelu Evropa u Sarajevu.

Već tradicionalnoj promociji bogatog zimskog programa u Sarajevu, gradu prijatelju Dubrovnika, pored zamjenice gradonačelnice Anje Margetić prisustvovalo je četrdesetak predstavnika medija i agenata, koji su se upoznali s raznovrsnim kulturnim, glazbenim, zabavnim te gastronomskim programom Dubrovačkog zimskog festivala uz naglasak na vrhunac festivala, spektakularni doček Nove godine u Dubrovniku.

Prisutnima se obratila pročelnica Upravnog odjela za kulturu i baštinu Grada Dubrovnika Julijana Antić Brautović, a ispred Dubrovačkih ljetnih igara, prezentaciju Dubrovačkog zimskog festivala održala je Katija Krečak Jarović.

Službena posjeta gradonačelnice Skoplja Danele Arsovske, Sarajevo, 10. - 11.12.2022.

Na poziv gradonačelnice Grada Sarajeva Benjamine Karić, gradonačelnica Grada Skoplja Danela Arsovska sa delegacijom, boravila je u službenoj posjeti u Sarajevu od 10. do 11.12.2022. Tokom susreta u Vijećnici 11. decembra, Karić i Arsovska su razgovarale o unaprjeđenju pobratimskih veza ozvaničenih Sporazumom o bratimljenju iz 2017. godine, te su potpisale Pismo namjere o zajedničkoj saradnji na konkretnim projektima od obostranog interesa, u oblasti kulture, obrazovanja, privrede i slično.

Dogovoreno je da dva grada, u narednom periodu, putem nadležnih službi/odjeljenja pristupe razmjeni ideja o potencijalnim projektima i dinamici realizacije istih. Gradonačelnice su poručile da kosmopolitski i gradovi pobratimi, Sarajevo i Skopje, kreću zajedno ka mirnoj, boljoj i sretnijoj budućnosti Zapadnog Balkana i Evrope.

Obilježavanje 749. godišnjice smrti Mevlane Dželaludina Rumija, Konya, 13. - 16.12.2022.

Na poziv gradonačelnika Grada Konye Ugur Ibrahima Altaya, pomoćnica gradonačelnice za obrazovanje, kulturu, sport i mlade Amina Deljković prisustvovala je komemoraciji povodom 749. godišnjice smrti Mevlane Dželaludina Rumija, u periodu od 13. do 16.12.2022. U pratnji gđe Deljković bio je i šef Odjeljenja za protokolarne poslove Denis Kovačević.

Pismo zahvale predsjednici Evropske komisije i članovima Evropskog vijeća, 12.12.2022.

Povodom dobivanja statusa kandidata za članstvo BiH u EU, gradonačelnici Sarajeva, Banja Luke i Mostara, Benamina Karić, Draško Stanivuković i Mario Kordić, uputili su pismo predsjednici Evropske komisije Ursuli von der Leyen i svim članovima Evropskog vijeća, sa porukom o zajedničkoj opredijeljenosti evropskoj perspektivi, stabilnosti, ekonomskom razvoju i vladavini prava. Gradonačelnici su također izrazili zahvalnost EU za posvećenost BiH i njenoj evropskoj perspektivi.

➤ MEĐUNARODNI SKUPOVI

Forum o saradnji prijateljskih gradova za zajednički razvoj, 14.01.2022.

Zamjenica gradonačelnice Grada Sarajeva Anja Margetić prisustvovala je online „Forumu o saradnji prijateljskih gradova za zajednički razvoj“ koji je uoči Zimskih olimpijskih igara i Zimskih paraolimpijskih igara 2022. u Pekingu, u organizaciji Grada Pekinga, Kineskog udruženja za prijateljstvo sa stranim zemljama i Narodne vlade provincije Hebei, održan 14.01.2022. godine.

U pozdravnom obraćanju dogradonačelnica Margetić je istakla da je gradovima organizatorima olimpijskih igara zajedničko promoviranje olimpijskih vrijednosti i dobrobiti sporta, te univerzalnih vrijednosti olimpijskog duha, kao što su mir, prijateljstvo i zajedništvo. Istakla je da je aktuelna administracija Grada Sarajeva u čijoj je „ličnoj karti“ zapisano domaćinstvo dviju olimpijada, odlučna uvrstiti olimpijsko naslijeđe u urbanističku, turističku i sportsku strategiju razvoja bh. prijestolnice.

Učesnike Forumu je podsjetila na XIV ZOI 1984, kao jedan od najsvjetlijih trenutaka u historiji Sarajeva, te je govorila i o mogućnosti da se olimpijski plamen ponovo vrati u Sarajevo putem zajedničke kandidature za ZOI 2030 s Gradom Barcelonom, za što su podršku dali nacionalni olimpijski komiteti zemalja Srednje i Istočne Evrope: Slovenije, Albanije, Sjeverne Makedonije, Kosova, Poljske.

Online Okrugli stol na temu aktiviranja direktne avionske linije Bari – Sarajevo, 25.01.2022.

Talijanska Regija Apulija u saradnji sa Fondacijom „L'Isola che non c'e“ organizirala je 25.01.2022. godine okrugli stol u cilju nastavka verifikacije aktiviranja direktne avionske linije Bari - Sarajevo. Taj let bi povezao Sarajevo sa lučkim gradom Barijem; približio njihove historijske, kulturne i prirodne ljepote i znamenitosti; spojio privrednike, umjetnike, studente i građane.

Okrugli stol omogućio je online uključenje brojnih predstavnika političkog, privrednog, turističkog, univerzitetskog života dvaju gradova, regija i država, a događaju su prisustvovali i ambasador BiH u Italiji i ambasador Italije u BiH, predsjednik Regije Apulija i gradonačelnik Barija.

Učesnicima se obratila gradonačelnica Karić koja je istakla da je ova inicijativa potvrda vrijednosti Sarajeva, ali i prilika za još snažnije turističke i poslovne veze sa talijanskim gradovima, ovaj put sa Barijem, važnim privrednim, turističkim i univerzitetskim centrom južne Italije.

Partneri iz Barija, u svojim obraćanjima iskazali su spremnost da i na ovaj način uspostave direktan „most“ bliže saradnje i komunikacije sa zapadnim Balkanom i njegovim institucijama.

Inicijativu je pokrenuo talijanski novinar Franco Giuliano i njegova fondacije „L'isola che non c'è“ (Ostrvo koje ne postoji), koji je bio u BiH i Sarajevu za vrijeme rata i izvještavao sa ovih prostora, tako da je posebno emotivno vezan za naš grad.

Konferencija o važnosti EU u izgradnji prosperitetne budućnosti, Sarajevo, 26.01.2022.

Konferencija o važnosti EU u izgradnji prosperitetne budućnosti, u kojoj su učestvovali učenici Druge gimnazije Sarajevo i učenici Maris College u Hagu, održana je u Drugoj gimnaziji, u Kući znanja 26.01.2022. godine.

Događaju su prisustvovali ambasador Kraljevine Nizozemske u BiH Jan Waltmans i zamjenica gradonačelnice Grada Sarajeva Anja Margetić, dok su se video-linkom iz Nizozemske javili ambasador BiH u Kraljevini Nizozemskoj Almir Šahović i gradonačelnik Haga Jan van Zanen.

Konferencija je organizirana pod sloganom „Our common future“, gdje su sarajevski i haški srednjoškolci imali priliku da poslušaju predstavljanje ambasadora i gradonačelnika i zamjenice gradonačelnice ova dva grada te aktivno diskutiraju o njihovim ulogama i vizijama budućnosti ove dvije zemlje u EU. Pored toga, učenici su bili podijeljeni u nekoliko grupa i međusobno su se upoznavali i razmjenjivali znanja i utiske jedni o drugima nakon čega su ponovo diskutirali o budućnosti i perspektivama EU i mogućnostima zajedničke saradnje.

Na inicijativu Grada Haga, zaključci pomenute debate su uručeni Evropskoj komisiji kao dio zaključaka Debate o budućnosti Evrope koja se vodila širom Nizozemske u prvoj polovini 2022. godine. Debata je imala za rezultat i uspostavu trajne saradnje između pomenute dvije srednjoškolske ustanove.

Konferencija gradonačelnika mediteranskih gradova, Firenca, 24. - 27.02.2022.

Na poziv gradonačelnika Firence Daria Nardelle, gradonačelnica Grada Sarajeva Benjamina Karić je učestvovala u radu Međunarodne konferencije gradonačelnika mediteranskih gradova koja je uporedo sa Talijanskom biskupskom konferencijom na temu „Mediteran kao granica mira“, održana u talijanskom gradu Firenci od 24. do 27.02.2022. godine.

Cilj konferencije bio je skrenuti novu pažnju na područje Mediterana kroz dijalog između njegovih glavnih gradova, poticati i promovirati akcije podrške saradnji i miru. Historijski gledano, raskrsnica istočnih i zapadnih civilizacija, sjevera i juga svijeta, Mediteran može ponovo igrati ulogu kulturnog mosta koju je imao u prethodnim odlučujućim povijesnim prekretnicama, ovoga puta zahvaljujući dijalogu između njegovih gradova.

U skladu sa programom konferencije, 25. februara su održane četiri sesije na teme: Kulturni razvoj i saradnja između mediteranskih gradova; Javno zdravstvo i socijalna zaštita; Sredozemno more, zagađenje vode, okoliš i zaštita vodenih i energetskih resursa; Migracije preko obala Mediterana, u okviru kojih su gradonačelnici iznijeli svoja razmišljanja i podijelili moguća rješenja.

Gradonačelnica Karić je svoje obraćanje počela pozivajući sve prisutne da zajedno podrže Kijev i pruže solidarnost i razumijevanje za narod Ukrajine. Poručila je da Mediteran može ponovo igrati ulogu kulturnog mosta koju je imao ranije, ovog puta zahvaljujući dijalogu između njegovih gradova.

Karić je sa još 40 gradonačelnika, potpisala Deklaraciju kojom se podstiče saradnja i mir među gradovima mediteranskih zemalja.

U sklopu Konferencije, gradonačelnica je imala niz uspješnih bilateralnih susreta sa gradonačelnicima Rima Robertom Gualtierien, Atine Kostasom Bakoyannis, te Istanbula Ekremom İmamoğluom, ističući veliku zahvalu domaćinu, gradonačelniku Firenze, Dariu Nardelli na organizaciji ovog važnog događaja.

Hibridni događaj „Gradovi, klima i saobraćaj”, Zagreb, 17. - 18.03.2022.

Na poziv Grada Zagreba, koji je koordinator mreže CIVINET Slovenija-Hrvatska-Jugoistočna Evropa, dvodnevnom hibridnom događaju „Gradovi, klima i saobraćaj“, posvećenom temi klime u gradovima, s naglaskom na nove politike EU, mogućnosti finansiranja projekata i ublažavanja negativnog utjecaja saobraćaja, u ime Grada Sarajeva prisustvovala je stručna savjetnica u Službi za opću upravu i zajedničke poslove Nejra Selimović.

Forum „Žene u vladi“, Dubai, UAE, 28.03.2022.

Na poziv Ohood Al Roumi, državne ministricе UAE za razvoj Vlade, gradonačelnica Grada Sarajeva Benjamina Karić učestvovala je na Forumu „Žene u vladi“, koji je pod pokroviteljstvom Svjetskog samita vlada (WGS), održan u Dubaiju, u Exhibition centru EXPO 28.03.2022. godine. Ovaj ekskluzivni Forum je ponudio prostor za globalni dijalog o ženskom liderstvu u javnom sektoru i stavio u središte pažnje žene lidere, raspravljajući o tome kako unaprijediti uključivanje žena i njihovo osposobljavanje u vladi.

Gradonačelnica Karić je bila jedan od govornika na panel diskusiji „Dinamični gradovi: Uloga žena u oblikovanju javnog života“ i govorila je o ženskom liderstvu u javnom sektoru.

Inače, ovaj Forum pruža priliku globalnim vladama da obećaju svoju podršku i preuzmu čvrste obaveze za osnaživanje žena na najvišim nivoima donošenja odluka, te ima za cilj izgradnju globalne mreže žena lidera u javnom sektoru za podršku, njegovanje i mentorstvo sljedećoj generaciji žena lidera.

Promocija turističke ponude KS i BiH na EXPO 2020 Dubai, UAE, 27. - 31.03.2022.

Na poziv Turističke zajednice Kantona Sarajevo, delegacija Grada Sarajeva koju su činili gradonačelnica Benjamina Karić, predsjedavajući Gradskog vijeća Jasmin Ademović, zamjenica predsjedavajućeg Gradskog vijeća Mirela Džehverović i gradski vijećnik Muamer Mekić, boravila je u Dubaiju od 27. do 31.03.2022. godine. Povod je bio prisustvo promociji turističke ponude

Kantona Sarajevo i BiH koja je održana u paviljonu BiH, na Svjetskoj izložbi EXPO 2020 Dubai, 28. marta.

Visit Sarajevo po prvi put u partnerstvu sa USAID BiH i Privredna komora FBiH radi na promociji turističke ponude Kantona Sarajevo i BiH na tržištima UAE i Saudijske Arabije. Ovaj prvi organizirani roadshow na tržištu zemalja Zaljeva pružio je jedinstvenu priliku predstavnicima privatnog turističkog sektora da prošire i unaprijede svoje poslovanje i direktno se predstave turoperaterima koji iskazuju veliki interes za BiH. Turisti iz zaljevskih zemalja prepoznali su Kanton Sarajevo i BiH kao izuzetno poželjne destinacije koje mogu kvalitetno odgovoriti na sve njihove zahtjeve i pružiti jedinstveno iskustvo.

U okviru promocije, prisutne zvanice pozdravila je gradonačelnica Sarajeva Benjamina Karić i pozvala ih da posjete glavni grad BiH.

EXPO 2020 Dubai, cijenjen i etabliran sajam koji je od oktobra 2021. okupio preko 20 miliona ljudi iz više od 190 zemalja, završen je Svečanom ceremonijom dodjele nagrada međunarodnim učesnicima, a događaj je organiziran na temu "Povezivanje umova, stvaranje budućnosti".

Online konferencija „Padova zove Sarajevo“, 05.04.2022.

Zamjenik gradonačelnice Grada Sarajeva Haris Bašić učestvovao je 05.04.2022. u radu konferencije „Padova zove Sarajevo: 30 godina zajedno za mir: projekti saradnje i iskustva za budućnost bez ratova“ putem video linka. Konferencija je organizirana na inicijativu Grada Padove, Centra za ljudska prava „Antonio Papisca“ i Banco Popolare Etica povodom 30. godišnjice početka opsade Grada Sarajeva.

Tokom Konferencije panelisti su detaljno analizirali situaciju na Balkanu u prošlosti i današnje vrijeme, i svjedočanstva onih koji su direktno iskusili tragediju rata u BiH i posvetili se pružanju podrške važnim projektima obnove koja je uslijedila nakon rata.

Zamjenik gradonačelnice Bašić se u svom obraćanju posebno osvrnuo na trenutnu situaciju u svijetu i istakao potrebu za zajedništvom i solidarnosti, uz poruku da odlučno odbacujemo nasilje kao metod rješavanja političkih i svih drugih pitanja. Na kraju izlaganja izrazio je želju za uspostavljanje saradnje između Sarajeva i Padove na konkretnim projektima, te pozvao prisutne da posjete Sarajevo i upoznaju se s bogatom historijom grada.

Konferencija „Gradovi budućnosti: inovativni, sigurni i održivi“, Solun, 11. - 14.04.2022.

Na poziv Grada Soluna, zamjenica gradonačelnice Grada Sarajeva Anja Margetić učestvovala je na konferenciji „Gradovi budućnosti: inovativni, sigurni i održivi“ koja je održana u grčkim gradovima Solunu i Trikali od 11. do 14.04.2022. godine. Margetić je učestvovala na panelu "Saradnja pametnih gradova Jugoistočne Evrope", na kojem je predstavila pilot projekte iz oblasti pametnih gradova koje je Grad Sarajevo implementirao u saradnji s UNDP-om.

Završni događaj konferencije bila je posjeta gradu Trikali u sklopu kojeg su predstavljena pametna rješenja grčkih gradova.

Online sastanak sa Nacionalnom asocijacijom talijanskih općina (ANCI), 14.04.2022.

Ambasada Republike Italije u BiH pozvala je Sarajevo, Mostar i Banja Luku da učestvuju u projektu sa talijanskim gradovima, u okviru sljedećih tema: „Održivost u urbanom razvoju: mobilnost, energija, zagađenje zraka i upravljanje otpadom“ i „Digitalizacija usluga građanima“.

Dana 14.04.2022. održan je online sastanak sa Nacionalnom asocijacijom talijanskih općina (ANCI), kojem su prisustvovala dogradonačelnica Anja Margetić i predstavnice Odjeljenja za pripremu projekata Nermina Suljević i Lejla Bešlić, u ime Grada Mostara gradonačelnik Mario Kordić sa saradnicima, te u ime Grada Banja Luke savjetnica gradonačelnika Stanivukovića Milada Šukalo sa saradnicima. Pored navedenih, sastanku je prisustvovao ambasador Italije u BiH Marco Di Ruzza sa saradnicima.

Sastanak je bio informativnog karaktera, predstavljen je rad ANCI-a, te je svaki grad predložio tri teme ili oblasti na kojim bi se temeljila saradnja sa njihovim gradovima/općinama. Sa kolegama iz ANCI-a dogovoreno je da će poslati upitnik, gdje će svaki grad opisati nadležnosti koje ima u predloženim oblastima, kako bi se talijanski partneri mogli što bolje pripremiti za potencijalne aplikacije.

Završni događaj projekta Untold Stories – Neispričane priče, Sarajevo, 16.04.2022.

Organizacijama DE/MO „Jesmo li mi Evropa“ i De Kiesmannen, Evropski parlament je dodijelio potporu za proizvodnju sedam multimedijalnih priča u saradnji sa sedam zemalja pod nazivom: Neispričane priče. Cilj projekta je pojačati glasove i priče ljudi iz zemalja koje nisu ravnopravno zastupljene na evropskoj sceni: BiH, Mađarske, Cipra, Sjeverne Irske, Estonije, Grenlanda i Rumunjske.

Tokom druge sedmice aprila 2022., osam mladih novinara i aktivista iz multietničkih bh. zajednica okupilo se u Sarajevu kako bi proizveli multimedijalnu priču o opasnosti građanske pasivnosti u BiH. Projekat „Neispričane priče: Ne dozvolite da se poubijamo“ pokazuje opasnost građanske pasivnosti kroz dvije multimedijalne priče o upotrebi alternativne medicine i zagađenju rijeka u BiH.

Sve priče i kampanje iz ovih 7 kolaborativnih radionica bit će predstavljene u sklopu Konferencije o budućnosti Evrope u maju 2022. godine u Briselu.

Završni događaj projekta „Neispričane priče: Ne dozvolite da se poubijamo“, održan je u Bosanskom kulturnom centru 16.04.2022., a prisutnima su se obratili zamjenica gradonačelnice Sarajeva Anja Margetić i v.d. zamjenika šefa Delegacije EU u BiH Jurgis Vilcinskas.

Online Konferencija „Mediteran: more mira“, 28.04.2022.

Na poziv gradonačelnika talijanske općine Lampedusa i Linosa, gradonačelnica Grada Sarajeva Benjamina Karić učestvovala je putem zoom-a na Međunarodnoj konferenciji „Mediteran: more mira“, održanoj 28.04.2022. godine.

Gradonačelnica se obratila na temu „Sarajevo 30 godina nakon opsade“, a u svom obraćanju je istakla da je Sarajevo grad koji je pretrpio velika razaranja i ljudske gubitke tokom opsade koja je trajala 44 mjeseca, ali da je uprkos tome zadržao svoj multikulturni karakter i otvorenost za sve dobronamjerne ljude. Naglasila je otvorenost Grada Sarajeva da saraduje sa mediteranskim

gradovima i europskim gradovima općenito na pronalaženju rješenja za probleme s kojima se gradovi suočavaju, te izrazila nadu da će ovaj skup biti još jedan doprinos miru, dijalogu i uzajamnom razumijevanju.

Na konferenciji su učestvovali predstavnici graničnih općina i gradova iz Italije, Kipra, Poljske, Slovenije i Grčke.

Dobrodošlica učesnicima i investitorima 11. Sarajevo Business Foruma, Sarajevo, 10.05.2022.

Grad Sarajevo je priredio u Vijećnici 10.05.2022. večer dobrodošlice za sve učesnike i investitore 11. Sarajevo Business Foruma, respektabilnog međunarodnog poslovnog i privrednog događaja, a gradonačelnica Benjamina Karić je u svom obraćanju poželjela da Forum protekne u uspješnoj razvojnoj priči, razmjeni iskustava i dobrih praksi, te uvezivanju privrednog i poslovnog svijeta gradova i država koja će biti krunisana konkretnim ugovorima i partnerstvima.

Nedjelja transporta i klimatskih promjena 2022, Berlin, 10. - 14.05.2022.

Šefica Odjeljenja za pripremu projekata Nermina Suljević učestvovala je na svjetskom događaju na temu transporta i klimatskih promjena: Transport and Climate Change Week 2022 koji je u organizaciji Otvorenog regionalnog fonda za jugoistočnu Evropu – energija, transport, zaštita klime (ORF ETC), koji se implementira od strane GIZ-a u ime njemačke vlade, održan u hibridnom formatu u Berlinu i online, u periodu od 10. do 14.05.2022. godine.

Kroz zanimljive panele, diskusije, prezentacije renomiranih stručnjaka iz svih dijelova svijeta, učesnici su imali priliku razmijeniti iskustva, steći nova znanja i saznati o novim rješenjima koja će doprinijeti kvalitetnijoj urbanoj mobilnosti, a i samim tim poboljšanju klimatskih uslova u našim zajednicama. Također, imali su priliku umrežiti se sa kolegama iz regiona, Evrope, ali i cijelog svijeta, kako bi i u budućnosti nastavili komunikaciju i saradnju na ovu temu.

Učešće na ovakvom događaju je naročito bitno i u kontekstu EU Misije 100 klimatski neutralnih gradova, obzirom da je transport upravo jedna od ključnih oblasti kojima će se Misija baviti. Aktivnim učešćem na ovom i sličnim događajima, aktuelna gradska administracija radi, ne samo na bitnom pozicioniranju Sarajeva na regionalnoj i svjetskoj sceni, već potvrđuje opredjeljenje da proaktivno djeluje kako bi se unaprijedila urbana mobilnost u Sarajevu i implementacija SUMP-a - Plana održive mobilnosti Kantona Sarajevo i Grada Sarajevo.

Seminar evropskih mladih lidera, Zagreb, 12. - 13.05.2022.

Odbor povjerenika neprofitne organizacije „Prijatelji Evrope“ nominirao je gradonačelnicu Grada Sarajeva Benjaminu Karić za pridruživanje Evropskoj klasi mladih lidera (EYL40) 2022. Radi se o prestižnom programu koji je pokrenut 2012., i koji svake godine odabire 46 ljudi od stotinu imena, odnosno vrhunske lidere iz različitih sektora (politika, biznis, kultura, mediji ...) koji su zabilježili značajna dostignuća u svojoj oblasti djelovanja.

Program se temelji na ideji da mladi ljudi iz različitih sektora i evropskih zemalja, uključujući i regiju Balkana, kroz otvoren i konstruktivan dijalog, mogu ponuditi nove i inovativne odgovore na međunarodne izazove.

Gradonačelnica Karić je na poziv organizacije „Prijatelji Evrope“ prisustvovala sesiji „Mladih evropskih lidera“ generacija 2022, koja je održana u Zagrebu od 12. do 13.05.2022. godine.

Evropska manifestacija „Socijalna medijacija kao faktor zajedničkog života u miru“, Saint-Denis, 16. - 17.05.2022.

Na poziv Evropske asocijacije za socijalnu medijaciju, zamjenica gradonačelnice Grada Sarajeva Anja Margetić, učestvovala je na Evropskoj manifestaciji na temu „Socijalna medijacija kao faktor zajedničkog života u miru“, održanoj u francuskom gradu Saint-Denisu od 16. do 17.05.2022. godine.

Ovom manifestacijom, koja je održana 16. maja, obilježen je „Međunarodni dan zajedničkog života u miru“, o čemu je odluku jednoglasno donijela Generalna skupština UN-a.

U okviru Foruma pod nazivom „Koju politiku, koju praksu usvojiti u funkciji razvoja „suživotu u miru“ u gradovima, okruzima i gradskim četvrtima?“ Margetić je imala izlaganje na temu „Sukobi i suživot u miru“.

Forum UNGSII SDG Lab, Davos, 24. - 27.05.2022.

Na poziv United Global SDG Index Institute (UNGSII), predsjedavajući Gradskog vijeća Jasmin Ademović učestvovao je na UNGSII SDG Lab forumu, održanom u Davosu 24. do 27.05.2022. Forum je razmatrao rezultate istraživanja o implementaciji ciljeva održivog razvoja iz UN Agende 2030, usaglašene vizije budućnosti, zasnovane na jednakim pravima i mogućnostima, čistoj energiji, vodi i okolini, boljoj zdravstvenoj zaštiti i ravnomjernijem ekonomskom razvoju planete (SDGs).

Uporedo sa Svjetskim ekonomskim forumom (WEF), u Davosu se održavalo na desetine i drugih konferencija posvećenih specifičnim temama na kojima se okupljaju vodeći svjetski stručnjaci. Program SDG Lab 2022 sadržavao je više panel diskusija na kojima su razmijenjena iskustva, a kroz izlaganja istaknutih uvodničara i kroz diskusije o više različitih tema. Raspravljalo se o izazovima i solucijama s kojima se susreću gradovi i drugi subjekti u procesu formulacije i realizacije projekata ka ciljevima održivog razvoja. Na Forumu SDG Lab 2018. godine kreirana je platforma vodećih gradova (25+5 SDG Cities Leadership Platform) kao inicijativa za uspostavljanje partnerskog odnosa gradova pri implementaciji ciljeva održivog razvoja na nivou gradova.

Predsjedavajući Gradskog vijeća Ademović je na panel diskusiji, na temu investiranja u projekte ka ciljevima održivog razvoja koji doprinose općem dobru, ali i putem kojih se ostvaruje dobit, predstavio projekte Grada Sarajeva. Grad Sarajevo je kroz projekte uvođenja pametnih tehnologija, čišćenja i uređenja rijeke Miljacke te promocije ekoloških i zdravih načina transporta, već na putu da, u okviru svojih nadležnosti, odgovori na izazove implementacije SDGa.

Podijelio je svoja iskustva sa profesoricom Phoebe Koundouri (Athens University of Economics and Business) koja je predsjednica Evropske asocijacije ekoloških i resursnih ekonomista i koja posjeduje impresivno iskustvo u polju implementacije SDG-a. Razgovarano je o mogućnostima društvene transformacije zasnovane na nauci i s fokusom na čovjeka. Učesnik panel diskusije bio je i Joseph Cajigal, izvršni direktor kompanije Princeton Capital Management s kojim je razgovarano o isplativosti investiranja u održive ciljeve razvoja koji doprinose općem dobru.

Ademović je sa J.D. Bindenagelom, profesorom Univerziteta u Bonu, umirovljenim američkim diplomatom i bivšim specijalnim izaslanikom predsjednika Clintona za pitanja Holokausta,

gostovao na *podcastu* gdje je govorio o kompleksnosti historijske i savremene uloge Sarajeva u procesima u BiH i Jugoistočnoj Evropi.

Grad Sarajevo će u narednim godinama poduzimati potrebne aktivnosti za realizaciju što više projekata usmjerenih na ispunjenje ciljeva održivog razvoja te će kroz privlačenje investicija u održivu energiju, ekologiju i urbanu mobilnost, u okviru svoje nadležnosti, doprinijeti stvaranju zdravijeg i sigurnijeg okruženja i za buduće generacije.

Konferencija „Žensko poduzetništvo – izvor gospodarskog rasta na Balkanu”, 15.06.2022.

Zamjenica gradonačelnice Grada Sarajeva Anja Margetić učestvovala je na Konferenciji „Žensko poduzetništvo – izvor gospodarskog rasta na Balkanu”, koja je na inicijativu „Women in Adria”, održana u Hub-u 387, u Sarajevu 15.06.2022. godine.

U svom izlaganju, Margetić je istakla da Grad u nadležnosti nema oblast poduzetništva, ali da gradska administracija ipak aktivno radi na okupljanju žena poduzetnica. Kazala je da bi bilo dobro osnovati savjetodavno tijelo vezano za tumačenje naših zakona, kako bi se olakšalo ženama da pokrenu svoje biznise, ističući svim učesnicama da Grad Sarajevo sa zadovoljstvom, u ovu svrhu, želi ponuditi svoje međunarodne kontakte.

Panelistkinje su, pored dogradonačelnice, bile: Lada Buševac, direktorica IFC ureda za BiH i Crnu Goru, Amila Pilav Velić, profesorica na EFSA i osnivačica i CEO Sarajevo Innovation Summita, te Bergin Kulenović, koordinatorica WEE programa u UN Women BiH.

Konferencija je otvorena sjajnim predavanjem Ane Keglović Horvat iz Zagreba, trenerice osobnog razvoja i ALH tehnika, o izazovima osobnog razvoja s kojima se svaki dan suočavamo u privatnom, ali i poslovnom životu.

Konferencija „Urban Green“, Sofija, 06. – 08.06.2022.

Na poziv Grada Sofije, zamjenica gradonačelnice Grada Sarajeva Anja Margetić učestvovala je na konferenciji o očuvanju zelenih površina u gradovima „Urban Green“, održanoj u Sofiji u periodu od 06. do 08.06.2022. godine.

Bilateralni sastanak dogradonačelnice Margetić sa gradonačelnicom Sofije Yordankom Fandakovom, održan je 7. juna. Margetić je zahvalila na pozivu za učešće na konferenciji o urbanom zelenilu „Urban green“, a gradonačelnica Sofije joj je uručila nacrt Deklaracije o saradnji između gradova Sofije, Podgorice i Sarajeva u oblasti klimatskih promjena, održivog i zelenog urbanog okoliša i zaštite prirodnih resursa.

Fandakova je izrazila spremnost Grada Sofije da uspostavi saradnju s Gradom Sarajevom u oblasti sporta, što bi uključivalo razmjenu djece iz dva grada koja treniraju plivanje.

Anatoly Iliev, gradski vijećnik Grada Sofije predstavio je Sofia Sport Fondaciju i projekt Evropska prijestolnica sporta Asocijacije evropskih prijestolnica i gradova za sport (ACES Evrope) i Evropske komisije i programe predstavljene u Bijelom papiru o sportu (tačka 50). U ovom kontekstu u decembru 2022. održat će se službena svečanost u Nacionalnoj palati za kulturu gdje će Sofiji biti uručena zastava svjetske prijestolnice sporta. Fandakova je pozvala gđu Margetić da posjeti Sofiju ponovo u decembru 2022. i bude gost na toj svečanosti.

25. Evroazijski ekonomski samit, Istanbul, 07. - 09.06.2022.

Na poziv Fondacije za strateška i društvena istraživanja „Marmara“ Group, gradonačelnica Sarajeva Benjamina Karić i pomoćnica gradonačelnice Amina Deljković učestvovala su u radu 25. Evroazijskog ekonomskog samita koji je održan u Istanbulu od 07. do 09.06.2022. godine.

Ekonomski samit okupio je brojne političke lidere, predstavnike lokalnih zajednica, poslovne ljude i akademsku zajednicu iz zemalja euroazijskog područja. Fokus djelovanja ovogodišnjeg susreta bio je obnova ekonomije i demokratije nakon pandemije koronavirusa, sukoba u Ukrajini, ali i drugih aktualnih tema poput očuvanja okoliša, klimatskih promjena i „Smart city“ strategije. Prvog dana Samita održana je posebna sesija posvećena predstavljanju ekonomskih potencijala BiH te B2B sastancima bh. kompanija s turskim partnerima.

Govoreći na panelu o temi „Dijalog gradova“, Karić je istakla važnost međusobnog partnerstva i razmjene iskustava okupljenih predstavnika. Kazala je da diplomacija gradova omogućava prevladavanje problema tranzicije, ali i ekonomskog razvoja, jača privatnu inicijativu, osnažuje države i ohrabruje građane koji su najvrjedniji resurs i kapital, uz poruku da Grad Sarajevo odlučno ide u pravcu jačanja međunarodnih odnosa, izgradnje mostova saradnje i promoviranja mira.

Učešćem na Samitu, potvrđeni su sada već tradicionalno dobri pobratimski i prijateljski odnosi glavnog bh. grada s najrazvijenijim turskim gradovima Istanbulom, Ankarom, Bursom i Konyom.

ProSUMP Regionalni trening o planu održive urbane mobilnosti, Tirana, 08. - 10.06.2022.

Predstavnici Grada Sarajeva i Ministarstva saobraćaja Kantona Sarajevo, pored ostalih predstavnika šest zemalja Zapadnog Balkana, učestvovali su na ProSUMP regionalnom treningu o održivoj urbanoj mobilnosti u zemljama Zapadnog Balkana, koji je održan u Tirani od 08. do 10.06.2022., kao što je i predviđeno u Sporazumu o saradnji između ove dvije institucije.

Organizator treninga je Otvoreni regionalni fond za jugoistočnu Evropu - energija, transport, zaštita klime, a projekat implementira GIZ u ime Vlade Njemačke. Nakon intenzivnih aktivnosti na izradi i usvajanju Plana urbane održive mobilnosti (SUMP), sadašnji fokus podrške je sistematična implementacija SUMP-a.

Cilj treninga je razmjena iskustava između gradova i umrežavanje, ali poseban je fokus stavljen na sticanje znanja i vještina koji su potrebni kako bi se implementirale mjere iz SUMP-a. Na treningu je, također, diskutovano o konceptu tzv. ostrva mobilnosti, novog koncepta urbane mobilnosti koji će Grad Sarajevo u narednom periodu implementirati u okviru projekta Tribute.

Aktivno učešće u ovom programu još je jedan pokazatelj opredjeljenja Grada i Ministarstva, da zajednički, uz posebnu podršku značajnog partnera GIZ, rade na unaprjeđenju urbane mobilnosti u Sarajevu.

Pored predstavnika gradova iz Albanije, Crne Gore, Srbije, Makedonije, Kosova i Italije, u ime Grada Sarajeva događaju je prisustvovala šefica Odjeljenja za pripremu projekata Nermina Suljević.

Svjetski biciklistički samit Velo-city 2022, Ljubljana, 14. - 16.06.2022.

Gradonačelnica Grada Sarajeva Benjamina Karić učestvovala je kao panelist na svjetskom biciklističkom samitu Velo-city koji je održan u Ljubljani od 14. do 17.06.2022. Na panelu

naslovljenom „Politička hrabrost za prijelomne odluke”, uz gradonačelnicu Karić učestvovali su gradonačelnici Ljubljane Zoran Janković, Dubrovnika Mato Franković, Banja Luke Draško Stanivuković i Novog Sada Miloš Vučević.

Tokom boravka u Ljubljani, gradonačelnica Karić se sastala sa svojim kolegom Zoranom Jankovićem, Počasnim građaninom Grada Sarajeva. Tokom sastanka sagovornici su izrazili zajednički interes za dodatno osnaživanje međusobne veze dva grada partnera, ozvaničene Protokolom o saradnji prije dvije decenije, potpisivanjem Sporazuma o bratimljenju.

UN Habitat - Svjetski urbani forum, Katowice, 25. - 28.06.2022.

Predsjedavajući Gradskog vijeća Grada Sarajeva Jasmin Ademović učestvovao je na 11. zasjedanju Svjetskog urbanog foruma (World Urban Forum – WUF11) u Katowicama, u organizaciji UN-Habitat, agencije Ujedinjenih nacija za ljudska naselja i održivi urbani razvoj. Glavna tema foruma održanog od 26. do 30.06.2022. bila je transformacija gradova za bolju urbanu budućnost, a o značaju skupa i teme govori to što je WUF 11 okupio više do 20.000 učesnika iz 173 zemlje svijeta.

Kao govornik, predsjedavajući Ademović učestvovao je na skupu opredijeljenom poslovnoj zajednici i to najprije na panelu čija je osnovna tema bila kako privreda i ekonomija mogu preobraziti gradove za postizanje ciljeva održivog razvoja (SDG). Ademović je prenio iskustva Grada Sarajeva u primjeni SDGs pri programiranju razvoja, te naglasio značaj globalnog cilja održivog razvoja broj 17 – Partnerstvom do ciljeva, o čemu je svjedočio i ovaj skup.

Potom je kao govornik učestvovao na panelu organiziranom u cilju uočavanja prilika za gradonačelnike iz Ukrajine i Poljske ali i drugih zemalja u zajedničkoj podjeli prioriteta te definiranja prijedloga kako biznisi mogu pomoći u zahtjevima i potrebama gradskih sredina. U okviru panela posvećenog ruskoj agresiji i ratu u Ukrajini, predsjedavajući Ademović je prenio iskustva Sarajeva, odnosno šta mogu naučiti ukrajinski gradovi iz procesa oporavka i obnove glavnog grada BiH.

Na margini ovog skupa predsjedavajući Ademović se sastao i sa izvršnom direktoricom UN-Habitat-a i podsekretarkom generalnog sekretara UN Maimunah Mohd Shaarif koja je izlagala na istoj sesiji.

11. Kongres Svjetskog saveza dijaspore Bosne i Hercegovine, Sarajevo, 02.07.2022.

11. Kongres Svjetskog saveza dijaspore Bosne i Hercegovine, krovne organizacije bh. dijaspore, pod motom „Povezani Bosnom i Hercegovinom”, održan je u zgradi Parlamentarne skupštine BiH 02.07.2022. Ovaj Kongres još jednom je potvrdio trajnu vezanost bh. dijaspore za svoju domovinu, želju i nastojanje da se odnos države BiH i dijaspore adekvatno regulira i ogroman potencijal koji naša domovina ima u svojoj dijaspori.

6. Bloomberg Harvard City Leadership program, New York, SAD, 16. – 20.07.2022.

Bloomberg Harvard City Leadership Inicijativa, vodeći program Bloomberg centra za gradove na Harvard univerzitetu, nastao je kao rezultat saradnje između Harvard Kennedy škole, Harvard Business škole i Bloomberg Philanthropies. Inicijativa je pokrenuta 2017. godine, a program je do danas pohađalo 428 gradonačelnika i 1400 rukovodećih državnih službenika iz 494 grada širom svijeta.

Bloomberg Harvard City Leadership Initiative izabrao je gradonačelnicu Grada Sarajeva Benjaminu Karić da bude dio grupe od 40 gradonačelnika iz cijelog svijeta, koji će učestvovati u prestižnom programu za lidere gradova na Harvardu. S tim u vezi, gradonačelnica Karić je učestvovala u 6. Bloomberg Harvard City Leadership programu koji je održan u New York-u od 16. do 20.07.2022.

Program je osmišljen sa ciljem unaprjeđenja leaderskih sposobnosti i vještina gradonačelnika i državnih službenika u njihovim timovima, za upravljanje gradovima, kako bi se uhvatili u koštac sa složenim izazovima današnjice, a s ciljem poboljšanja kvalitete života građana.

U skladu s tim, gradonačelnici su imali obavezu izabrati dva državna službenika koji bi učestvovali u istom programu, a za koje bi se dio programa u New Yorku održao u mjesecu augustu. Kao predstavnice Grada Sarajeva, u programu su učestvovala Merima Hadžiabdić i Velida Mehić u periodu od 13. do 20.08.2022. godine.

Cjelokupni Bloomberg Harvard City Leadership program će trajati godinu dana – do juna 2023. godine, te će se sesije održavati mjesečno online, nakon čega će svi polaznici programa dobiti certifikat o završenoj obuci.

Sastanak projektnog tima i mreže stakeholdera projekta „Tribute“, Milano, 06. - 07.09.2022.

Sastanak projektnog tima i mreže stakeholdera projekta „Tribute“ održan je u Milanu 06.09.2022. Projekat TRIBUTE je finansiran iz programa Interreg Adrion i Grad Sarajevo je jedan od 8 gradova partnera na projektu. Pored Sarajeva u projektu učestvuju još i gradovi Podgorica, Novi Sad, Zagreb, Patras, Milano, Maribor, Ljubljana.

Na sastanku su analizirane dosadašnje aktivnosti te dogovoreni detalji u vezi narednih aktivnosti. Projekat se implementira od početka 2021. do 30.06.2023. godine. Do kraja implementacije projekta Grad Sarajevo će implementirati pilot aktivnost koja podrazumijeva uspostavljanje ostrva mobilnosti i instalaciju punionica za električne automobile.

Konferencija posvećena primjeni međunarodne arbitraže u BiH, Sarajevo, 08.09.2022.

Grad Sarajevo je 08.09.2022. bio domaćin konferencije posvećene primjeni međunarodne arbitraže u BiH u saradnji sa Međunarodnom trgovačkom komorom u Parizu (ICC), Međunarodnom advokatskom kancelarijom Wolf Theiss i Pravnim fakultetom Univerziteta Sarajevo. Događaj se prvi put održavao u BiH, pružajući mladima priliku da razgovaraju o aktuelnim temama i umreže se s iskusnim praktičarima u oblasti arbitraže.

Gradonačelnica Karić je organizatorima i učesnicima poželjela uspješnu saradnju, korisnu razmjenu iskustava i ideja, umrežavanje i povezivanje, pogotovo pravnih i ekonomskih eksperata.

Regionalna konferencija „Rješenja pametnih gradova: rizici i prilike za Zapadni Balkan“, Tirana, 20. - 21.09.2022.

Na poziv Američke trgovačke komore u Albaniji, zamjenica gradonačelnice Grada Sarajeva Anja Margetić učestvovala je na regionalnoj konferenciji „Smart city rješenja: rizici i prilike za Zapadni Balkan“, koja je održana u Tirani u periodu od 20. do 21.09.2022. godine.

Gđa Margetić imala je izlaganje i prezentaciju na sesiji „Najbolje prakse: zelena energija/ gradovi s nultom emisijom ugljika električni automobili/solarni paneli/ekološka rješenja“. U svom obraćanju je istakla da se održivi razvoj nalazi u vrhu agende gradske administracije i da je u tu svrhu

formiran ekspertni tim koji radi na implementaciji konkretnih projekata u toj oblasti. Naglasila je da je pitanje zelene energije i održivog razvoja pitanje budućnosti koje se tiče svih nas, naše djece i budućih generacija, te da će sinergija zemalja Zapadnog Balkana i čitave Evrope imati ključnu ulogu u ostvarenju ciljeva održivog razvoja.

U prezentaciji se osvrnula na aktivnosti koje su poduzete u oblasti unapređenja javnog saobraćaja: nabavku novih trolejbusa nakon 40 godina, rekonstrukciju tramvajske pruge što je najveći infrastrukturni projekt u posljednjih 60 godina.

12. Ljubljana forum, Ljubljana, 06. - 07.10.2022.

Na poziv Grada Ljubljane i Instituta GoForeSight (GFS), zamjenica gradonačelnice Grada Sarajeva Anja Margetić, učestvovala je u radu 12. Ljubljana Forum, koji je održan u Ljubljani od 06. do 07.10.2022.

Forum je bio posvećen novim razvojnim inicijativama gradova do 2030. godine, a kroz zanimljive panele, diskusije i prezentacije, razmijenjene su korisne inicijative, ideje i prakse, koje će doprinijeti kvalitetnoj energetskej efikasnosti, urbanoj mobilnosti i digitalnoj transformaciji, te poboljšanju klimatskih uslova.

Na panelu pod nazivom „Klimatski neutralni i pametni gradovi“, uz prisustvo predstavnika gradova Ljubljane, Beograda, Podgorice, Rijeke i Prištine, dogradonačelnica Margetić je kazala da Sarajevo želi biti grad zelenih površina, čistog zraka, čistih rijeka, sa sofisticiranim i praktičnim mogućnostima urbane mobilnosti, grad u kojem će svi stanovnici i posjetitelji uživati i kvalitetno provoditi vrijeme, ali da je na tom putu potrebno poduzeti mnogo aktivnosti kako bi se ostvarila ta vizija.

Margetić je podsjetila skup da je Sarajevo izabrano među 100 gradova u Misiji klimatski neutralnih i pametnih gradova, te je poručila kako Ljubljanski forum treba biti podsticaj za nove ideje i aktivnosti s ciljem da „naše gradove učinimo održivim i kvalitetnim urbanim životnim prostorom“.

Bloomberg CityLab 2022, Amsterdam, 08. - 11.10.2022.

Gradonačelnica Grada Sarajeva Benjamina Karić učestvovala je na globalnom samitu gradova „Bloomberg CityLab 2022“ koji je u organizaciji Bloomberg Philantropies i Aspen Instituta održan u Amsterdamu u periodu od 09. do 10.10.2022.

U okviru programskih događaja, gradonačelnica Karić susrela se s gradonačelnicom Amsterdama Femke Halsema kojoj je predstavila bh. prijestolnicu sa svim njenim ljepotama i potencijalima. Tokom tog susreta, gradonačelnica Karić je ocijenila da je ovaj samit odlična prilika da se svjetskoj javnosti još jednom približe prilike, iskustva i izazovi Sarajeva i BiH. Kazala je da je Amsterdam jedan od svjetskih gradova koji najbolje razumiju bogatstvo multikulturalizma i svih izazova raznolikosti koji prožimaju bh. prijestolnicu, te da je ovo prilika da se veze i saradnja naših gradova institucionaliziraju i prodube u budućnosti.

Ovogodišnji samit imao je za cilj globalno okupljanje gradonačelnika, urbanih inovatora, poslovnih lidera i umjetnika, i bavio se rješenjima urbanih izazova, uključujući oporavak od pandemije, migracije, globalne sukobe i ekstremne vrućine.

Međunarodni festival „Umjetnost za mir – Art for Peace“, Sarajevo, 09. - 10.10.2022.

Gradani i posjetioci Sarajeva imali su priliku da na Vilsonovom šetalištu i platou ispred Dječije kuće Novo Sarajevo 09. i 10.10.2022. godine svjedoče umjetničkim kreativnim radionicama poput crteža, skulpture, fotografije, muzike, plesa, koje su održane u sklopu Međunarodnog festivala „Umjetnost za mir – Art for Peace“. Idejni tvorac ovog umjetničkog događaja je svjetski priznati umjetnik iz Bahreina, Abbas Al-Moussawi.

Tokom obraćanja na završnoj ceremoniji održanoj u Dječijoj kući Novo Sarajevo, zamjenica gradonačelnice Grada Sarajeva Anja Margetić izrazila je zadovoljstvo što se i grad Sarajevo pridružio brojnim evropskim i svjetskim centrima u kojem se održao jedan ovakav festival umjetnosti, te što je jedna od izabranih stanica na putovanju ovog angažiranog projekta koji promovira umjetnost, mir i poštovanje među ljudima.

Zahvalila je gospodinu Al Mosawiju i prijateljima iz Kraljevine Bahrein za nemjerljiv doprinos u širenju ljubavi i mira kroz univerzalni jezik umjetnosti.

Festival je organiziran u saradnji Bahrain-Bosnia and Herzegovina Friendship and Business Society (BBHS) sa Općinom Novo Sarajevo i Međunarodnim centrom za djecu i omladinu Novo Sarajevo, uz podršku Grada Sarajeva i Ministarstva kulture i sporta KS.

Prvi sastanak Mreže gradova „Evropska prijestolnica demokratije“, Beč, 17. - 19.10.2022.

Program „Evropska prijestolnica demokratije“ realizira se u saradnji sa European Capital of Democracy Non-profitable organization (EcoD NPO), a Gradsko vijeće Grada Sarajeva je Odluku o davanju saglasnosti za učestvovanje Grada Sarajeva u navedenom programu usvojilo na 19. sjednici održanoj 05.10.2022. godine.

Prvom sastanku mreže gradova „Evropska prijestolnica demokratije“, koji je održan u Beču od 17. do 19.10.2022., prisustvovali su zamjenica predsjedavajućeg Gradskog vijeća Grada Sarajeva Mirela Džehverović i šef Odjeljenja za kabinetske poslove u Gradskom vijeću Amir Vrca, kao i predstavnici gradova Barcelone, Antwerpena, Bologne, Brage, Bruxellesa, Burgosa, Cascaisa, Linza, Rzeszova, Valonga.

Ukupno 13 gradova se prijavilo da postanu prva evropska prijestolnica demokratije, a stručni žiri koji se sastao krajem oktobra ocijenio je podnesene aplikacije i demokratske projekte, te sastavio listu gradova koje žele posjetiti u novembru 2022. godine, prije donošenja odluke o užem izboru. Na tom sastanku stručnog žirija, grad Sarajevo nije izabran za posjetu.

U suženoj selekciji gradova, u decembru 2022., žiri građana Evrope bira prijestolnicu demokratije koja se proglašava u januaru 2023. godine. Tokom 2023. odvija se razvoj programa dok je ceremonija otvaranja programa „Evropske prijestolnice demokratije“ zakazana za septembar 2023. godine.

S druge strane, gradovi koji ne prođu ovu selekciju, pozvani su da se uključe u godinu programa EcoD i da se ponovo prijave naredne godine, te imaju priliku organizirati idući sastanak za predstavnike ECoD mreže od 22. do 24.02.2023., prilikom čega odabrani grad domaćin snosi sve

troškove organizacije ovoga sastanka. Mreža EcoD je predložila Gradu Sarajevu da bude domaćin narednog sastanka.

Radionica o urbanoj mobilnosti u organizaciji Svjetske banke za BiH, Sarajevo, 28.10.2022.

Gradonačelnica Grada Sarajeva Benjamina Karić i direktor Svjetske banke za BiH i Crnu Goru Christopher Gilbert Sheldon, 28.10.2022. godine bili su domaćini susreta sa predstavnicima viših nivoa vlasti na kojem je predstavljena analiza o urbanoj mobilnosti u našem gradu.

Svjetska banka je sa Međunarodnom finansijskom korporacijom izabrala Sarajevo kao jedan od 10 gradova u kojima je analiza provedena sa akcentom na mjere, prilike za investiranje i mobilizaciju sredstava.

Tokom sastanka, gradonačelnica je istakla opredijeljenost za unapređenje urbane mobilnosti, te podcrtala ohrabrenje činjenicom da je na tom putu Svjetska banka lojalan partner. Kazala je da će izrađena studija poslužiti kao alat, ali i orijentir u kojem pravcu se trebamo nastaviti zajedno kretati udruženim snagama.

Karić je pohvalila i saradnju sa Ministarstvom saobraćaja Kantona Sarajevo na čelu sa ministrom Adnanom Šetom, o čemu svjedoči i potpisani Sporazum na čijem se provođenju aktivno radi. (Zajedno sa Ministarstvom, a uz podršku GIZ-a - Njemačke razvojne agencije, izrađen je i usvojen Plan održive urbane mobilnosti).

Konferencija Populacijskog fonda Ujedinjenih nacija (UNFPA), Sarajevo, 14.11.2022.

Populacijski fond Ujedinjenih nacija (UNFPA), organizirao je dvodnevnu konferenciju pod nazivom „Izgradnja gradova prilagođenih mladima u svijetu od 8 milijardi ljudi“, koja je u saradnji s Gradom Sarajevom i savezima općina i gradova u BiH, održana u sarajevskom Swissôtelu 14. i 15.11.2022. Datum održavanja konferencije se poklapao sa 15. novembrom, danom kada je svjetsko stanovništvo dostiglo 8 milijardi.

Konferencija je okupila preko 50 gradonačelnika/načelnika i predstavnika mladih iz regiona, Evrope i svijeta, koji su razgovarali o načinima na koje gradove mogu bolje prilagoditi mladima.

Ovaj događaj je dio nove inicijative UNFPA: Gradovi za demografsku otpornost, koju su zajednički pokrenuli Regionalni ured za Istočnu Evropu i Centralnu Aziju UNFPA u partnerstvu sa savezima općina/opština u gradova u BiH. Inicijativa je usmjerena na unapređenje politika o inkluzivnosti u čijem su središtu gradovi, u kojima se potencijal svake mlade osobe koristi za unapređenje ljudskog kapitala, demografske otpornosti i ostvarenja ciljeva održivog razvoja.

Konferenciju su pozdravnim obraćanjima otvorile gradonačelnica Sarajeva Benjamina Karić i direktorica Regionalnog ureda za Istočnu Evropu i Centralnu Aziju UNFPA Florence Bauer. Gradonačelnica Karić je poručila da Grad Sarajevo svoje aktivnosti iz ove oblasti provodi implementirajući mjere iz konkretnog Plana djelovanja za mlade. U pitanju je strateški dokument koji objedinjuje ciljeve i mjere kojima Grad kao institucija želi odgovoriti na potrebe i izazove i time poboljšati kvalitetu života mladih ljudi u bh. prijestolnici, te omogućiti njihov ostanak i napredak u vlastitoj državi.

Ekonomski forum o pametnim gradovima Zapadnog Balkana, Prag, 16. - 18.11.2022.

Češko predsjedavanje Vijećem EU organizirao je EU – Zapadni Balkan: Ekonomski forum o pametnim gradovima, koji je održan u Pragu od 16. do 18.11.2022. Događajem, koji se fokusirao na održivi i pametni urbani razvoj, zelenu i digitalnu tranziciju, predsjedavao je češki ministar industrije i trgovine Jozef Síkela i predstavnik Češke industrijske konfederacije Jaroslav Hanák, a prisustvovala su mu delegacije iz zemalja Zapadnog Balkana i EU, uključujući gradove, općine i međunarodne financijske institucije i regionalne organizacije.

Dio programa bio je posvećen prijenosu znanja među stručnjacima na institucionalnom i poslovnom nivou s fokusom na više tema povezanih s održivim i pametnim urbanim razvojem. Delegacije su imale priliku posjetiti relevantne primjere tehničkih rješenja u gradovima Češke Republike kako bi razmijenili iskustva.

Na poziv Ministarstva industrije i trgovine, u ime gradonačelnice Grada Sarajeva događaju je u svojstvu eksperta za smart cities prisustvovala stručna saradnica Velida Mehić.

Konferencija „Mogućnosti ulaganja u obnovljive izvore energije na Zapadnom Balkanu“, Beograd, 17.11.2022.

Ambasade Kraljevine Norveške u BiH i Republici Srbiji u saradnji sa Nordijskom poslovnom alijansom, Poslovnom asocijacijom Norveška – BiH i Norveškim partnerima za saradnju u oblasti energetike, organizirale su konferenciju „Mogućnosti ulaganja u obnovljive izvore energije na Zapadnom Balkanu“ koja je održana u Palati Srbije u Beogradu 17.11.2022. godine.

Cilj ove konferencije bio je sagledavanje potencijala i mogućnosti povećanja korištenja obnovljivih izvora energije u našem regionu, te ujedno i poboljšanje regionalne saradnje u oblasti energetike.

Ispred Grada Sarajeva konferenciji su prisustvovali gradski vijećnici Alem Logo i Muamer Mekić.

7. Kijevski investicioni forum 2022, Brisel, 28.11.2022.

Na poziv gradonačelnika ukrajinske prijestolnice, gradonačelnica Grada Sarajeva Benjamina Karić učestvovala je na 7. Kijevskom investicionom forumu koji je u organizaciji gradonačelnika Kijeva i Brisela, Vitalija Klička i Filipa Klozea održan 28.11.2022. u Briselu, pobratimskom gradu Kijeva.

Sedmi po redu Kijevski investicioni forum prvi put se održavao van Ukrajine, zbog ratnih dešavanja u toj zemlji, i bio je posvećen izazovima s kojima se Kijev trenutačno suočava, kao i njegovom poslijeratnom oporavku unutar tri ključna područja: otpornosti, inovativnosti i održivosti o čemu su diskutovali najviši dužnosnici evropske i ukrajinske vlade, te najistaknutiji predstavnici javnog i privatnog sektora.

Gradonačelnica Karić je imala obraćanje u okviru panel diskusije pod nazivom „Budućnost urbane izdržljivosti“, nakon koje je zajedno sa gradonačelnicima Rima, Brisela, Pariza i Helsinkija potpisala Deklaraciju o međusobnom razumijevanju o podršci oporavku i održivom razvoju grada Kijeva i okolnih teritorija.

Forum je bio prilika i za potpisivanje Sporazuma o uspostavljanju prijateljskih odnosa između Kijeva i Sarajeva, koji predstavlja veliki korak naprijed u razvoju bilateralnih odnosa dva grada.

U sklopu Foruma u Briselu, gradonačelnica Karić sastala se sa gradonačelnikom Rima Robertom Gualtierijem, sa kojim je dogovorila potpisivanje Sporazuma o saradnji u Rimu u januaru 2023., te

sa gradonačelnicom Pariza Anne Hidalgo, sa kojom je dogovorena njena prva zvanična posjeta Sarajevu u februaru 2023. godine.

Međunarodni susret Francuska – Balkan, Dižon, 28. - 30.11.2022.

Na poziv ambasadorice Republike Francuske u BiH Christine Toudic, zamjenica gradonačelnice Grada Sarajeva Anja Margetić učestvovala je u međunarodnom susretu Francuska – Balkan, koji je u organizaciji Grada Dižona, a u partnerstvu sa Evropskom mrežom Vijeća općina i regija u Evropi (CCRE), održan u francuskom gradu Dižonu od 28. do 30.11.2022. godine.

U okviru panela „Zapadni Balkan i Evropa“, Margetić je učestvovala na okruglom stolu na temu „Kako se proces približavanja Bosne i Hercegovine Evropskoj uniji percipira i doživljava na lokalnom nivou – koje su prednosti, očekivanja i perspektive“.

5. Sarajevo Innovation Summit, Sarajevo, 01.12.2022.

Gradonačelnica Grada Sarajeva Benjamina Karić otvorila je 01.12.2022. u Vijećnici Sarajevo Innovation Summit koji već jubilarni, peti put u bh. prijestolnici okuplja učesnike iz cijelog svijeta na temu „Energetska tranzicija i klimatska neutralnost u novom globalom okruženju“.

Gradonačelnica je poručila da Grad čvrsto vjeruje u zajednički cilj i mapiranje Sarajeva na leadersko mjesto u regionu na temu inovacija, istakavši da je mnogo izazova, ali još je više inovativnih rješenja kojima možemo znatno unaprijediti život u našim lokalnim zajednicama, prijestolnicama i državama. Podsjetila je i na važnu činjenicu, a to je da je Evropska unija prepoznala uložene napore i prihvatila aplikaciju Sarajeva za EU misiju „100 Climate neutral cities“ (Misija 100 klimatski neutralnih gradova).

Organizaciju SIS-a zajedničkim snagama proveli su Ekonomski fakultet Univerziteta u Sarajevu, Ekonomski institut, te Misija USAID-a u BiH.

Konferencija MuniWorld 2022, Jerusalem i Tel Aviv, Izrael, 06. - 08.12.2022.

Na poziv predsjednika Saveza lokalnih vlasti u Izraelu i gradonačelnika Modina Haima Bibasa i gradonačelnika Jerusalema Moshe Liona, gradonačelnica Grada Sarajeva Benjamina Karić je boravila u Jerusalemu i Tel Avivu od 06. do 08.12.2022. povodom održavanja međunarodne konferencije MuniWorld 2022.

MuniWorld je trodnevna konferencija na kojoj su predstavnici gradova imali priliku razmijeniti iskustva o razvoju gradova kroz inovacije, ali i diskutovati pitanja životne sredine, urbanog planiranja i pametne mobilnosti.

Gradonačelnica Karić je u okviru konferencije imala obraćanje na temu „Dostignuća gradova za borbu protiv globalnih izazova“. Bila je to izvanredna prilika za predstavljanje Grada Sarajeva, i za kontakte sa gradonačelnicima, vodećim političarima, privrednicima i predstavnicima akademskih zajednica iz cijelog svijeta.

U okviru programa, gradonačelnica je imala priliku razgovarati sa predsjednikom Izraela Isaacom Herzogom te gradonačelnikom Jerusalema Moshe Lionom.

Konferencija „Ženska ljudska prava“, Sarajevo, 09.12.2022.

Grad Sarajevo je povodom Međunarodnog dana ljudskih prava, uz podršku Kanadske ambasade i Kanadskog fonda za lokalne inicijative, organizirao konferenciju na temu „Ženska ljudska prava“, u prostorijama Dječje kuće na Grbavici 09.12.2022. godine.

Na panelu u okviru konferencije učestvovali su stručnjaci iz oblasti ljudskih prava. Ispred Ambasade Kanade učesnicima se obratila savjetnica za političke i javne poslove Neelu Shanker, dok se ispred Grada Sarajeva obratila pomoćnica gradonačelnice za održivi razvoj Nermina Suljević.

Bitnost i aktuelnost teme ženskih ljudskih prava potvrdila je i velika zainteresovanost za učešće na konferenciji. Preko 100 učesnika Konferencije činili su predstavnici udruženja građana, općina, nastavnici, profesori iz škola sa svojim učenicima, građani i građanke.

Zanimljivo je bilo temu ženskih ljudskih prava diskutovati sa aspekta uprave, akademije i civilnog društva. Za sve učesnike bila je obezbijedena opcija čuvanja djece, odnosno kreativnih radionica u Dječijoj kući, te vaučeri za bicikla, kao i elektronske karte za javni prijevoz, a sve u skladu sa principima održivog razvoja kojima je Grad Sarajevo posvećen. Hrana koja je ostala nakon održane konferencije je donirana inicijativi Tanjir više, odnosno porodicama u stanju potrebe.

Ovakvim pristupom Grad Sarajevo želi biti primjer dobre prakse, te podstaknuti i druge da se ovakvim praksama povećaju pristupačnost ženama i drugim ranjivim kategorijama ovakvim sličnim događajima.

➤ SARADNJA S DIPLOMATSKO-KONZULARNIM PREDSTAVNIŠTVIMA

Nastupna posjeta komandanta EUFOR-a general-pukovnika, Brice Houdeta, 21.01.2022.

Gradonačelnica Grada Sarajeva Benjamina Karić primila je 21.01.2022. godine u nastupnu posjetu komandanta EUFOR-a general-pukovnika Brice Houdeta i poželjela mu uspješnu misiju u BiH. Tokom susreta izraženo je obostrano zadovoljstvo dosadašnjom saradnjom, kao i uvjerenje da će se ona nastaviti i proširiti s ciljem jačanja mira i stabilnosti što je temelj za napredak i razvoj Sarajeva i BiH.

Gradonačelnica je komandanta EUFOR-a upoznala sa aktuelnim gradskim infrastrukturnim projektima i vizijama budućeg razvoja bh. prijestolnice. Ukazala je na saradnju sa bh. gradovima i gradonačelnicima Banja Luke, Mostara i Bijeljine, te na saradnju na regionalnom i međunarodnom nivou.

Složili su se da je uloga lokalnih zajednica vrlo značajna u tranziciji BiH i njenom putu u EU, a Grad Sarajevo tu svakako treba imati svoje značajno mjesto.

Gradonačelnica se zahvalila EUFORU na onome što radi za BiH, a Houdet je istakao da je EUFOR prisutan do osiguranja potpune sigurnosti i stabilnosti i da neće dozvoliti da se BiH ponovi situacija kao 90-tih godina. Sagovornici su se dotakli i trenutne ekonomske krize, te investicija i investitora koji se povlače zbog trenutno nestabilne situacije u državi.

Oproštajna posjeta ambasadora SAD u BiH, Erica Nelsona, 25.01.2022.

Tokom oproštajne posjete ambasadora SAD Erica Nelsona, upriličene 25.01.2022., gradonačelnica Grada Sarajeva Benjamina Karić zahvalila je na svemu što je ovaj izuzetni čovjek i diplomata, tokom svog mandata, zajedno sa Vladom i narodom SAD-a, učinio za grad Sarajevo i državu BiH.

Gradonačelnica je istakla da Grad Sarajevo ima istinskog i velikog prijatelja u Ambasadi SAD-a pri realizaciji brojnih projekata u interesu građana našeg grada. Pogotovo se osvrnula na podršku projektu „Sarajevo bez mina“, kojim je bh. prijestolnica i njena šira regija, nakon više od dva desetljeća, očišćena od neeksplozivnih sredstava zaostalih iz rata.

Gradonačelnica je ambasadoru uručila Zahvalnicu Grada Sarajeva za značajan doprinos unaprjeđenju imidža Grada Sarajeva kao humane sredine i zalaganje u razvoju demokratskih procesa.

Američki ambasador je kazao da mu je izuzetna čast što je dobio ovo priznanje od Sarajeva. Izrazio je zadovoljstvo napretkom i razvojem glavnog grada BiH, istakavši da će i dalje raditi na promociji vrijednosti Sarajeva. Ambasador je na kraju prijema zahvalio na podršci aktivnostima Ambasade SAD-a u Sarajevu te izrazio uvjerenje da će uspješna saradnja sa gradskom administracijom biti nastavljena i sa njegovim nasljednikom.

Susret sa ambasadorom NR Kine Ji Pingom povodom Kineske Nove godine, 31.01.2022.

Povodom Kineske Nove otvorena je „Zona kineske kulture“ na platou ispred Sarajevo City Centra, 31.01.2022. Događaju je prisustvovala gradonačelnica Grada Sarajeva Benjamina Karić koja je uputila čestitku ambasadoru Ji Pingu, uposlenicima Ambasade i prijateljskom narodu NR Kine. Osim toga, uputila je pozdrave i podršku olimpijskom Pekingu, u kojem su 4. februara počele 24. Zimske olimpijske igre, istakavši da Sarajevo i Peking baštine bogatu tradiciju olimpizma i snažni olimpijski moto „brže, bolje, snažnije“ te promoviraju kulturu sporta i zajedništva. Kazala je da je povezanost preko sporta još je više osnažena uspješnom saradnjom u svim sferama života, u korist naših građanki i građana.

Gradonačelnica se zahvalila Ambasadi NR Kine, Kineskoj dobrotvornoj federaciji, Kineskoj mreži nevladinih organizacija za međunarodnu razmjenu i Kineskoj fondaciji za mir i razvoj na vrijednoj donaciji paketa koji su se sastojali od zaštitne opreme za borbu protiv pandemije koronavirusa, a koja će biti uručena onima kojima je potrebna.

Ceremoniji je prisustvovao i predsjednik Olimpijskog komiteta BiH Marijan Kvesić.

Sastanak sa ambasadorom Republike Slovenije Damijanom Sedarom, 08.02.2022.

Ambasador Republike Slovenije u BiH Damijan Sedar bio je gost gradonačelnice Grada Sarajeva Benjamine Karić u Vijećnici 08.02.2022. Nastupna posjeta ambasadora Sedara Gradu Sarajevu, u septembru 2021. rezultirala je dogovorom o intenziviranju saradnje, posebno glavnih gradova, a tokom današnjeg sastanka razgovaralo se o privrednim, kulturnim i sportskim vezama Sarajeva i Ljubljane, te vizijama njihovog budućeg razvoja.

Ambasador se zanimao za aktuelne projekte gradske administracije na čelu sa gradonačelnicom Karić, te je govorio o izložbi pod nazivom „I Feel Slovenia“ koju će Ambasada Slovenije organizirati u Vijećnici povodom obilježavanja 30 godina nezavisnosti Republike Slovenije i drugog predsjedavanja Republike Slovenije Vijećem EU.

Tokom razgovora, ambasador je predložio da se u ime sjećanja na pokojnog bosansko – slovenskog pisca (1945-2021) Josipa Ostija, po njemu nazove neka ulica, postavi spomen ploča ili nekim prikladnim događajem svake godine obilježi sjećanje na njega.

Ambasador je također predložio da se u Sarajevu obilježi 20. maj, dan koji su Ujedinjene nacije proglasile Danom pčela, te da Grad Sarajevo zagovara ideju zaštite pčela i bolji odnos prema njima. Kazao je da je tim povodom u Sloveniji planirano sađenje medonosnih biljaka 26. maja.

Gradonačelnica je pomenula projekat čišćenja korita rijeke Miljacke i uređenja mostova cvijećem početkom marta, te je ambasador predložio da to budu medonosne biljke.

Sastanak sa otpravnikom poslova Ambasade Ukrajine, Serhii Miniaiom, 04.03.2022.

Gradonačelnica Grada Sarajeva Benjamina Karić razgovarala je u Vijećnici sa otpravnikom poslova Ambasade Ukrajine u BiH Serhii Miniaiom 04.03.2022. Poručila je da je Grad Sarajevo odlučan pružiti pomoć Kijevu i ukrajinskom narodu, te da će na njenu inicijativu, iz rezerve planirane Budžetom za 2022. godinu, biti uplaćeno 20.000 KM Kijevu za pomoć stanovništvu.

Dodala je da Sarajevo kao grad koji je preživio agresiju, opsadu, velike ljudske gubitke i najbrutalnija ratna razaranja, ima solidarnost i empatiju za narod Ukrajine.

U znak podrške, Vijećnica je bila osvijetljena bojama ukrajinske zastave krajem februara mjeseca.

Sastanak sa komandanticom NATO Štaba Sarajevo, 11.03.2022.

Gradonačelnica Grada Sarajeva Benjamina Karić ugostila je brigadnu generalicu Pamelu McGaha, komandanticu NATO Štaba Sarajevo, 11.03.2022. godine. McGaha je u decembru 2021. godine preuzela komandu od Erica Folkestada.

Uz želje za nastavkom saradnje, gradonačelnica Karić poželjela je komandantici uspjeh u izvršenju dodijeljene misije, uvjereni da će zajedno raditi na jačanju mira, političke i nacionalne stabilnosti u našoj zemlji, te sveobuhvatnom razvoju njenog glavnog grada.

Komandantica je poručila da NATO u ovim izazovnim vremenima ostaje u potpunosti posvećen očuvanju mira i prosperiteta na Zapadnom Balkanu i u Bosni i Hercegovini.

Radni sastanak sa predstavnicima Ambasade Republike Bugarske, 18.03.2022.

Pomoćnik gradonačelnice Grada Sarajeva za lokalno poslovanje Elvir Hadžiahmetović, održao je 18.03.2022. godine sastanak sa otpravnikom poslova Ambasade Republike Bugarske u BiH Nikolom Nikolovim i savjetnikom u ambasadi Pavelom Strahilovim, na temu organizacije koncerta Sofijske filharmonije u Vijećnici povodom obilježavanja 9. maja, Dana pobjede na fašizmu i Dana Evrope.

S obzirom da se koncert održava u godini kada se obilježava 30 godina od nezavisnosti BiH, koju je Republika Bugarska priznala 15.01.1992. godine, ovo je ujedno i prilika da se Grad Sarajevo

zahvali toj prijateljskoj državi na podršci i solidarnosti iskazanoj u najtežim trenucima u historiji BiH.

Tokom sastanka razgovarano je o osnovnim tehničkim detaljima, a Nikolov je također predložio da se uputi poziv ambasadama zemalja članica EU da na trgu preko puta Vijećnice naprave kutke svojih zemalja pod motom „Ujedinjeni u različitostima“, odnosno sloganom EU za 2022. godinu, 9. maja na Dan Evrope.

Sastanak sa šefom Vojnog dijela Misije BiH pri NATO-u, 07.04.2022.

Šef Vojnog dijela Misije BiH pri NATO-u sa sjedištem u Briselu Edin Fako, susreo se sa gradonačelnicom Grada Sarajeva Benjaminom Karić u Vijećnici 07.04.2022. Razgovarano je o izazovnim vremenima kojima trenutno svjedoči cijela Evropa, sukobima u Ukrajini, važnosti mira i stabilnosti u ovom regionu, ali i o promociji BiH i njene prijestolnice na međunarodnom planu.

Karić je pozdravila iskustvo koje je unutar Oružanih snaga BiH stekao brigadir Fako, ali i angažman koji trenutno provodi. Izrazila je uvjerenje da će se u narednom periodu osnažiti i saradnja sa Gradom Sarajevom koji treba i želi da bude dijelom takvih inicijativa.

Prijem ambasadorice Kraljevine Španije Marie Terese Lizaranzu Perinat, 29.04.2022.

Gradonačelnica Grada Sarajeva Benjamin Karić je zajedno sa zamjenicima Anjom Margetić i Harisom Bašićem primila ambasadoricu Kraljevine Španije u BiH María Teresa Lizaranzu Perinat u Vijećnici 29.04.2022. godine.

Gradonačelnica je upoznala ambasadoricu sa projektima koje je Grad Sarajevo implementirao i koje planira implementirati u oblasti infrastrukture kao što je obnova opservatorija na Trebeviću i kasarne Jajce. Sagovornice su se složile da su kultura i sport oblasti s najviše potencijala za saradnju, s obzirom na zajedničku kandidaturu Grada Barcelone i Grada Sarajeva za Olimpijske igre 2030. Gradonačelnica je izrazila uvjerenje u uspješnu realizaciju ovog događaja s obzirom na bogato iskustvo i olimpijsku infrastrukturu Grada Sarajeva, te istakla da će to biti jedna od tema na koju će razgovarati s gradonačelnicom Colau tokom službene posjete Gradu Barceloni.

Ambasadorica je ponovila da Španija pozdravlja ideju zajedničkog nastupa, ali i rekonstrukcije bob staze na Trebeviću, uvjerenja da će obnova infrastrukture doprinijeti razvoju vrhunskog sporta i turizma u Sarajevu.

Gradonačelnica Karić je još jednom zahvalila na pomoći koju je Vlada Španije pružila za obnovu Vijećnice, jednog od gradskih simbola.

Sastanak sa otpravnikom poslova u Ambasadi Republike Sjeverne Makedonije, 04.05.2022.

Gradonačelnica Grada Sarajeva Benjamin Karić održala je sastanak sa otpravnikom poslova Ambasade Republike Sjeverne Makedonije Rexhepom Saliuom, u Vijećnici 04.05.2022. godine. Tokom susreta razgovarano je dosadašnjoj uspješnoj saradnji Sarajeva i Skoplja, temeljenoj na Sporazumu o bratimljenju dva glavna grada potpisanom u novembru 2017. godine.

Ocijenjeno je da tradicionalno dobre prijateljske odnose treba dodatno osnažiti i proširiti, posebno u oblasti kulture, turizma, te razmjenom i promocijom autentičnih kulturno-historijskih vrijednosti dva grada.

Sagovornici su se složili da je regionalna i međugradska povezanost jedan od temelja razvoja i unapređivanja odnosa kroz realizaciju projekata na svim poljima od interesa za građane Sarajeva i Skoplja.

Tema sastanka bila je i ustupanje prostorija makedonskom kulturno informativnom centru, za što je dogovoren sastanak sa načelnikom Općine Centar, na kojem bi prisustvovali svi relevantni subjekti, gradonačelnica Sarajeva, načelnik Općine Centar, ambasador Republike Sjeverne Makedonije kao i otpravnik poslova u Ambasadi Republike Sjeverne Makedonije.

Sastanak sa otpravnikom poslova Republike Ukrajine Serhii Miniailom, 04.05.2022.

Gradonačelnica Grada Sarajeva Benjamina Karić održala je sastanak sa otpravnikom poslova Ambasade Republike Ukrajine Serhijem Miniailom, u Vijećnici 04.05.2022. godine. Tokom susreta razgovarano je o trenutnoj situaciji u Ukrajini kao i o mogućnosti posjete gradonačelnice Gradu Kijevu.

Tema sastanka bila je inicijativa Ambasade Ukrajine da se sarajevska ulica Urijan Dedina, u kojoj je smještena ambasada i konzulat Ruske Federacije, preimenuje u Ukrajinsku ulicu. Obzirom da Grad Sarajevo kao institucija nema nadležnost imenovanja ulica i trgova, gradonačelnica je otpravnika poslova uputila na premijera Kantona Sarajevo i na načelnika Općine Centar.

Sastanak sa ambasadoricom Češke Ivanom Hlavsovom (Dani Karla Paržika), 10.05.2022.

Gradonačelnica Grada Sarajeva Benjamina Karić održala je sastanak sa ambasadoricom Republike Češke u BiH Ivanom Hlavsovom, u Vijećnici 10.05.2022. godine. Tema razgovora bila je organizacija kulturne manifestacije u junu 2022. godine, povodom 80. godišnjice od smrti istaknutog češkog arhitekta Karla Paržika. Sastanku su prisustvovala i zamjenica ambasadorice i šefica Odjela za kulturu.

Tim povodom u Vijećnici je 10.06.2022. održana press konferencija na kojoj je predstavljen program manifestacije „Dani Karla Paržika“ koju će od 10. do 17. juna organizirati Ambasada Republike Češke u BiH u partnerstvu sa Gradom Sarajevom. Centralna svečanost bit će premijerno prikazivanje dokumentarnog filma „Karlovo Sarajevo“, koja će biti upriličena 15.06.2022. na dan godišnjice smrti Karla Paržika.

Sastanak sa ambasadorom NR Kine Ji Pingom, Sarajevo, 16.05.2022.

Ambasador NR Kine Ji Ping je zajedno sa gradonačelnicom Grada Sarajeva Benjaminim Karić posjetio ambijent obnovljene Bistričke stanice 16.05.2022. godine, gdje su pogledali muzejsku postavku inspiriranu čuvenim filmom „Valter brani Sarajevo“ koji je najgledaniji film svih vremena u ovoj prijateljskoj zemlji. Razgovaralo se i o planiraju turističke rute „Valter brani Sarajevo“, uz mapiranje lokacija gdje je sniman film, a gdje bi Bistrička postaja bila središnja tačka.

Prijem ambasadorice Republike Francuske Christine Toudic, 17.05.2022.

Gradonačelnica Grada Sarajeva Benjamina Karić ugostila je ambasadoricu Republike Francuske Christine Toudic u Vijećnici 17.05.2022. godine.

Tokom susreta, izraženo je obostrano zadovoljstvo što će se dobre prijateljske veze kao i već postignuta saradnja u oblasti kulture, razmjena zajedničkih ideja i inicijativa nastaviti. Ovom prilikom ambasadorica Francuske darovala je gradonačelnici prvi primjerak Sarajevske Hagade prevedene na francuski jezik.

Karić je zahvalila na ovom simboličnom, ali i veoma dragocjenom poklonu te istaknula da je Sarajevska hagada jedno od najvrjednijih pokretnih kulturnih blaga Bosne i Hercegovine. Dodala je

i da Sarajevsku hagadu doživljavamo kao još jedan doprinos bogatstvu različitosti i osobnosti, koje predstavljaju svojevrsni zaštitni znak grada Sarajeva na šta smo, s razlogom, ponosni.

Sastanak s predstavnicima Ambasade NR Kine/izgradnja Sebilja u Tianjinu, 20.05.2022.

Predstavnici Odjeljenja za međunarodnu saradnju Grada Sarajeva održali su 20.05.2022. sastanak sa predstavnicima Odjeljenja za političke poslove Ambasade NR Kine, Huang Xuejia i Li Yao. Povod sastanka bio je prijedlog za potpisivanje Memoranduma o razumijevanju između Grada Sarajeva i pobratimskog Grada Tianjina, na izgradnji Sebilja u Tianjinu. Prema ovom Memorandumu, Grad Sarajevo bi trebao finansirati idejno rješenje i troškove gradnje Sebilja, a radovi bi trebali biti izvedeni u Tianjinu. Kineska strana je predložila da Memorandum bude potpisan od strane rukovodilaca odjeljenja za međunarodnu saradnju, a ne od gradonačelnika iz proceduralnih razloga.

S tim u vezi, gradonačelnica je 26.05.2022. godine održala radni sastanak sa pravobraniocem Grada Sarajeva, predstavnicima službi za finansije, urbano planiranje, investicijske, stambene i komunalne poslove, i odjeljenja za međunarodnu saradnju.

Na sastanku je dogovoreno da se Ambasadi NR Kine uputi dopis s molbom da se odgodi potpisivanje Memoranduma dok se ne provedu sve neophodne procedure i ne dobije saglasnost Gradskog vijeće Grada Sarajeva, nakon čega bi se izgradnja Sebilja u Tianjinu uvrstila u budžet za 2023. godinu.

Nastupna posjeta ambasadora SAD Michaela Murphyja, 26.05.2022.

Gradonačelnica Grada Sarajeva Benjamina Karić primila je u nastupu posjetu ambasadora SAD Michaela Murphyja 26.05.2022. Gradonačelnica je zahvalila na podršci koju Ambasada SAD-a pruža na očuvanju mira i stabilnosti u BiH. Istakla je da je cilj ove gradske administracije učiniti Grad Sarajevo otvorenim, modernim europskim gradom i upoznala ambasadora Murphyja s projektima koje je Grad Sarajevo implementirao i koje planira implementirati u oblasti infrastrukture (Opservatorija na Trebeviću, Bijela tabija, Gospođicina kuća itd.)

Ambasador je čestitao gradonačelnici na izboru Grada Sarajeva za jednog od 100 klimatski neutralnih gradova i istakao otvorenost američke ambasade da podrži projekte Grada koji imaju za cilj unaprijediti živote građana.

Potpisan Sporazum gradonačelnika i načelnika gradova i općina BiH, Sarajevo, 26.05.2022.

Gradonačelnica Grada Sarajeva Benjamina Karić potpisala je Sporazum gradonačelnika i načelnika gradova i općina BiH „Zajedno u borbi protiv govora mržnje i narativa podjela na društvenim mrežama” u Vijećnici 26.05.2022. godine. Sporazum je dio projekta „Društveni mediji za mir” koji implementira UNESCO uz pomoć Evropske unije, na čelu sa šefom Delegacije EU u BiH Johannom Sattlerom i šefom Ureda UNESCO-a Sinišom Šešumom.

Gradonačelnica Karić je pozvana da se pridruži inicijativi koja ima za cilj promociju slobode izražavanja kao univerzalne vrijednosti. Ovim povodom istaknuta je kvalitetna i intenzivna saradnja koju aktuelna gradska administracija njeguje sa UNESCO-om i Evropskom unijom, ali i brojni programi koje je prethodno podržala u cilju suzbijanja govora mržnje.

Jedan od takvih je „Kliktivizam čini stvarnu promjenu” koji se provodi u okviru poziva Vijeća Evrope i EU, a za čiju realizaciju je Grad Sarajevo sa partnerima aplicirao i dobio sredstva.

Sastanak sa rezidentnom koordinatoricom Ujedinjenih nacija u BiH, Sarajevo, 27.05.2022.

Gradonačelnica Grada Sarajeva Benjamina Karić je 27.05.2022. godine ugostila rezidentnu koordinatoricu UN u BiH dr. Ingrid Macdonald i podsekretarku UN za globalne komunikacije Melissu Fleming. U fokusu razgovora bio je govor mržnje kao temelj podjele društva i sve prisutniji fenomen u savremenoj, digitalnoj eri.

MacDonald je pozdravila odluku predstavnika lokalne vlasti da potpišu Sporazum gradonačelnika i načelnika gradova i općina BiH. Svojim potpisom, gradonačelnica Karić se pridružila ovoj inicijativi koja je dijelom projekta „Društveni mediji za mir“, a koji implementira UNESCO uz pomoć Evropske unije, na čelu sa šefom Delegacije EU u BiH Johannom Sattlerom i šefom Ureda UNESCO-a Sinišom Šešumom.

Gošće su izrazile spremnost biti dijelom procesa koje provodi Grad Sarajevo na čelu sa gradonačelnicom, a koje će doprinijeti boljoj budućnosti bh. prijestolnice na svim poljima.

Otvorenje izložbe o paraolimpijskim prvacima „Prvaci/Prvakinje“, Sarajevo, 31.05.2022.

Gradonačelnica Grada Sarajeva Benjamina Karić i ambasadorica Francuske u BiH Christine Toudic otvorile su izložbu o paraolimpijskim prvacima pod nazivom „Prvaci/Prvakinje „Champion.nes“, u Olimpijskom muzeju 31.05.2022. godine.

Izložba je svojevrsan podsjetnik na vrijednosti olimpizma koje baštini Sarajevo, ali i najava Olimpijskih igara koje će se održati u Parizu 2024. godine. Kroz objektiv četiri fotografa, na izložbi je prikazano četvero sportista: Marie-Amélie le Fur, Arnaud Assoumani, Aya Cissoko i Patricio Manuel. Osim što su prvaci u svojoj disciplini na nacionalnom i međunarodnom nivou, zajedno se zalažu na društvenom planu, za ljudska prava, jednakost spolova i borbu protiv svakog vida diskriminacije.

Nakon otvorenja izložbe, na prijemu u rezidenciji, gradonačelnica Karić i ambasadorica Toudic razgovarale su o aktuelnim projektima Grada Sarajeva, potencijalima naših olimpijskih planina i razvoju zimskog turizma, te nastavku zajedničke organizacije kulturnih manifestacija.

Zahvalnica Grada Sarajeva ambasadoru Velike Britanije Matthew Fieldu, 02.06.2022.

Šef Delegacije Evropske unije i specijalni predstavnik EU u BiH Johann Sattler bio je domaćin oproštajne večere u čast N.J.E. Matthew Fielda 02.06.2022. godine. Prijemu je prisustvovala i gradonačelnica Grada Sarajeva Benjamina Karić koja je Fieldu uručila Zahvalnicu Grada Sarajeva.

Prijem ambasadorice Kanade Caroline Charette, Sarajevo, 06.06.2022.

Zamjenik gradonačelnice Grada Sarajeva Haris Bašić primio je 06.06.2022. godine ambasadoricu Kanade za BiH, Sloveniju i Mađarsku Caroline Charette. Tokom susreta, razgovarano je o bilateralnim i prijateljskim odnosima dviju zemalja, aktuelnoj političkoj situaciji, projektima koje vodi gradska administracija, ali i dugoročnoj viziji razvoja bh. prijestolnice.

Zamjenik Bašić je predložio uspostavljanje bliže saradnje sa Ottawom i drugim kanadskim gradovima te zahvalio ambasadorici na dosadašnjoj podršci koju Kanada pruža BiH i velikom broju njenih građana koji djeluje u okviru aktivnih udruženja, ali i našem putu ka članstvu u euroatlantske integracije.

Sagovornici su se složili da je zajednička misija uprave Grada, ali i svih njegovih prijatelja, da Sarajevo ostane prostor u kojem će se promovirati demokratija, zajedništvo i otvoreni dijalog.

Nabavljena oprema za Zavod Mjedenica uz podršku Ambasade Slovačke, maj 2022.

U sklopu projekta „Jednako obrazovanje za sve“, Grad Sarajevo je uz podršku Ambasade Slovačke i SlovakAid, nabavio novu opremu za kineziološki i logopedski kabinet u Zavodu Mjedenica. Ovim je dat doprinos unaprjeđenju sistema edukacije i rehabilitacije za djecu sa poteškoćama u razvoju, kako bi Zavod mogao pružiti usluge kompletne fizikalne i logopedske terapije za aktualne i buduće generacije koje će pohađati ovu ustanovu.

Predstavljanje francuskog prijevoda Sarajevske Hagade, Sarajevo, 28.6.2022.

Na poziv ambasadorice Republike Francuske u BiH Christine Toudic, gradonačelnica Grada Sarajeva Benjamina Karić prisustvovala je predstavljanju sarajevske Hagade na francuskom jeziku, koje je u organizaciji Francuske ambasade, ureda UNESCO-a u Sarajevu i Zemaljskog muzeja, bila upriličena u Zemaljskom muzeju Bosne i Hercegovine 28.06.2022. godine.

Oproštajna posjeta ambasadora Irske za BiH Mylesa Geirana, 30.06.2022.

Gradonačelnica Grada Sarajeva Benjamina Karić primila je 30.06.2022. godine u oproštajnu posjetu Myles Geirana, nerezidentnog ambasadora Irske za BiH sa sjedištem u Sloveniji. Karić je ambasadoru Geiranu zahvalila na njegovom zalaganju u razvoju bilateralnih veza između dvije zemlje, te za podršku koju Irska pruža BiH u procesu evroatlantskih integracija.

Ambasador Geiran izrazio je uvjerenje da će dvije zemlje i u predstojećem periodu raditi na unapređenju bilateralnih odnosa u svim sferama od obostranog interesa, a na temeljima međusobnog uvažavanja kao što su to činile i do sada.

Tokom susreta u Vijećnici gradonačelnica Karić i ambasador Geiran razmijenili su mišljenja o značaju i ulozi uvezivanja glavnih gradova Sarajeva i Dablina, te bh. zajednice u ovoj prijateljskoj zemlji.

Prijem ambasadora Republike Indonezije Roema Konoa, 15.07.2022.

Gradonačelnica Grada Sarajeva Benjamina Karić upriličila je prijem za ambasadora Republike Indonezije u BiH Roema Konoa, u Vijećnici 15.07.2022. godine. Tokom susreta, izraženo je obostrano zadovoljstvo dosadašnjim bilateralnim vezama između dvije zemlje, kao i njihovih prijestolnica.

Gradonačelnica Karić je istakla da su prijateljski odnosi sa Indonezijom tradicija koju će Sarajevo i dalje njegovati, te zahvalila na svemu što je Vlada sa Ambasadorom Indonezije učinila za BiH, a posebno za Sarajevo.

Tokom prijema izražena je želja da se ostvari saradnja Grada Sarajeva sa indonežanskim gradovima, pogotovo sa gradovima Bandung i Bogor zbog bogate historije i kulturno-historijskog naslijeđa. Ambasador Kono je kazao da će pružiti i punu podršku uspostavljanju kontakata i sa pokrajinom Bali.

Sastanak sa Visokim predstavnikom u BiH Christianom Schmidtom, 15.07.2022.

Gradonačelnica Grada Sarajeva Benjamina Karić održala je sastanak sa Visokim predstavnikom u BiH Christianom Schmidtom u sjedištu OHR-a 15.07.2022. godine.

Tokom razgovora, gradonačelnica Karić je još jednom izrazila zahvalnost Visokom predstavniku na njegovim riječima podrške i ohrabrenja, upućene pred Vijećem sigurnosti UN-a. Tokom susreta

dotakli su se tema vezanih za gradske projekte, aktuelnu političku situaciju u Bosni i Hercegovini, borbu protiv korupcije, predstojeće izbore i sl.

Složili su se da ta borba mora da polazi iz glavnog grada, Sarajeva koji treba da bude generator razvoja, lider napretka i sidro stabilnosti Bosne i Hercegovine.

Prvi indonezijski vikend u Sarajevu, 29.07.2022.

Gradonačelnica Grada Sarajeva Benjamina Karić je zajedno sa ambasadorom Indonezije Roemom Konom otvorila prvi Indonezijski vikend u Sarajevu 29.07.2022. godine ispred BBI-a.

U svom obraćanju Karić je istakla zadovoljstvo što će građani i gosti Sarajeva imati priliku vidjeti i uživati u umjetničkim izvedbama karakterističnim za različite regije ove zemlje, te probati neke od indonezijskih specijaliteta. Ovakvi projekti su još jedna potvrda prijateljskih veza koje Bosna i Hercegovina sa svojim glavnim gradom baštini već dugi niz godina sa Indonezijom.

Prijem ekonomskog savjetnika Ambasade Češke Republike Aleša Ottmara, 31.08.2022.

Gradonačelnica Grada Sarajeva Benjamina Karić primila je 31.08.2022. godine Aleša Ottmara, ekonomskog savjetnika Ambasade Češke Republike u Sarajevu. Ottmar je gradonačelnici predstavio viziju djelovanja na ovoj funkciji, uz osvrt na dosadanju uspješnu saradnju sa Gradom.

Tim povodom, gradonačelnica je istakla da aktuelna gradska administracija kontinuirano ulaže u smart city strategiju i njenu implementaciju u Sarajevu.

Jedna od tema razgovora bila je i konferencija o pametnim gradovima koju organizira Ministarstvo industrije i trgovine Češke Republike, a povodom njenog predsjedavanja EU. Konferencija je namijenjena gradovima država Zapadnog Balkana i održat će se u Pragu od 16. do 18.11.2022. godine.

Nastupna posjeta šefa Misije OSCE-a u BiH, ambasadora Briana Aggelera, 21.10.2022.

Gradonačelnica Grada Sarajeva Benjamina Karić i predsjedavajući Gradskog vijeća Jasmin Ademović sastali su sa delegacijom Misije OSCE-a koju je predvodio novoimenovani šef Misije OSCE-a u BiH ambasador Brian Aggeler, u Vijećnici 21.10.2022. godine.

Ambasadoru su čestitali na preuzimanju mandata i poželjeli mu uspjeh u radu te iskazali svoje očekivanje da će Grad Sarajevo i u budućnosti nastaviti uspješnu saradnju sa Misijom OSCE-a u BiH, podsjećajući na posljednji primjer saradnje pri donošenju Nacrta novog Etičkog kodeksa izabranih i imenovanih funkcionera Grada Sarajeva koji je trenutno u fazi javne rasprave.

Gostima su predstavljene infrastrukturni projekti Grada Sarajeva, a posebno je istaknut značaj poboljšanja transparentnosti rada, te unaprjeđenja komunikacije i koordinacije Grada Sarajeva sa jedinicama lokalne samouprave u BiH, ali i sa gradovima Evrope i svijeta. Ambasador Aggeler je upoznat i sa potrebom Grada Sarajeva za podrškom kod donošenja regulacionih planova u smislu unaprjeđenja transparentnosti čitavog postupka. Razgovarano je i o rezultatima Općih izbora, o nametnutim rješenjima visokog predstavnika Christiana Schmidta u smislu izmjena i dopuna Izbornog zakona BiH, te amandmana na Ustav FBiH.

Gradonačelnica je govorila i o njegovanju kulture sjećanja podizanjem spomenika svim civilnim žrtvama rata, kao i o afirmaciji žena kao ravnopravnih nositeljica visokih političkih funkcija, te je zamolila za podršku OSCE-a i u vezi ovih pitanja.

Aggeler je istakao otvorenost i spremnost OSCE-a u pružanju podrške na unapređenju stanja u brojnim oblastima koje se tiču građana i njihovih prava, a da ga na tom putu ohrabruje mlada gradska administracija na čelu sa gradonačelnicom Karić i predsjedavajućim Ademovićem.

Sastanku je prisustvovala delegacija koju su činili Samra Ramić, vršilac dužnosti šefa Ureda u Sarajevu, Mathieu Lemoine, šef Ureda za planiranje politike rada Misije OSCE-a u BiH, te Ivan Lupis, šef Ureda za ljudsku dimenziju.

Nastupna posjeta ambasadora Republike Armenije Ashota Hovakimiana, 21.10.2022.

Gradonačelnica Grada Sarajeva Benjamina Karić primila je 21.10.2022. godine u nastupnu posjetu izvanrednog i opunomoćenog ambasadora Republike Armenije za BiH Ashota Hovakimiana, sa sjedištem u Pragu, koji je u BiH boravio povodom predaje akreditivnih pisama predsjedavajućem Predsjedništva BiH.

Nakon što je ambasadoru poželjela uspješan mandat, gradonačelnica je govorila o značaju ove godine u kojoj je obilježena 30. godišnjica nezavisnosti BiH i 30. godišnjica od opsade Sarajeva. Također je predstavila infrastrukturne projekte Grada. Ambasador Hovakimian je čestitao na preporuci da BiH dobije kandidatski status i istakao da BiH treba biti dio Europske unije

Sagovornici su izrazili otvorenost i spremnost za uspostavljanje saradnje između bh. prijestolnice i armenijskih gradova u raznim oblastima poput privrede, turizma i sl. Tokom susreta je razgovarano o aktuelnoj političkoj situaciji i njenom uticaju na globalnom nivou.

Gradonačelnica je pozvala ambasadora na obilježavanje 6. aprila – Dana grada i SFF iduće godine.

Oproštajna posjeta ambasadora Japana N.J.E. Ito Makota, Sarajevo, 22.11.2022.

Gradonačelnica Grada Sarajeva Benjamina Karić primila je 22.11.2022. godine u oproštajnu posjetu ambasadora Japana Ito Makota. Ističući dobre bilateralne odnose zemalja, Karić je ambasadoru i ovoj prijateljskoj zemlji zahvalila na značajnoj ulozi u rekonstrukciji BiH i njenog glavnog grada. Ambasador je poručio da odlaskom ne prestaje njegova misija u bh. prijestolnici, uvjeren da će Sarajke i Sarajlije, uz aktuelnu gradsku administraciju na čelu sa gradonačelnicom Karić, uživati dugoročno pozitivne promjene.

Nastupna posjeta ambasadora Irske za BiH Adriana Farrella, Sarajevo, 01.12.2022.

Gradonačelnica Grada Sarajeva Benjamina Karić primila je 01.12.2022. godine u nastupnu posjetu ambasadora Irske za BiH Adriana Farrella te mu poželjela uspješan diplomatski mandat. Gradonačelnica je pozdravila prijateljske odnose naše dvije zemlje uz nadu da će se oni produbiti u kontekstu procesa integracije BiH u EU. Kazala je da dosadašnja saradnja na nivou obrazovnih institucija i podrška u očuvanju kulture sjećanja treba da budu primjer za međusobni odnos na svim poljima.

Ambasador Farell čestitao je na aktivnostima Sarajeva i BiH na rezultatu dobivanja preporuke Evropske komisije za kandidatski status, te istakao da su mir i stabilnost suštinski važni.

Sastanak s ambasadorom AR Egipt Yasserom Abdelrahmanom Ali Sorourom, 12.12.2022.

Gradonačelnica Grada Sarajeva Benjamina Karić primila je ambasadora Arapske Republike Egipt u BiH Yassera Abdelrahmana Ali Sorura 12.12.2022. godine. Gradonačelnica Karić i ambasador

Sorour izrazili su zadovoljstvo dosadašnjom saradnjom između Sarajeva i Kaira i složili se da bi se ona trebala dodatno osnažiti i proširiti obnavljanjem Sporazuma o saradnji između Grada Kaira i Grada Sarajeva, koji je potpisan 2006. godine. Razgovarano je o unapređenju saradnje u oblasti promocije turizma i kulture dvije zemlje putem organizacije kulturnih manifestacija i gostovanja umjetnika iz dva grada, prikazivanja filmova i sl. Gradonačelnica je informirala ambasadora da će Gradsko vijeće Grada Sarajeva na decembarskoj sjednici razmatrati Odluku o davanju saglasnosti za potpisivanje Memoranduma o razumijevanju između Grada Kaira i Grada Sarajeva. Ambasador Sorour je pozvao gradonačelnicu da posjeti Kairo iduće godine i izrazio nadu da će tom prilikom biti potpisan i Sporazuma o saradnji između Grada Kaira i Grada Sarajeva.

Nastupna posjeta ambasadora SR Njemačke dr. Thomasa Fitschena, 14.12.2022.

Gradonačelnica Grada Sarajeva Benjamina Karić primila je 14.12.2022. godine u nastupnu posjetu ambasadora SR Njemačke u BiH Thomasa Fitschena, kojem je poželjela dobrodošlicu i uspjeh u obavljanju nove dužnosti.

Gradonačelnica je zahvalila narodu i vladi SR Njemačke na podršci koju pruža BiH, te je ambasadora upoznala sa položajem, nadležnostima i finansiranjem Grada Sarajeva, uvjeren da će njegov diplomatski angažman doprinijeti jačanju saradnje.

Ambasador Fitschen je poručio da je Njemačka bila i ostala prijatelj BiH, njene političke stabilnosti, većeg investiranja i ekonomskog razvoja te da vjeruje u pozitivne promjene koje će donijeti aktualna gradska administracija na čelu sa gradonačelnicom Karić.

PRIJEMI VISOKIH EVROPSKIH ZVANIČNIKA I DIPLOMATA

Sastanak sa članom Britanskog parlamenta Richardom Grahamom, 20.01.2022.

Gradonačelnica Grada Sarajeva Benjamina Karić primila je 20.01.2022. godine Richarda Grahama, člana Britanskog parlamenta i predsjedavajućeg Odbora Westminster fondacije za demokratiju (WFD), koji je boravio u posjeti BiH i njenom glavnom gradu. U njegovoj pratnji bili su Emil Atanasovski, direktor WFD za Zapadni Balkan i Nermina Voloder, direktorica WFD u BiH.

Razgovarano je o izazovnim političkim vremenima, jačanju mira i stabilnosti, ali i prioritetima i projektima gradske vlasti u narednom periodu. Karić je iskazala opredjeljenje aktuelne administracije da u budućnosti jača saradnju i partnerske odnose kako sa vladom Ujedinjenog Kraljevstva i Gradom Londonom, tako i sa ostalim evropskim glavnim gradovima.

Graham je istakao da u novom rukovodstvu Grada Sarajeva na čelu sa gradonačelnicom Karić vidi veliki potencijal i sjajan primjer mladih političkih predstavnika koji treba da budu poziv narednim generacijama da se aktivnije uključe u društveni i politički život.

Gradonačelnica Sarajeva je prihvatila poziv g. Grahama da kao govornik učestvuje na konferenciji za koju je planirano da se održi u Vijećnici tokom 2022. godine. Cilj ove konferencije je da prikaže snažne i uspješne žene koje su napravile pozitivne promjene u lokalnim zajednicama u BiH, te da se glasači motivišu da izglasaju više žena u zakonodavna tijela u BiH.

Inače, Westminster fondacija je najveća britanska fondacija koja djeluje u 30 zemalja širom svijeta. U Bosni i Hercegovini ima registrovan ured od 2014. godine koji implementira programe za jačanje političkog učešća žena i uključivanje mladih u politički dijalog, te saraduje sa političkim partijama, javnim institucijama i organizacijama civilnog društva.

Sastanak sa predstavnicima Odbora za vanjsku politiku Britanskog parlamenta, 27.01.2022.

Benamina Karić, Mario Kordić i Jasmin Imamović, gradonačelnici Sarajeva, Mostara i Tuzle, sastali su se 27.01.2022. godine sa predstavnicima Odbora za vanjsku politiku Britanskog parlamenta koji su boravili u zvaničnoj posjeti BiH i njenom glavnom gradu.

Razgovarano je o izazovnim političkim vremenima u BiH koji zahtijevaju odgovornu i transparentnu upravu, predane i odlučne gradonačelnike sa konkretnim vizijama. Partnerstvo bh. gradova značajno može doprinijeti provedbi političkih i ekonomskih reformi. Gosti iz Britanije iskazali su interes za situaciju u BiH, kao i za prioritet gradskih vlasti u narednom periodu.

U delegaciji Odbora za vanjsku politiku britanskog parlamenta su bili Tom Tugendhat, Liam Byrne, Neil Coyle, Alicia Kearns, Bob Seeley, Henry Smith, Royston Smith, Graham Stringer, te ambasador Velike Britanije u BiH Matthew Field.

Sastanak sa zastupnicom u Nacionalnom vijeću Parlamenta Austrije, Sarajevo, 21.02.2022.

Gradonačelnica Grada Sarajeva Benamina Karić primila je 21.02.2022. godine zastupnicu u Nacionalnom vijeću Parlamenta Austrije Ewu Ernst Dziedzic. Sagovornice su istakle opredjeljnost BiH za ulazak u EU i NATO, što je ocijenjeno kao garant stabilnosti, sigurnosti i povećanja investicija u BiH.

Tokom sastanka, razgovarano je o dosadašnjoj vrlo uspješnoj saradnji između BiH i Republike Austrije koje vežu duge historijske i prijateljske veze, kao i posjeti gradonačelnice Sarajeva Gradu Beču 21.03.2022., kao i projektima Grada Sarajeva koji će biti tema razgovora s g. Ludwigom: smart city, inovacije, održivi razvoj, urbana mobilnost, nastavak saradnje sa Urban Innovation Vienna – agencijom Grada Beča za smart city pitanja i inovacije, zajedničko apliciranje Grada Sarajeva i Grada Beča na pozive Horizon (program EU za istraživanje i inovacije).

Ewa Ernst Dziedzic je predložila da delegacija Grada Sarajeva u okviru službene posjete Gradu Beču posjeti i Parlament Austrije. Gradonačelnica je pozvala gđu Dziedzic da bude gost Grada Sarajeva tokom proslave 6. aprila – Dana Grada Sarajeva.

Posjeta ministrice vanjskih poslova SR Njemačke Annalene Baerbock, 10.03.2022.

Gradonačelnica Grada Sarajeva Benamina Karić ugostila je 10.03.2022. ministricu vanjskih poslova SR Njemačke Annalenu Baerbock. U fokusu razgovora bila je aktuelna politička situacija, kao i stabilan, snažan i funkcionalan Zapadni Balkan koji, kao takav, predstavlja jedini i pravi put boljem razumijevanju i ekonomskom prosperitetu.

Ministrica Baerbock potvrdila je da je SR Njemačka prijatelj BiH i da je oduvijek bila među zemljama koje zagovaraju njen put u EU.

Tokom susreta razmatrale su se i opcije za uspostavljanjem veza Sarajeva sa njemačkim glavnim gradom Berlinom, koje bi diplomatijom gradova dodatno osnažile odnose između BiH i Njemačke.

Prijem zastupnika u Parlamentu Kraljevine Danske Larsa Aslana Rasmussena 11.03.2022.

Gradonačelnica Grada Sarajeva Benjamina Karić sa zamjenikom Harisom Bašićem primila je 11.03.2022. godine Larsa Rasmussena, zastupnika u Parlamentu Kraljevine Danske i predsjedavajućeg Parlamentarne skupštine Vijeća Evrope, koji je došao u pratnji ambasadorice Kraljevine Danske za BiH Susanne Shine.

S obzirom na interesovanje koje je iskazao parlamentarac Rasmussen, Karić ga je ukratko upoznala sa trenutnom društvenom i političkom situacijom u BiH i Sarajevu, osvrnuvši se na uređenje i upravljanje gradom i državom, kao aktivnostima koje se vode u cilju ulaska BiH u EU i NATO, što bi doprinijelo sigurnosti, političkoj stabilnosti i većem investiranju i ekonomskom razvoju. Gradonačelnica je govorila i o značaju međugradske diplomatije i dijaloga, kao i o otvorenosti Grada Sarajeva za saradnju sa Mostarom i Banja Lukom u projektima od zajedničkog interesa. Pri tome, dodala je da Grad Sarajevo intenzivno radi na podizanju nivoa međunarodne saradnje i to, posebno, sa glavnim gradovima, među kojima je i danska prijestolnica Kopenhagen.

Zamjenik gradonačelnice Bašić je zahvalio Kraljevini Danskoj na svemu što čini za BiH, te uputio apel da podrži BiH na njenom putu u EU.

Sagovornici su naglasili da bh. dijaspora u Danskoj predstavlja most između dvije zemlje koji može značajno doprinijeti jačanju bilateralnih odnosa, te promociji potencijala BiH u ovoj prijateljskoj zemlji.

Prijem ministrice za Slovence u inostranstvu Helene Jaklitsch u Vijećnici 13.03.2022.

Zamjenica gradonačelnice Grada Sarajeva Anja Margetić, ugostila je 13.03.2022. godine ministricu za Slovence u inostranstvu Helenu Jaklitsch. Prilikom obilaska Vijećnice razgovarale su o planiranim projektima grada Sarajeva, slovenačke zajednice i njenoj potrebi za većim društvenim prostorima u gradu, te dogovorili sastanak u Uredu za Slovence u inostranstvu.

Prijem sekretara za odnose s državama pri Državnom tajništvu Svete Stolice, 18.03.2022.

Gradonačelnica Grada Sarajeva Benjamina Karić primila je 18.03.2022. godine sekretara za odnose s državama pri Državnom tajništvu Svete Stolice, nadbiskupa Paula Richarda Gallaghera, koji je boravio u zvaničnoj posjeti BiH.

Gradonačelnica Karić i nadbiskup Gallagher dotakli su se više tema te istakli da su glavne vrijednosti svakog društva, a na kojima treba više raditi – jedinstvo, međureligijski i socijalni dijalog, sloga i otvorenost za sve kulture i sve religije na ovim prostorima. Karić je upoznala nadbiskupa sa trenutnom situacijom u Sarajevu i njegovim razvojem i napretkom, naglašavajući perspektivu našeg grada i države u Evropskoj uniji.

Prijem delegacije Odbora za evropske poslove Zastupničkog doma Nizozemske, 25.03.2022.

Zamjenici gradonačelnice Grada Sarajeva Haris Bašić i Anja Margetić sastali su se 25.03.2022. godine sa delegacijom Odbora za evropske poslove Zastupničkog doma Kraljevine Nizozemske koja je boravila u zvaničnoj posjeti BiH i njenom glavnom gradu.

Tokom prijema razgovarano je o kapitalnim projektima Grada Sarajeva, aktuelnoj političkoj situaciji u BiH i integracijama naše zemlje u Evropsku uniju. Dogradonačelnici Bašić i Margetić su goste upoznali sa historijom i značajem Vijećnice, svjetskog simbola susreta civilizacija koji predstavlja potvrdu dostojanstva i nesalomljivog duha grada Sarajeva i BiH.

U delegaciji Odbora za vanjsku politiku Zastupničkog doma Kraljevine Nizozemske bili su Attje Kuiken, Ruben Brekelmans, Jasper van Dijk, Kati Piri, Corinne Ellemeet, Tunahan Kuzu, Jan Paternotte i Renée Konings. Prijemu je prisustvovao nizozemski ambasador u BiH Jan Waltmans.

Posjeta predsjednika Evropskog suda za ljudska prava Roberta Spanoa, Sarajevo, 25.03.2022.

Predsjednik Evropskog suda za ljudska prava Robert Spano, koji je boravio u službenoj posjeti BiH, posjetio je gradonačelnicu Grada Sarajeva Benjaminu Karić 25.03.2022. godine. Tokom sastanka razgovarano je o aktuelnoj političkoj situaciji, kako u BiH, tako i Evropi, s posebnim naglaskom na pet presuda Evropskog suda koje se odnose na izbornu zakonodavstvo. Gradonačelnica Karić je istakla da će Grad Sarajevo, u okviru svojih nadležnosti uvijek biti aktivni sudionik uspostave univerzalnog sistema zaštite ljudskih prava, temeljnih sloboda i vladavine prava.

U delegaciji sa predsjednikom Spanom bili su i Faris Vehabović, sudija Evropskog suda za ljudska prava i Anna Austin, jurisconsult.

Posjeta ministrice vanjskih poslova Kraljevine Švedske Ann Linde 12.04.2022.

Dobrodošlicu u Sarajevo i sarajevsku Vijećnicu, gradonačelnica Grada Sarajeva Benjaminina Karić je poželjela Ann Linde, ministrici vanjskih poslova Kraljevine Švedske 12.04.2022. godine.

Gradonačelnica Karić je Linde upoznala sa historijom i značajem Vijećnice, a tokom razgovora dotakle su se tema aktuelne političke situacije u BiH, mira, sigurnosti, ali i osnaživanja žena u politici. Gradonačelnica je podsjetila na izuzetnu pomoć koju su Vlada i narod prijateljske Švedske pružili BiH tokom i nakon agresije, istakavši da je uz pomoć prijatelja iz cijele Evrope, izvjesnija izgradnja stabilnije BiH i njenog glavnog grada.

Uz neupitnu solidarnost i zadovoljstvo činjenicom da je na čelu glavnog bosanskohercegovačkog grada mlada i energična žena, a cijeneći iznimno dobre bilateralne odnose Švedske i naše zemlje, Ann Linde je još jednom istakla punu podršku bh. vlastima te administraciji Grada Sarajeva zahvalila na srdačnom dočeku i konstruktivnom dijalogu.

Posjeta ministra vanjskih poslova Kraljevine Danske Jeppe Kofoda, 06.05.2022.

Gradonačelnica Grada Sarajeva Benjaminina Karić zajedno sa zamjenikom Harisom Bašićem poželjela je 06.05.2022. godine dobrodošlicu u glavni grad BiH ministru vanjskih poslova Kraljevine Danske Jeppe Kofodu, koji je boravio u službenoj posjeti našoj zemlji.

Gradonačelnica je istakla zadovoljstvo što prijateljska Danska i posjetom uvaženog ministra Kofoda, potvrđuje podršku Bosni i Hercegovini u procesu evroatlantskih integracija, te doprinosi snažnoj promociji Bosne i Hercegovine i njene prijestolnice u svijetu.

Ambasador Kofod je u pratnji gradonačelnice i njenog zamjenika imao priliku da svjedoči impresivnom arhitektonskom biseru – sarajevskoj Vijećnici, ljepotama čuvene Bašaršije, živopisnog orijentalnog muzeja, kao i bogomoljama najznačajnijih monoteističkih religija svijeta.

Prijem evropskih parlamentaraca, Sarajevo, 09.05.2022.

Gradonačelnica Grada Sarajeva Benjaminina Karić primila je 09.05.2022. godine europarlamentarce Andreama Schiedera iz Austrije, Dietmara Kostera iz Njemačke i Thijsa Reutena iz Nizozemske koji su boravili u službenoj posjeti našoj zemlji.

Gradonačelnica Karić ih je upoznala sa razvojnim projektima Grada Sarajeva, integratora države Bosne i Hercegovine i značajnog regionalnog centra.

Tokom prijema, sagovornici su se složili da je pravi i jedini put priključenje naše zemlje kao jedne od najstarijih država na evropskom kontinentu, kompoziciji koja vodi ka našem zajedničkom cilju – ujedinjenoj Evropi kojoj i pripadamo.

Susret sa predsjednikom Evropskog vijeća Charles Michelom, 21.05.2022.

Predsjednik Evropskog vijeća Charles Michel boravio je u službenoj posjeti BiH i njenom glavnom gradu. Njegov domaćin u sarajevskoj Vijećnici i šetnji starim dijelom grada 21.05.2022. godine bila je gradonačelnica Grada Sarajeva Benjamina Karić, koja je istakla da ovaj susret vidi kao izuzetno važnu priliku za razgovor o evropskoj budućnosti naše zemlje i njene prijestolnice.

Michel je tokom posjete obavio niz razgovora sa zvaničnicima na nekoliko nivoa s fokusom na nastavak reformi bosanskohercegovačkog puta ka EU te važnosti evropskog jedinstva u kontekstu ruske agresije na Ukrajinu.

Posjeta ministrice vanjskih poslova Velike Britanije Liz Truss, 26.05.2022.

Ministrica vanjskih poslova Velike Britanije Liz Truss boravila je u službenoj posjeti BiH. Tokom susreta sa bh. zvaničnicima, istaknuti su dobri bilateralni odnosi, a šefica britanske diplomatije kazala je da nikada nije bio upitan interes Ujedinjenog kraljevstva da pomogne domaćim bh. vlastima.

Sa gradonačelnicom Grada Sarajeva Benjaminom Karić je 26.05.2022. godine odala počast i položila vijenac na Spomen obilježje ubijenoj djeci opkoljenog Sarajeva 1992.-1995. Sagovornice su se složile da je prijateljska misija i odlučna reakcija Velike Britanije izuzetno važna za prosperitet BiH, njene prijestolnice, ali i cijele regije Zapadnog Balkana.

Susret sa ministrom vanjskih poslova Grčke, Nikos Dendiasom, Sarajevo, 31.05.2022.

Gradonačelnica Grada Sarajeva Benjamina Karić susrela se 31.05.2022. godine s ministrom vanjskih poslova Grčke Nikos Dendiasom. Uz obilazak uže gradske jezgre i sarajevskih simbola, razgovarali su o aktuelnoj političkoj situaciji u BiH, regionu, te unaprjeđenju odnosa dviju zemalja i njihovih prijestolnica.

Karić je pozdravila podršku Grčke zemljama Zapadnog Balkana na putu ka EU, te istakla važnost intenziviranja saradnje sa Atinom i drugim grčkim gradovima, posebno u oblasti kulture.

Šef grčke diplomatije ponovo je iskazao spremnost svoje zemlje da nastavi sa podrškom i pomoći BiH i Sarajevu. Dendias je imao susrete i sa brojnim predstavnicima vlasti u BiH. Razgovori su bili usmjereni na jačanje bilateralne saradnje, evropsku perspektivu Zapadnog Balkana, regionalnu sigurnost i stabilnost, uključujući situaciju u Ukrajini nakon ruske invazije.

Prijem ministrice vanjskih poslova i otvorene uprave Vlade Katalonije, Sarajevo, 03.06.2022.

Gradonačelnica Grada Sarajeva Benjamina Karić poželjela je 03.06.2022. godine dobrodošlicu ministrici vanjskih poslova i otvorene uprave Vlade Katalonije Victoriji Alsini, koja je boravila je u službenoj posjeti BiH i Gradu Sarajevu.

Gradonačelnica je izrazila zahvalnost na podršci koju je Vlada Katalonije predvođena Pasqualom Maragallom i katalonski narod pružio BiH tokom i nakon rata. Upoznala je ministricu s nedavnom posjetom delegacije Grada Sarajeva Barceloni i istakla da bi željela obnoviti i unaprijediti saradnju

posebno u oblastima digitalne transformacije, energetske efikasnosti, zelenih gradova te u oblasti turizma, kulture i sporta.

Ministrica Alsina je istakla da je Vlada Katalonije otvorena za saradnju s Gradom Sarajevom i BiH o čemu svjedoči i Sporazum o saradnji potpisan sa Kantom Sarajevo u okviru kojeg je predviđena saradnja između muzeja i pozorišta dva grada. Gradonačelnica je istakla da je Grad Sarajevo zainteresiran za saradnju u oblasti ženskog sporta i predložila da se organizira uzvratna posjeta ženskih fudbalskih klubova iz Sarajeva i Barcelone te da Olimpijski muzeji organiziraju gostovanja izložbi.

Također je bilo riječi o saradnji između turističkih zajednica iz Sarajeva i Barcelone i obilježavanju 30. godišnjice uspostavljanja prijateljskih odnosa Sarajeva i Katalonije. Ministrica je istakla da bi građani koji su za vrijeme rata bili smješteni kod katalonskih porodica trebali biti nosioci ovog događaja koji bi služio kao podsjetnik na prijateljstvo Sarajeva i Katalonije.

Razgovarano je i o predstojećoj kandidaturi Barcelone za Zimske olimpijske igre. Erick Hauck je istakao da bi u prvoj polovini 2023. trebala biti donesena konačna odluka o domaćinu Olimpijskih igara 2030, te da je predviđena posjeta Španskog nacionalnog olimpijskog komiteta BiH kako bi utvrdili postoje li tehnički preduvjeti za održavanje dijela Igara u Sarajevu.

Gradonačelnica je uputila poziv Alsini na otvaranje 28. SFF-a, a Joan Maria Piqué Fernández iz Ureda Vlade Katalonije je predložio da se katalonski film koji je osvojio prvu nagradu na Berlinskom filmskom festivalu uvrsti u program SFF-a, što je gradonačelnica prihvatila.

Prijem austrijske ministricke pravde Alme Zadić, 05.07.2022.

Gradonačelnica Grada Sarajeva Benjamina Karić ugostila je 05.07.2022. godine austrijsku ministricu pravde bh. porijekla Almu Zadić, sa kojom je razgovarala o brojnim političkim temama. Sagovornice su razgovarale o izazovima sa kojima se susreće BiH, provedbi neophodnih reformi, važnosti sve većeg učešća žena u politici, poduzimanju koraka da se spriječi iseljavanje građana BiH i naročito mladih, ali i naporima koje gradska vlast želi i treba uložiti na putu ka dugoročnim promjenama.

Osvrnule su se na tradicionalno dobre i prijateljske odnose između Austrije i BiH, kao i na podršku koju Vlada Austrije pruža BiH na njenom putu ka EU, pri čemu je ministrica Zadić naglasila da se država Austrija snažno zalaže za to da Evropsko vijeće dodijeli kandidatski status BiH.

Prijemu je prisustvovala ambasadorica Republike Austrije u BiH Ulrike Hartmann.

Prijem Adisa Ahmetovića, zastupnika u Bundestagu, 09.07.2022.

Gradonačelnica Grada Sarajeva Benjamina Karić ugostila je 09.07.2022. godine Adisa Ahmetovića, zastupnika u Bundestagu i izjavitelja njemačkog SPD-a u odboru za vanjsku politiku. Tokom sastanka razgovarano je o procesima koje vodi aktuelna gradska administracija, dugoročnoj viziji glavnog grada BiH, ali i putu naše zemlje ka Evropskoj uniji.

Gradonačelnica se zahvalila Ahmetoviću na njegovom snažnom zalaganju da njemački Bundestag usvoji historijsku Rezoluciju pod nazivom „Podrška BiH na putu ka boljoj budućnosti“.

Posjeta poslanika u Parlamentu Zapadne Australije Klare Andrić, 15.07.2022.

Gradonačelnica Grada Sarajeva Benjamina Karić ugostila je 15.07.2022. godine Klaru Andrić, poslanicu Parlamenta Zapadne Australije. Sagovornice su naglasile da Australija i BiH njeguju prijateljske odnose, ali i da postoje brojne mogućnosti i kapaciteti za unaprjeđenje saradnje, pogotovo sa australijskim gradovima. Posebnu sponu odnosima dvije zemlje daje i brojna zajednica bh. građana u Australiji koja predstavlja značajan potencijal za jačanje veza.

Gradonačelnica je gošću upoznala sa činjenicom da je u mandatu aktuelne gradske administracije po prvi put i zvanično donesena odluka o saradnji Grada Sarajeva i Svjetskog saveza dijaspore BiH u cilju promocije naše države i njenog glavnog grada kao investicione i turističke destinacije.

Poslanica Parlamenta Zapadne Australije pozdravila je aktivnosti gradske administracije na čelu sa gradonačelnicom Karić te zahvalila na srdačnom prijemu. Istakla je značaj povezivanja sa bh. dijasporom koja kao bh. ambasador širom svijeta ima važnu ulogu, a time i uticaj na obnovu, razvoj i stabilnost, između ostalog, i lokalne zajednice.

Prijem predsjednika Vlade Kraljevine Španije Pedra Sáncheza, 30.07.2022.

Gradonačelnica Grada Sarajeva Benjamina Karić sa zamjenicom predsjedavajućeg Gradskog vijeća Mirelom Džehverović i gradskim vijećnikom Nihadom Ukom poželjela je 30.07.2022. godine dobrodošlicu u Sarajevo i Vijećnicu predsjedniku Vlade Kraljevine Španije Pedru Sánchezu.

Tom prilikom, gradonačelnica se u ime Grada i građana Sarajeva zahvalila prijateljima iz Španije na značajnoj podršci u obnovi Vijećnice, koja je ponovo otvorena 9. maja 2014. godine, na Dan Evrope i pobjede nad fašizmom.

Gradonačelnica Karić i španski premijer Sánchez izrazili su uvjerenje u unaprjeđenje bilateralnih veza između BiH i Kraljevine Španije, te bh. prijestolnice sa pobratimskim gradovima Madridom i Barcelonom.

Prijem zastupnice Bundestaga Jasmine Hostert, Sarajevo, 10.08.2022.

Gradonačelnica Grada Sarajeva Benjamina Karić je 10.08.2022. godine ugostila Jasminu Hostert, zastupnicu Bundestaga i rođenu Sarajku koju je spletom okolnosti, životni put odveo u prijateljsku Njemačku. Obzirom na interesovanje koje je iskazala Hostert, gradonačelnica Karić ju je ukratko upoznala sa trenutnom društvenom, ekonomskom i političkom situacijom u BiH i njenom glavnom gradu. Tom prilikom je istakla zajedničku misiju koja ima za cilj bosanskohercegovačku budućnost u Evropskoj uniji uz ojačane ekonomske, kulturne i druge veze sa bh. dijasporom.

Hostert je iskazala zahvalnost na prijemu i naglasila važnost održavanja dobrih odnosa dvije prijateljske zemlje.

Prijem ministra unutrašnjih poslova Bavarske Joachima Herrmanna, 30.08.2022.

Gradonačelnica Grada Sarajeva Benjamina Karić je sa zamjenikom Harisom Bašićem 30.08.2022. primila Joachima Herrmanna, ministra unutrašnjih poslova njemačke savezne države Bavarske. Tokom susreta razgovarano je o aktuelnoj političkoj situaciji kako u BiH, tako i u Evropi, s posebnim naglaskom na sigurnosne izazove današnjice.

Doček predsjednika Republike Turske Recepa Tayyipa Erdogana, Sarajevo, 06.09.2022.

Gradonačelnica Grada Sarajeva Benjamina Karić kao član bh. delegacije, dočekala je i pozdravila predsjednika Republike Turske Recepta Tayyipa Erdogana koji je 06.09.2022. godine doputovao u zvaničnu posjetu BiH. Posjeta turskog lidera je potvrda bliskih i čvrstih veza između naših država, kao i dugogodišnje sadržajne saradnje Sarajeva sa pobratimskim turskim gradovima.

Susret sa predsjednicom Evropske komisije Ursule von der Leyen, Sarajevo, 28.10.2022.

Gradonačelnica Grada Sarajeva Benjamina Karić imala je priliku 28.10.2022. godine razgovarati sa predsjednicom Evropske komisije Ursulom von der Leyen čija se posjeta Sarajevu odvijala u kontekstu nedavne preporuke Evropske komisije da se BiH dodijeli status kandidata.

Gradonačelnica Karić tokom susreta s Ursulom von der Leyen istakla je da su u samoj srži bosanskohercegovačkog društva ukorijenjene civilizacijske vrijednosti na kojima se temelji i Evropska unija, te da su sloboda, jednakost, solidarnost, demokratija, uz puno poštivanje ljudskih prava i sloboda, osnovni principi i smjernice društvenog razvoja civilizacije kojoj Bosna i Hercegovina pripada kao sastavni dio nje. Poručila je da je BiH treba razumijevanje i podrška Evrope, ali i da Evropa treba BiH.

Posjeta savezne ministricice Republike Austrije za EU i ustavna pitanja, Sarajevo, 04.11.2022.

Gradonačelnica Grada Sarajeva Benjamina Karić primila je 04.11.2022. godine saveznu ministricu Republike Austrije za EU i ustavna pitanja Karolinu Edtstadler. Gradonačelnica se zahvalila Republici Austriji i njenoj vladi na podršci koju Austrija pruža BiH, kao i na podršci te prijateljske zemlje u donošenju preporuke Evropske komisije o dodjeljivanju kandidatskog statusa BiH za članstvo u EU.

Edtstadler je istakla da će Austrija nastaviti zagovarati evropsku perspektivu BiH i podupirati njene reformske procese, naglasivši da BiH naredni period treba iskoristiti za ispunjavanje uvjeta za dobivanje kandidatskog statusa, te je istakla značaj provođenja neophodnih reformi.

Sagovornice su složile da jačanje demokratije, mira i stabilnosti su od značaja za Zapadni Balkan i evropsku budućnost BiH.

Sastanku je prisustvovala i austrijska ambasadorica u BiH Ulrike Hartmann.

Prijem posebnog izaslanika britanskog premijera za Zapadni Balkan, 22.11.2022.

Gradonačelnica Grada Sarajeva Benjamina Karić sa zamjenikom Harisom Bašićem, primila je u Vijećnici 22.11.2022. godine. Sir Stuarta Peacha, posebnog izaslanika britanskog premijera za Zapadni Balkan i specijalnog izaslanika Vlade Slovenije za Zapadni Balkan Anžeja Frangeša, koji su došli u pratnji ambasadora Velike Britanije u BiH Juliana Reillyja i ambasador Republike Slovenije u BiH Damijana Sedara.

Tokom sastanka razgovarano je o tome kako lokalne vlasti mogu podržati građane sa izazovima poput ekonomske i energetske sigurnosti i potrebe da se mladima pruže razlozi za ostanak u zemlji. Gradonačelnica je zahvalila gostima za podršku BiH i zajedničku opredijeljenost miru i stabilnosti.

➤ OSTALE AKTIVNOSTI NA PLANU MEĐUNARODNE SARADNJE

Prijem predsjednice Bošnjačkog nacionalnog vijeća u Novom Pazaru, Sarajevo, 10.01.2022.

Gradonačelnica Grada Sarajeva Benjamina Karić primila je delegaciju Bošnjačkog nacionalnog vijeća (BNV) u Republici Srbiji, predvođenu predsjednicom Jasminom Curić, u Vijećnici 10.01.2022. godine. Tokom razgovora, gradonačelnica je izrazila želju da se saradnja sa prijateljskim gradom Novim Pazarem, u kojem se nalazi sjedište BNV, dodatno ojača, pri čemu je zahvalila svom kolegi Nihatu Biševcu na pomoći i podršci koju je Grad Novi Pazar pružio Sarajevu za otklanjanje posljedica poplava koje su zadesile glavni grad BiH.

Curić je istakla da je upravo to prijateljstvo razlog posjete, te da je došla sa porukom podrške, izražavajući zabrinutost za sva dešavanja u BiH budući da se ona reflektuju i na Sandžak. Kazala je kako Novi Pazar podržava ideju građanske i demokratske BiH, zemlje poznate po svojoj različitosti, multietničnosti, multireligioznosti i multikulturalnosti, te da upravo posjetom ove višečlane delegacije žele pokazati da je Sandžak uz sve one koji njeguju i koji se zalažu za ovakvu ideju.

Gradonačelnica je upoznala delegaciju sa trenutnom situacijom u Sarajevu i cijeloj BiH, koja se suočava sa do sada najgorom političkom i ustavno-pravnom krizom od potpisivanja Dejtonskog mirovnog sporazuma.

Curić je govorila o sličnoj situaciji u Sandžaku, koji se suočava sa odlaskom mladih, diskriminacijom prema manjini koju čine Bošnjaci u Republici Srbiji, problemima sa kojima se suočavaju Bošnjaci u zemljama regiona a koji proističu iz nedefiniranih identitetskih pitanja u institucionalnom smislu u matičnoj zemlji Bošnjaka – državi BiH.

Radni sastanak sa predstavnicima SERDA-a i NVO „Naša perspektiva“, 11.01.2022.

U skladu s Programom saradnje Grada Sarajeva sa dijasporom, dana 11.01.2022. godine održan je prvi radni sastanak kojem su prisustvovali predsjedavajući Komisije za međunarodnu saradnju Gradskog vijeća Alem Logo, predstavnik nevladine organizacije „Naša perspektiva“ Armin Alijagić, koordinator Ureda za ekonomsku saradnju sa dijasporom Sarajevske regionalne razvojne agencije (SERDA) Aida Džamalija Duran i predstavnici Odjeljenja za međunarodnu saradnju.

Tema sastanka bilo je utvrđivanje metodologije saradnje s dijasporom, te definiranje ciljeva, ciljanih grupa i aktivnosti za Program saradnje s dijasporom u cilju privlačenja investicija i prijenosa znanja i tehnologija u svrhu razvoja lokalnih zajednica i Bosne i Hercegovine u cjelini. Predloženo je da se uspostavi saradnja i sa Ministarstvom za ljudska prava i izbjeglice koje provodi projekat s dijasporom u čijem su fokusu prijenos znanja i saradnja s mladima.

Dogovoreno je da Grad Sarajevo sačini nacrt Memoranduma o saradnji čiji potpisnici će biti Grad Sarajevo, nevladina organizacija „Naša perspektiva“ i SERDA.

Vijećnica osvjetljena bojama zastave Republike Bugarske, 31.01.2022.

Vijećnica je 31.01.2022. godine osvjetljena bojama zastave Republike Bugarske, prve zemlje koja je 1992. priznala nezavisnost Bosne i Hercegovine. Tim povodom gradonačelnica Benjamina Karić je istakla da Grad Sarajevo ovim simboličnim činom prijateljstva želi uputiti zahvalnost na pruženju

ruci podrške i solidarnosti u teškim trenucima naše historije, te je naglasila uvjerenje da će se partnerstvo između Bosne i Hercegovine i Republike Bugarske nastaviti uspješno razvijati.

Prijem delegacije Marmara Group Foundation, Sarajevo, 18.02.2022.

Gradonačelnica Grada Sarajeva Benjamina Karić bila je domaćin višečlanoj delegaciji Marmara Group Foundation na čelu sa predsjednikom dr. Akkan Suverom, u Vijećnici 18.02.2022. godine. Tom prilikom gradonačelnici je uručena pozivnica i predstavljen program 25. Evroazijskog ekonomskog samita koji će se održati u Istanbulu od 07. do 09.06.2022. Samit se organizira na godišnjem nivou uz aktivno učešće domaćih i međunarodnih lidera i stručnjaka u sektoru ekonomije, politike, energetike, sociologije i bezbjednosti, a sa ciljem razmjene iskustava i bliže saradnje u pomenutim oblastima.

Fondacija Marmara Group čini važan dio sistema međunarodnih odnosa i već skoro četiri decenije djeluje kao inicijativa za mir i dijalog.

Gradonačelnica Karić je goste upoznala sa infrastrukturnim projektima Grada Sarajeva, specifičnostima i vizijom njegovog budućeg razvoja te istakla značaj kulturno-historijskih okolnosti koje povezuju dvije države, ali i njihove gradove.

Inače, delegacija je boravila u Sarajevu u radnoj posjeti tokom koje će potpisati Memorandum o razumijevanju sa Vanjskotrgovinskom komorom Bosne i Hercegovine.

Prijem poslovne delegacije iz Rumunije, Sarajevo, 21.02.2022.

Zamjenica gradonačelnice Grada Sarajeva Anja Margetić bila je domaćin poslovnoj delegaciji iz Rumunije koju je predvodio Mihai Andrițoiu, u Vijećnici 21.02.2022. godine. Rumunski privrednici su iskazali zainteresiranost za mogućnosti ulaganja Sarajeva, pa je to bio i dobar povod za razgovor o projektima i programima koje Grad Sarajevo predviđa u bliskoj budućnosti.

Margetić je istakla da Grad Sarajevo stoji na raspolaganju za inicijative koje doprinose jačoj povezanosti privrednih subjekata BiH i Rumunije, a samim tim i investicije. Sagovornici su se složili da je neophodno nastaviti aktivnosti na intenziviranju odnosa dvaju zemalja, ali i univerzitetskoj, kulturnoj i turističkoj saradnji Sarajeva i Bukurešta. To se, kako je naglašeno, posebno odnosi na sektor avijacije i mogućnost uspostave direktne avionske linije.

Andrițoiu je na prijem u sarajevsku Vijećnici došao u pratnji ekonomskog atašea Ambasade Rumunije sa sjedištem u Beogradu, gđom Tulliom Bara.

Svečano otvorenje novih prostorija Goethe instituta BiH, Sarajevo, 22.02.2022.

Pod motom „Naš novi Goethe-Institut: otvoren. inovativan. Zelen“, Goethe-institut u BiH je 22.02.2022. godine obilježio 22 godine postojanja u BiH te svečano otvorio svoje prostorije u novootvorenoj zgradi smještenoj u centru grada.

Na zvaničnom otvorenju nove kuće, pored generalnog sekretara Goethe-Instituta Johannesesa Eberta, ambasadorice SR Njemačke Margret Uebber, ministra kulture i sporta KS Samira Avdića, direktorice Goethe-Instituta Simone Voigt, prisutnim zvanicama se obratila i gradonačelnica Grada Sarajeva Benjamina Karić, koja je podsjetila prisutne na neke od primjera sjajne saradnje dvije zemlje, od uspješnih izložbi u Vijećnici pa do akademije za menadžment u kulturi te poručila da će Grad Sarajevo nastaviti podržavati institucije koje kulturom grade nove mostove i još bliže odnose.

Sa ovim novim sjedištem, njemački kulturni institut u Sarajevu želi da bude mjesto učenja i susreta, mjesto njemačko-evropske-bosanskohercegovačke razmjene.

Vijećnica osvjetljena bojama zastave Ukrajine, 24.02.2022.

Grad Sarajevo, na čelu sa gradonačelnicom Benjaminom Karić, bio je jedan od prvih koji je podigao svoj glas podrške za narod Kijeva i Ukrajine. U to ime je 24.02.2022. godine osvjetljena sarajevska Vijećnica nacionalnim bojama te zemlje nad kojom se sručila zla sudbina kakva je devedesetih zadesila BiH te se ovim činom nesebično stalo u odbranu ljudskih vrijednosti, slobode i mira.

Prijem medicinskog osoblja iz Priboja, Sarajevo, 25.03.2022.

Gradonačelnica Grada Sarajeva Benjamina Karić primila je u Vijećnici 25.03.2022. godine medicinsko osoblje iz Priboja u znak zahvalnosti za sve učinjeno prilikom vakcinisanja bh. građana u ovom gradu. Istakla je da je pandemija potvrdila činjenicu da se u teškim trenucima trebamo osloniti jedni na druge i da krize poput ove možemo uspješno prevazići zajedničkom saradnjom i borbom.

Sarajevo među 100 klimatski neutralnih i pametnih gradova do 2030., 28.04.2022.

Sarajevo je izabrano kao jedan od gradova koji će učestvovati u Misiji klimatski neutralnih i pametnih gradova (Climate-Neutral and Smart Cities Mission) do 2030. godine, koju finansira EU. Sarajevo je jedan od 377 prijavljenih gradova, od kojih samo 12 nisu u državama članicama EU.

Misija za gradove okupit će lokalne vlasti, građane, kompanije, investitore, regionalne i nacionalne vlasti da zajednički rade na pretvaranju odabranih gradova u klimatski neutralne, pametne i inovativne centre koji bi bili primjer za druge gradove.

Učešće u misiji za gradove daje Sarajevu priliku da predvodi u naporima ka klimatskoj neutralnosti i suzbijanju efekata klimatskih promjena, a istovremeno pruži višestruke koristi građanima u smislu smanjenja zagađenja, gužvi u saobraćaju, računa za energiju i uvođenja zdravijeg načina života.

Skup podrške „Žrtve iz BiH za žrtve u Ukrajini”, Sarajevo, 09.05.2022.

Gradonačelnica Grada Sarajeva Benjamina Karić pridružila se skupu podrške „Žrtve iz BiH za žrtve u Ukrajini”, održanom 09.05.2022. godine u organizaciji Udruženja Pokret Majki enklava Srebrenica i Žepa i Udruženja žrtava i svjedoka genocida. Na Dan pobjede nad fašizmom, sa ove protestne šetnje centrom Sarajeva, od Vječne vatre do Spomen obilježja ubijenoj djeci Sarajeva 1992.-1995., poslana su poruke zajedništva i solidarnosti Ukrajini i ukrajinskom narodu.

Potpisan Memorandum o saradnji sa Svjetskim savezom dijaspore BiH, Sarajevo, 11.05.2022.

Gradonačelnica Grada Sarajeva Benjamina Karić i gradski vijećnik i predsjedavajući Komisije za međunarodnu saradnju Alema Logo sastali su se sa predsjednikom Svjetskog saveza dijaspore BiH (SSDBIH) Hasanom Šehovićem i članom Glavnog odbora Mujom Hamzićem u Vijećnici 11.05.2022. godine.

Gradonačelnica Karić i predsjednik SSDBiH Hasan Šehović potpisali su Memorandum o saradnji, kojim je Grad Sarajevo formalno iskazao svoju čvrstu namjeru da osnaži veze sa bh. dijasporom koja kao ambasador BiH širom svijeta ima važnu ulogu u promociji Bosne i Hercegovine i njenog glavnog grada kao investicione i turističke destinacije.

Tokom sastanka, gradonačelnica je istakla zadovoljstvo što je u mandatu aktualne gradske administracije po prvi put ova odluka zvanično donesena i podržana od gradskih vijećnika.

Sagovornici su se složili da je potrebno jačanje veza sa bh. dijasporom, uspostavljanje što bolje saradnje i komunikacije, te maksimalno korištenje ideja i potencijala koju nosi dijaspora, a naročito mlada populacija koja je pokazala zavidne uspjehe širom svijeta.

Memorandumom je predviđena i prezentacija projekata Grada stranim investitorima sa kojima SSDBiH ostvaruje kontakte te organiziranje manifestacije „Dani dijaspore u Sarajevu/BiH“ sa određenom tematikom.

Posjeta Rolanda Schatza, osnivača Fondacije UNGSII, Sarajevo, 17.05.2022.

Na poziv Grada Sarajeva, Roland Schatz, jedan od osnivača i izvršni direktor instituta za praćenje indeksa napretka ka održivim ciljevima razvoja UNGSII (United Nation Sustainable Global Index Institute), odnosno inicijative 25+5 SDG Cities Leadership Platform, boravio je u Sarajevu u dvodnevnoj posjeti.

UNGSII osnovao je 25+5 SDG Cities kao asocijaciju gradova koji djeluju u pet različitim oblastima širom svijeta, s osnovnim ciljem da kao lideri procesa svojim primjerom nadahnu druge gradove i zajednice te pokažu da čovječanstvo raspolaže s potrebnim resursima i da je moguće postići sve ciljeve održivog razvoja do 2030. U toku je proces prijema Grada Sarajeva u asocijaciju, čime se otvara put za Grad Sarajevo, da u okviru ove platforme kao član asocijacije, delegira nekoliko ključnih projekata, relevantnih za Sarajevo, a među kojima je projekat „Čista rijeka Miljacka“.

Gradonačelnica Benjamina Karić je prilikom susreta održanog 17.05.2022. upoznala Schatza sa projektima koje Grad Sarajevo implementira u oblasti infrastrukture i održivog razvoja. Potom je na inicijativu predsjedavajućeg Gradskog vijeća Jasmina Ademovića, održan sastanak u prostorijama SERDA-e, na kojem je predstavnicima SERDA-e, Grada Sarajeva i Skupštine Grada Istočnog Sarajeva, prezentirana studija „Čista rijeka Miljacka“.

Predsjedavajući Ademović naglasio je snažno opredjeljenje Grada Sarajeva da okupi sve relevantne subjekte i da zajednički poduzmu sve što je potrebno da se projekti sadržani u studiji realiziraju u skladu s utvrđenim prioritetima uz pomoć sredstava međunarodnih fondova. U realizaciji projekata predviđeno je učešće Grada Sarajeva i Grada Istočno Sarajevo, općina: Stari Grad, Centar, Novo Sarajevo, Novi Grad, Ilidža, Pale i Istočni Stari Grad, Ministarstva privrede KS i Ministarstva komunalne privrede, infrastrukture, prostornog uređenja, građenja i zaštite okoliša KS.

Schatz je pružio podršku Gradu Sarajevu i partnerima projekta „Čista rijeka Miljacka“ u njihovim nastojanjima da što prije krenu u realizaciju projekta koji je usko vezan za ciljeve održivog razvoja UN-a čija bi realizacija unaprijedila kvalitet života građana i doprinijela promociji Grada Sarajeva.

Predsjedavajući Ademović je sa zamjenicom Džehverović upriličio sastanak Schatza s članovima upravnog i izvršnog odbora AIESEC-a u Sarajevu i BiH. Glavna tema sastanka bila je mogućnost i poticanje na djelovanje AIESEC-a na lokalnom i globalnom nivou, s ciljem dostizanja ciljeva

održivog razvoja do 2030. posebno kada je riječ o klimatskim promjenama. Razgovarano je o potrebi reforme obrazovanja, te o načinu djelovanja AIESEC-a u BiH, ali i na međunarodnom planu, u cilju razmjene iskustava.

Prijem delegacije Bošnjačkog nacionalnog vijeća Sjeverne Makedonije, Sarajevo, 30.05.2022.

Gradonačelnica Grada Sarajeva Benjamina Karić je zajedno sa predsjedavajućim Gradskog vijeća Jasminom Ademovićem i gradskim vijećnikom Alemom Logom, ugostila delegaciju Bošnjačkog nacionalnog vijeća Sjeverne Makedonije u Vijećnici 30.05.2022. godine.

Delegacija su činili predsjednik Dževad Hot, predsjednik Bošnjačkog demokratskog saveza Munir Kolašinac, direktor Uprave za manjinske etničke zajednice Admir Uzunović i generalna sekretarka Bošnjačkog demokratskog saveza Edina Zećirović.

Gosti su iskazali interes za gradske projekte, a razgovarano je i o zajedničkoj saradnji Grada Sarajeva i Bošnjačkog nacionalnog vijeća. U fokusu sastanka bilo je uspostavljanje direktnog kontakta i unaprjeđenje saradnje koja će doprinijeti jačanju bilateralnih odnosa između dvije države.

Prijem predsjednice Međunarodne izdavačke asocijacije, Sarajevo, 13.06.2022.

Sheika Bodour bint Sultan Al Qasimi, predsjednica Međunarodne izdavačke asocijacije i član vladajuće porodice Ujedinjenih Arapskih Emirata, boravila je u Sarajevu povodom susreta sa Asocijacijom izdavača u BiH, te je 13.06.2022. godine bila gošća gradonačelnice Grada Sarajeva Benjamine Karić. Tokom sastanka, gradonačelnica Karić je predstavila aktuelne projekte Grada Sarajeva, te historijat i vrijednost mjesta u kojem su se susrele.

Sastanak na temu organizacije projekta „Umjetnost i mir”, Sarajevo, 23.06.2022.

Predstavnici BBI VIP Business Cluba i Društva prijateljstva i poslovne saradnje Bahreina i BiH, sa svjetski poznatim umjetnikom Abbas Saleh Al Mosawiem, te NVO „BRAVO“, bili su gosti gradonačelnice Benjamine Karić u Vijećnici 23.06.2022. godine.

Tema razgovora bila je organizacija projekta „Umjetnost i mir” (Peace & Art Project) koji ima za cilj promociju mirovnih aktivnosti sa mladošću Sarajeva. Gradonačelnica je pozdravila održavanje ovakvog događaja koji je do sada, prema riječima prisutnih, realiziran u brojnim zemljama širom Evrope.

Tokom susreta dogovoreno je da saradnja na projektu bude proširena i na druge nevladine i omladinske organizacije koje bi doprinijele samom konceptu programa.

Posjeta predstavnika olimpijskog grada Lake Placida gosp. Jamesa McKenna, 24.07.2022.

Zamjenica gradonačelnice Grada Sarajeva Anja Margetić bila je 24.07.2022. godine domaćin Jamesu McKenni iz olimpijskog grada Lake Placida, koji je na ceremoniji otvaranja XIV Zimskih olimpijskih igara 1984. godine nosio zastavu Osla. U pratnji dogradonačelnice Margetić, McKenna je posjetio Olimpijski muzej i bob stazu na Trebeviću.

Sastanak sa predstavnicima turskog brenda „Mado“, Sarajevo, 11.08.2022.

Gradonačelnica Grada Sarajeva Benjamina Karić sa gradskom vijećnicom Danijelom Šahat ugostila je 11.08.2022. godine predstavnik turskog brenda „Mado“ koji je po osnovu Javnog poziva zakupio restoran i caffe sa baštom na obnovljenoj Bistričkoj stanici. Tim povodom gradonačelnica Karić je izrazila uvjerenje da će ovo obnovljeno zdanje velike historijske vrijednosti, sa upotpunjenim muzejskim i ugostiteljskim sadržajima, ponovo biti mjesto susreta, druženja, kulturnih i društvenih događanja značajnih za Grad Sarajevo.

Misija „Net Zero by 30th SFF“ – čišći zrak za sve do 30. Festivalskog izdanja!, 11.08.2022.

Grad Sarajevo, Sarajevo Film Festival i Kanton Sarajevo u zajedničkoj misiji „Net Zero by 30th SFF“ – čišći zrak za sve do 30. Festivalskog izdanja! Ovim povodom je 11.08.2022. godine u kinu Meeting Point održana press konferencija na kojoj su govorili gradonačelnica Benjamina Karić, direktor SFF-a Jovan Marjanović, premijer Kantona Sarajevo Edin Forto, te šef Delegacije EU u BiH i specijalni predstavnik EU, ambasador Johann Sattler.

Gradonačelnica Karić je izrazila želju da bh. prijestolnica bude s nultom emisijom - nulom zagađenosti. Istakla je da su kreativni gradovi UNESCO-a, kao što je Sarajevo, posvećeni podizanju svijesti o snažnoj ulozi kreativnosti i inovativnosti u provođenju UN-ove Agende održivog razvoja 2030.

28. festivalsko izdanje okuplja tri tima za energetske revizije čiji će rezultati pokazati koliko se energije troši u osnovnim aktivnostima, a direktor Marjanović je istakao da je poduzeto i niz drugih ekoloških mjera s ciljem smanjenja negativnog uticaja na životnu sredinu.

Susret gradonačelnice Sarajeva sa danskim glumcem Mads Mikkelsenom, 14.08.2022.

Danski glumac Mads Mikkelsen, kojem je uručeno Počasno Srce Sarajeva za izuzetan doprinos filmskoj umjetnosti, bio je gost gradonačelnice Benjamine Karić u Vijećnici 14.08.2022. godine. Mikkelsen je priznanje dobio na 26. Sarajevo Film Festivalu kojem, zbog okolnosti izazvanih pandemijom koronavirusa, nije mogao prisustvovati.

Prijem delegacije Međureligijskog vijeća grada Münchena, Sarajevo, 02.09.2022.

Gradonačelnica Grada Sarajeva Benjamina Karić primila je u Vijećnici 02.09.2022. godine delegaciju Međureligijskog vijeća grada Münchena, koju su predvodili pomoćnik minhenskog biskupa, mons. Rupert Graf zu Stolberg i imam Benjamin Idriz. U prijateljskom razgovoru dotakli su se više tema te istakli da su glavne vrijednosti svakog društva, a na kojima treba više raditi, jedinstvo, dijalog i otvorenost za sve kulture i sve religije.

Izložba „Katalonski jezik – 10 milijuna europskih glasova“, Zagreb (Hrvatska), 14.09.2022.

Zamjenica gradonačelnice Grada Sarajeva Anja Margetić prisustvovala je otvorenju izložbe „Katalonski jezik – 10 milijuna europskih glasova“, koje je u organizaciji Predstavništva Vlade Katalonije u jugoistočnoj Evropi i udruženja Platforma za jezik, održano u zagrebačkoj knjižnici i čitaonici Bogdan Ogrizović 14.09.2022. godine.

Prijem srednjoškolaca Sarajeva i Piacenze, Sarajevo, 20.09.2022.

Kolektiv i učenici sarajevske Prve gimnazije predvođeni direktoricom Velidom Tinjak, te gimnazijalci „Melchiorre Gioia“ iz Piacenze, bili su gosti gradonačelnice Grada Sarajeva Benjamine Karić u Vijećnici 20.09.2022. godine.

Rezultat je to uspješne međunarodne razmjene učenika, ali i nedavnog susreta gradonačelnice Karić sa direktoricom Tinjak na kojem je bilo govora o unapređenju saradnje Grada Sarajeva sa ovom obrazovnom ustanovom. Gradonačelnica je istakla bezrezervnu podršku ovakvim susretima kroz koje đaci sa svojim profesorima postaju bogatiji za nova životna iskustva, nova prijateljstva i uz to usvajaju italijanski jezik, ali i kulturu prijateljskog naroda.

Tokom boravka u bh. prijestolnici, italijanski školarci posjetili su objekte u užem centru grada, te bili dijelom sadržajnog programa posjete u organizaciji Prve gimnazije. Realizirani su projekti u svrhu promocije italijanskog jezika i kulture, upriličena je Sedmica italijanske kuhinje, te Festival italijanske pjesme.

Prijem članica IRI-eve mreže „Women’s Democracy Network”, Sarajevo, 02.11.2022.

Gradonačelnica Grada Sarajeva Benjamina Karić održala je 02.11.2022. godine sastanak sa delegacijom političarki i aktivistica iz Ukrajine, predvođenih predsjednicom Irynom Slavovom, koje su članice IRI-eve mreže „Women Democracy Network”.

Naime, Međunarodni republikanski institut u BiH (IRI), kroz ovu Mrežu svakodnevno pruža podršku ženama u Ukrajini u suočavanju s novim izazovima u kontekstu rata uključujući: psihološku/psihosocijalnu pomoć, pravnu pomoć, podršku u kriznim situacijama, kao i podršku majkama i suprugama stradalih.

Tokom susreta, gradonačelnica Karić je iskazala podršku snažnom angažmanu ove Mreže, te istakla da će Sarajevo i BiH i dalje nastaviti pomagati ukrajinskom narodu.

14. Dani bosanskohercegovačke kulture u Zagrebu, 21.11.2022.

Na poziv Vijeća bošnjačke nacionalne manjine Grada Zagreba i udruge Kreativna de Kultura, zamjenica gradonačelnice Grada Sarajeva Anja Margetić prisustvovala je svečanom otvorenju manifestacije 14. Dani bosanskohercegovačke kulture, koja je povodom Dana državnosti BiH održana u Zagrebu 21.11.2022. godine.

Ova tradicionalna manifestacija je građanima i gostima hrvatske prijestolnice, tokom sedmodnevnog programa ponudila raznovrstan i bogat program bosanskohercegovačkih filmskih, pozorišnih, likovnih i muzičkih ostvarenja.

Izložba fotografija „Sarajevo Barcelona Light&Shade“, Vijećnica, 21.11.2022.

U organizaciji Predstavništva Vlade Katalonije u jugoistočnoj Evropi, u Vijećnici je 21.11.2022. godine postavljena izložba fotografija „Sarajevo Barcelona Light&Shade“ autora Ante Magzana. Radi se o crno-bijelim fotografijama dvaju gradova, fotografskoj igri svjetla i sjene, chiaroscuro ljudi i arhitekture u kojima se iščitavaju osobne iskaznice pobratimskih gradova, Sarajeva i Barcelone, čija posebna povezanost je 2022. godine slavila svoju tridesetu godišnjicu. Pokrovitelji izložbe bili su Ministarstvo kulture i sporta Kantona Sarajevo i HKD Napredak Zagreb.

Svečano obilježavanje Dana državnosti BiH, Luzern (Švicarska), 26.11.2022.

Na poziv zajednice bosanskih udruženja „Moja BiH“ središnje Švicarske, gradonačelnica Grada Sarajeva Benjamina Karić prisustvovala je 26.11.2022. godine svečanosti proslave Dana državnosti BiH u švicarskom gradu Luzernu. Tom prilikom se obratila prisutnim, te upoznala sunarodnjake s trenutnom situacijom u Sarajevu i BiH.

Obilježena 30. godišnjica osnivanja kolekcije i projekta Ars Aevi, Sarajevo, 20.12.2022.

Izložbom „Nada i otpor“ japanskog umjetnika Hidetoshi Nagasawe, u Vijećnici je obilježena 30. godišnjica osnivanja kolekcije i projekta Ars Aevi. Nagasawa je jedan od prvih osnivača najvrijednije zbirke djela savremene umjetnosti u regiji i Evropi, koju posjeduje naš grad.

Na svečanosti u Vijećnici prisutnima su se pored gradonačelnice Karić obratili i ministar kulture i sporta KS Samir Avdić, otpravnik poslova Ambasade Italije u BiH Mateo Evandelisti, umjetnički direktor kolekcije Milano Enrico Comi, i osnivač Projekta Ars Aevi Enver Hadžiomerspahić.

➤ AKTIVNOSTI GRADA SARAJEVA U OKVIRU MEĐUNARODNIH ASOCIJACIJA

MREŽA BALKANSKIH GRADOVA B40 – BALKAN CITIES NETWORK

Balkanski gradovi, koji su se okupili pod vodstvom gradonačelnika Istanbula Ekrema Imamoglua osnovali su Mrežu balkanskih gradova B40, u Istanbulu 30.11.2021. godine, pod motom „Bolja saradnja, bolja budućnost“. Gradovi članovi Mreže balkanskih gradova B40 okupili su se kako bi izgradili zeleniju, pravedniju i bolju budućnost, utemeljenu na miru, stabilnosti, demokraciji, ljudskim pravima, pluralizmu i vladavini prava na Balkanu i Evropi.

Grad Sarajevo je aktivno učestvovao u radu sve četiri radne grupe formirane u okviru Mreže, i to: Lokalna klimatska akcija, Lokalna demokratija i migracije, Pametni gradovi i digitalna transformacija i Lokalna ekonomska saradnja.

Neke od aktivnosti čija realizacija je započeta u 2022. i nastavit će se u 2023. godini su sljedeće:

- Grad Sarajevo se nalazi u tehničkoj fazi implementacije Platforme za plaćanje računa (Pay it forward) sa fokusom na penzionere, kao najranjiviju kategoriju stanovništva, sa tendencijom da se u kasnijim fazama proširi na druge ranjive kategorije stanovništva.
- Grad Sarajevo i Grad Pula organiziraju takmičenje za mlade u klimatskim promjenama sa namjerom da u ovu aktivnost uključe i Sekretarijat B40 Mreže balkanskih gradova.

U nastavku je honološki pregled aktivnosti u okviru Mreže balkanskih gradova:

Prvi sastanak Mreže balkanskih gradova B40, Sarajevo, 25.04.2022.

Gradonačelnik Grada Istanbula Ekrem İmamoğlu posjetio je Sarajevo 25.04.2022. godine u svojstvu mandatnog predsjednika i osnivača Mreže balkanskih gradova B40. Cilj ove posjete bila je, između ostalog, organizacija sastanka Mreže sa bh. gradovima koji su njeni članovi ili će to tek postati.

S tim u vezi, gradonačelnik İmamoğlu je okupio pet gradonačelnika, i to gradonačelnicu Sarajeva Benjaminu Karić i zamjenika načelnika Laktaša iz Republike Srpske Darka Stankovića kao članove, te gradova kandidata za članstvo u Mreži B40, i to gradonačelnike Tuzle Jasmina Imamovića, Bijeljine Ljubišu Petrovića i Zenice Fuada Kasumovića.

Radne grupe za lokalnu ekonomsku i kulturnu saradnju, Istanbul, 20. - 25.06.2022.

Delegacija Grada Sarajeva koju su činile Nermina Suljević, pomoćnica gradonačelnice za pripremu projekata i Mahira Mujan, stručna saradnica za kulturu, učestvovala je na radionicama Mreže balkanskih gradova B40 u Istanbulu u periodu od 20. do 25.06.2022. godine.

U radionicama na temu pametnih gradova i digitalne transformacije, lokalne ekonomske saradnje i saradnje u kulturi učestvovali su predstavnici gradova članova mreže Balkanskih gradova B40. Na radionicama je razgovarano o zajedničkim projektima, te su dogovoreni konkretni projekti i zadaci na teme: otvoreni portal za podatke, platforma „plati unaprijed“, festivalski autobus, samit ambasadora za mlade i mapa puta pametnih gradova.

Navedeni projekti su već uspješno implementirani u Gradu Istanbulu koji je predložio gradovima članovima Mreže da ih i oni implementiraju uz podršku Grada Istanbula.

Predstavnice Grada Sarajeva izrazile su spremnost Grada Sarajeva da implementira navedene projekte, posebno projekt „plati unaprijed“ koji direktno utiče na živote građana, posebno one u stanju socijalne potrebe („plati unaprijed“ je platforma putem koje pojedinačni donatori mogu platiti račune za porodice u stanju socijalne potrebe).

Radionica za koordinaciju požara i katastrofa, Istanbul, 08. - 13.08.2022.

Promocija solidarnosti i saradnje između gradova članova jedan je od najvažnijih ciljeva Mreže balkanskih gradova B40. Jedna od agendi akcionog plana pripremljena od strane radnih grupa Mreže B40, je osnivanje Sistema koordinacije u slučaju katastrofe, sa ciljem pomoći i podrške gradovima članovima u slučajevima katastrofe. Tokom razgovora o ovoj agendi, gradovi članovi Mreže su preporučili organizaciju radionice o koordinaciji požara i katastrofa, te su primijetili da bi bilo jako korisno ukoliko bi vatrogasci i vatrogasni šefovi iz vatrogasnih odjela učestvovali u toj radionici sa ciljem razmjene informacija, iskustava i prakse.

S tim u vezi, na poziv Stalnog sekretarijata Mreže Balkanskih gradova B40, 16 sarajevskih vatrogasaca dobrovoljnih vatrogasnih društava „Novo Sarajevo 1934“, „Alipašin Most“, „Bjelave“ i „Vratnik“ učestvovali su u radionici na temu „Koordinacija požara i katastrofa“, koja je održana u Istanbulu od 08. do 13.08.2022. godine.

Aktivnosti poduzete kroz ovu radionicu imaju za cilj da budu prvi korak prema osnivanju Sistema koordinacije u slučaju katastrofe Mreže B40.

Radionica „Lokalna klimatska akcija“, Istanbul, 14. - 16.09.2022.

Na poziv Grada Istanbula, Elvir Hadžiahmetović, pomoćnik gradonačelnice za lokalno poslovanje i Merima Hadžiabdić, šefica Odsjeka za saradnju sa zdravstvenim ustanovama i organizacijama, učestvovali su na Radionici *Lokalna klimatska akcija*, održanoj u Istanbulu od 14. do 16.09.2022. godine.

U okviru trodnevne radionice održane u okviru Mreže B40, učesnici iz gradova – članova Mreže imali su priliku upoznati se s aktivnostima i dostignućima koja Grad Istanbul provodi u cilju povećanja svijesti o lokalnim klimatskim promjenama, smanjenju zagađenja zraka, reduciranja buke, kao i terenskim posjetama institucijama koje provode navedene aktivnosti.

Također, na Radionici su se kroz diskusiju učesnika razmijenile ideje koju zajedničku akciju mogu provesti svi gradovi – članovi Mreže jedan dan u godini, a koja će naknadno biti utvrđena, nakon konsultacija s gradonačelnicima gradova.

Predstavici Grada Sarajeva upoznali su učesnike Radionice da je Sarajevo, u aprilu 2022. godine, nakon finalne ocjene, u okviru rigoroznog procesa selekcije od 377 aplikacija za Climate-Neutral and Smart Cities Mission/Misija klimatski neutralnih i pametnih gradova, izabrano kao jedan od 100 gradova, te kao jedan od 12 gradova koji nisu iz zemalja EU. Ono što slijedi jeste kreiranje Plana misije, te zajednička izrada Ugovora za Climate City. Proglašeni gradovi će učestvovati u EU misiji za postizanje 100 klimatski neutralnih, pametnih gradova do 2030. godine.

Sastanak Mreže balkanskih gradova B40, Sarajevo, 25.04.2022.

Gradonačelnik Istanbula Ekrem İmamoğlu posjetio je Grad Sarajevo 25.04.2022. godine u svojstvu mandatnog predsjednika Mreže balkanskih gradova B40. Cilj ove posjete bila je, između ostalog, organizacija sastanka Mreže sa bh. gradovima koji su njeni članovi ili će to tek postati.

S tim u vezi, gradonačelnik İmamoğlu je okupio pet gradonačelnika i to gradonačelnicu Sarajeva Benjaminu Karić i zamjenika načelnika Laktaša iz Republike Srpske Darka Stankovića kao članove, te gradova kandidata za članstvo u Mreži B40 i to gradonačelnike Tuzle Jasmina Imamovića, Bijeljine Ljubišu Petrovića i Zenice Fuada Kasumovića.

Na ovom sastanku, gradonačelnik İmamoğlu je održao govor kao „predsjednik osnivač“ Mreže B40.

Otvorenje parka i spomenika Mreže balkanskih gradova B40, Istanbul, 05. - 08.11.2022.

Na poziv gradonačelnika Grada Istanbula, gradonačelnica Sarajeva Benjaminu Karić prisustvovala je ceremoniji otvorenja parka i spomenika Mreže balkanskih gradova B40, koja je održana u Istanbulu 06.11.2022. Mrežu balkanskih gradova, koja ima za cilj ojačati dijalog, saradnju i solidarnost među balkanskim gradovima simbolizirat će spomenik u vidu drveta.

Događaj su uveličali i gradonačelnici, Atine, Laktaša, Plovdiva, Pule, Sofije, Svilengrada i Stare Zagore.

U okviru programa, Grad Istanbul je gostima prezentirao projekat Pay-It-Forward, koji je privukao veliko interesovanje, te je ponudio pomoć Gradu Sarajevu i implementaciji istog. Radi se o digitalnoj, anonimnoj urbanoj platformi solidarnosti koja ima za cilj pomoći u ublažavanju urbanog siromaštva.

Gradonačelnica Karić je sa Imamogluom 06.11.2022. godine otvorila 44. Istanbulski maraton, jedan od najvećih svjetskih maratona i jedini koji povezuje dva kontinenta.

Službena posjeta Istanbulu završena je bilateralnim sastankom sa gradonačelnikom İmamoğluom, održanim 07.11.2022., na kojem je dogovoreno dodatno unaprjeđenje tradicionalno dobrih odnosa u kroz realizaciju zajedničkih projekta na čemu je zasnovana mreža B40.

EVROPSKI OGRANAK „GRADONAČELNICI ZA MIR“

Drugi sastanak Upravnog odbora Evropskog ogranka „Gradonačelnici za mir“, 25.03.2022.

Zamjenik gradonačelnice Grada Sarajeva Haris Bašić učestvovao je u radu drugog online sastanka Upravnog odbora Evropskog ogranka „Gradonačelnici za mir“ koji je održan 25.03.2022. godine. Povod sastanka bio je razmatranje aktivnosti koje je Ogranak implementirao tokom 2021. godine te planovi i projekti koji bi se trebali realizirati u 2022. godini.

Predstavnici gradova su tokom razgovora posebnu pažnju posvetili trenutnoj situaciji u Ukrajini i aktivnostima koje su gradovi poduzeli u smislu podrške i solidarnosti sa ukrajinskim narodom, u odbranu ljudskih vrijednosti, slobode i mira.

Inače, Asocijacija „Gradonačelnici za mir“, koju predvodi Grad Hirošima, ima za cilj promociju trajnog mira u svijetu te podizanje svijesti o potrebi ukidanja nuklearnog oružja. Ideja o pokretanju Evropskog ogranka Asocijacije nastala je 2019. godine sa ciljem jačanja i promoviranja uloge lokalnih vlasti inicijativama za podršku Sporazuma o zabrani korištenja nuklearnog oružja (TPNW). Odlučni su, također, u namjeri da rade na dodatnom širenju članstva te intenziviranju saradnje i partnerstva lokalnih vlasti i ključnih mirovnih organizacija u Evropi.

Pored Grada Sarajeva, Evropski ogranak „Gradonačelnici za mir“, čine evropski gradovi Hannover, Malakoff, Manchester, Ypres, Granollers i Cervia. Evropskim ogranakom predsjedava gradonačelnik Granollersa.

Sastanak tehničke grupe Evropskog ogranka „Gradonačelnici za mir“, 08.10.2022.

Sastanku tehničke grupe Evropskog ogranka „Gradonačelnici za mir“, koji je održan online 08.10.2022. godine, prisustvovali su predstavnici gradova Cervia, Biograda na Moru, Hannovera, Ypresa, Granollersa, Sarajeva i Thomas Hajnoczi izvršni savjetnik za razoružanje Fondacije za kulturu mira iz Hirošime.

Na sastanku je bilo riječi o prvoj konferenciji zemalja potpisnica Sporazuma o zabrani nuklearnog oružja, koja je nedavno održana u Beču. Glavne teme konferencije bile su osnivanje Naučnog savjetodavnog odbora, pokretanje fonda za pomoć žrtvama nuklearnog napada, usklađivanje Sporazuma o zabrani nuklearnog oružja (NPT) sa Sporazumom o zabrani širenja nuklearnog oružja (TPNW). Zaključci i dalje aktivnosti navedeni su u Deklaraciji iz Beča i Akcionom planu. Sljedeći sastanak zemalja potpisnica NPT-a održat će se u Meksiku 2023.

Thomas Hajnoczi i predstavnici Evropskog ogranka koji su učestvovali na 10. revizorskoj Konferenciji o Sporazumu o zabrani nuklearnog oružja u New Yorku izrazili su žaljenje što konferencija nije rezultirala usvajanjem zajedničkog dokumenta i što pojedine zemlje još uvijek smatraju da im nuklearno oružje pruža sigurnost.

Razgovarano je i o nadolazećoj Generalnoj konferenciji „Gradonačelnika za mir“ koja će se održati u Hirošimi. Istaknuto je da generalna konferencija predstavlja priliku za utvrđivanje mjera za bolju koordinaciju aktivnosti mreže. Pored navedenog, članovi tehničke grupe razgovarali su i o pitanjima proširenja članstva i jačanju aktivnosti na lokalnom nivou kada je riječ o nuklearnom razoružanju s fokusom na kampanje za ukidanje nuklearnog oružja, događaje za podizanje svijesti i lokalne politike čiji je cilj promijeniti socijalne i političke stavove o nuklearnom oružju.

GRADONAČELNICI ZA MIR

Reizbor za izvršnog člana Mreže „Gradonačelnici za mir“, 15.09.2022.

Grad Sarajevo je član Mreže „Gradonačelnici za mir“ od 2004. godine, a od juna 2015. djeluje kao Vodeći grad „Gradonačelnika za mir“ u BiH i Izvršni član Mreže. Sporazumom „Gradonačelnika za mir“, predsjedavajući, zamjenici i izvršni članovi biraju se na Generalnoj konferenciji „Gradonačelnici za mir“ koja se održava svake četiri godine.

U pripremi 10. Generalne konferencije, „Gradonačelnici za mir“ pozvali su Grad Sarajevo da kao Izvršni član nastavi s podrškom u narednom mandatu do održavanja 11. Generalne konferencije, te je s tim u vezi gradonačelnica Grada Sarajeva Benjamina Karić potpisala saglasnost 15.09.2022. godine.

10. Generalna konferencija „Gradonačelnici za mir“, Hirošima, Japan, 19. - 20.10.2022.

Zamjenica gradonačelnice Grada Sarajeva Anja Margetić učestvovala je 19.10.2022. putem videolinka u radu 10. Generalne konferencije „Gradonačelnici za mir“ koja se održavala u Hirošimi. Učesnicima skupa poruku podrške uputila je gradonačelnica Sarajeva Benjamina Karić.

Tokom konferencije predstavnici gradova su istaknuli važnost jačanja dijaloga, solidarnosti i razumijevanja u građenju mira. Posebnu pažnju posvetili su trenutnoj situaciji u Ukrajini i aktivnostima koje su gradovi poduzeli u smislu podrške ukrajinskom narodu.

U okviru Sesije „Uloga gradova“, gradonačelnici Granollersa (Španija), Hannovera (Njemačka), Kuntaichija (Japan) i gradska vijećnica Montreala (Kanada), u svojim obraćanjima istakli su da svi skupa moraju pojačati brigu i angažman u cilju međunarodne sigurnosti i miroljubivog svijeta.

Međunarodna asocijacija „Gradonačelnici za mir“, koja je 2022. godine obilježila 40 godina djelovanja, ima za cilj promociju trajnog mira u svijetu, te podizanje svijesti o potrebi ukidanja nuklearnog oružja.

SVJETSKA UNIJA OLIMPIJSKIH GADOVA (UMVO)

Samit pametnih gradova i sporta, Lozana i St. Moritz, 24. - 28.10.2022.

Zamjenica gradonačelnice Grada Sarajeva Anja Margetić učestvovala je na Samitu pametnih gradova i sporta, koji je u organizaciji Svjetske unije olimpijskih gadova (UMVO), održan u švicarskom gradu Lozani 25. i 26.10.2022. godine.

„Pretvaranje gradova u sportska borilišta“ je bila tema Samita pametnih gradova i sporta, u okviru kojeg su učesnici razgovarali o sportifikaciji gradova; važnosti sporta u današnjem društvu i

gradovima; prilikama i izazovima sa kojima se gradovi suočavaju; promicanju tjelesne aktivnosti; izgradnji sportskih terena na neobičnim mjestima; brendiranju gradova kroz sport; kombiniranju sporta i kulture kao neiskorištenog resursa; podsticanju inovacija u sportu u predgrađima; sportistima kao ambasadorima pozitivnih vrijednosti sporta; sportskim događajima za mlade; uvođenju novih ideja, novih sportskih disciplina ili novih načina organizacije događaja u cjelini.

Učesnici Samita su od 26. do 28.10. imali priliku posjetiti St. Moritz, rodno mjesto zimskog turizma, modernih zimskih sportova i dvostrukog domaćina Zimskih olimpijskih igara. Pored Olimpijskih igara za mlade 2020, St. Moritz je bio domaćin natjecanja u bobu i brzom klizanju. Učesnici su imali priliku posjetiti mjesta i znamenitosti Olimpijskih igara u tom turističkom mjestu i njegovoj okolini i upoznati se sa bogatim olimpijskim naslijeđem. Zvaničnici St. Moritza su učesnicima predstavili sportsku i turističku strategiju tog olimpijskog centra.

Naredni Samit pametnih gradova i sporta održat će se u Parizu od 27. do 29.11.2023. godine.

LIGA HISTORIJSKIH GRADOVA (LHC)

18. Generalna skupština Lige historijskih gradova, Andong (Koreja), 16.11.2022.

18. Generalna skupština Lige historijskih gradova (LHC), na temu „Historijski grad orijentiran na budućnost zasnovanu na zajednici“, održana je u Andongu (Republika Koreja) 16.11.2022. godine. U skladu s programom, proglašeni su novi gradovi članovi, razmatran je izvještaj sa sjednice upravnog odbora 2022, izabrani su članovi novog upravnog odbora 2022-2026, te je određen grad domaćin 19. Generalne skupštine. Konferencija je završena usvajanjem Deklaracije iz Andonga.

S obzirom da Grad Sarajevo nije učestvovao u ovom događaju, gradonačelnica Grada Sarajeva je na zahtjev Generalnog sekretarijata LHC, potpisala dokument kojim je prenijela svoja glasačka prava na predsjedavajućeg Lige historijskih gradova, u skladu sa članom 21. tačka 2. Sporazuma, te je isti poslan mailom 10.10.2022. godine.

MREŽA MEDITERANSKIH GRADOVA „MEDCITIES“

18. Generalna skupština „MedCities“, Larnaka, 21. - 24.11.2022.

18. Generalnoj skupštini i godišnjem seminaru Mreže mediteranskih gradova (MedCities), koji je održan u Larnaki (Republika Kipar) od 21. do 24.11.2022., prisustvovali su predsjedavajući Gradskog vijeća Grada Sarajeva Jasmin Ademović i šef Odjeljenja za kabinetske poslove Stručne službe za poslove Gradskog vijeća Amir Vrca.

Na Redovnoj sjednici je usvojen Finansijski izvještaj mreže za 2021. godinu, Izvještaj aktivnosti za 2022. i Privremeni finansijski izvještaj za 2022. godinu. Usvojen je i Plan aktivnosti i Budžet za 2023. godinu, kao i Lampedusa povelja. Usvojene su i odluke o prijemu novih članova mreže, kao i članova posmatrača.

Usvojen je dnevni red vanredne sjednice Generalne skupštine, međutim ista je prekinuta konsenzusom članova zbog nemogućnosti dolaska gradova/članova iz Republike Tunis (7 gradova/članova je trebalo uživo prisustvovati) a zbog odluke centralne vlade da im ne dozvoli učešće na ovogodišnjoj skupštini. Odlučeno je da će se nastavak vanredne sjednice Generalne skupštine održati u online formatu do 31.01.2023. godine.

Predsjedavajući Gradskog vijeća Jasmin Ademović je na vanrednoj sjednici Generalne skupštine iskazao opredjeljenje i spremnost Grada Sarajeva za domaćinstvom iduće redovne sjednice Generalne skupštine, koja bi se trebala održati krajem 2023. godine.

➤ OCJENA STANJA

Fokusirajući se na razvojnu komponentu, Grad Sarajevo je značajno doprinio afirmaciji glavnog grada BiH kao političkog, privrednog, kulturnog, sportskog i turističkog centra regije i Evrope uopće, te se pozicionirao kao ravnopravan lider u određenim procesima.

Tokom 2022. godine međunarodna saradnja je bila veoma intenzivna, te sa mnogo potencijala, pozitivnih ideja i projekata usmjerena ka uspostavljanju, održavanju i unaprjeđenju postojeće saradnje s gradovima, asocijacijama ili međunarodnim institucijama u oblasti primjene smart city rješenja, ostvarivanja ciljeva održivog razvoja, kulture, turizma, privrede, obrazovanja, sporta i ostalim područjima od interesa za građanke i građane grada Sarajeva.

Ocjenjujući međunarodnu saradnju Grada Sarajeva tokom 2022. godine uspješnom u smislu unaprjeđenja postojeće saradnje i uspostavljanja novih pobratimskih i prijateljskih veza, ovoj oblasti i dalje treba pristupati s posebnom pažnjom, te je izuzetno važno nastaviti djelovati proaktivno i inovativno, ohrabrivati razmjenu iskustava i dobrih praksi, te bilateralne i multilateralne projekte sa gradovima i međunarodnim institucijama.

➤ ZAKLJUČNA RAZMATRANJA

Evropski trend regionalizacije i decentralizacije nameće ozbiljan pristup i posebno uvažavanje značaja diplomatije gradova, kao svojevrsne efikasne forme međunarodnih odnosa čiji je nosilac grad. Gradovi putem svojih višestrukih odnosa koji često nadilaze institucionalne forme saradnje, doprinose rješavanju zajedničkih problema, stvarajući tako trajne strukture, odnosno internacionalni dijalog, ne samo u okviru regije, nego i šire.

Kao rezultat provođenja ciljeva međunarodne saradnje, pored promocije Sarajeva, u izvještajnom periodu ostvareni su i konkretni benefiti ili je u toku realizacija konkretnih aktivnosti, te su višestruko veći od uloženi sredstava u provođenju aktivnosti međunarodne saradnje Grada Sarajeva za 2022. godinu.

Neophodno je još intenzivnije nastaviti kontakte sa inostranim subjektima, te aktivnosti iz oblasti međunarodne saradnje i rad na projektima EU i drugih fondova, jer otvorenost i međunarodni kontakti omogućuju trajno uspoređivanje s najboljima te prilagođavanje i implementaciju evropskih i svjetskih standarda u svim oblastima.